

ଯୋହନଙ୍କ ପ୍ରତି ପ୍ରକାଶିତ ବାକ୍ୟ ଜହନଙ୍କ ତସାହାଁ ଝେକ୍‌ହି ବଲ୍ଲୁ ମୂଲୁ ହାଡ଼ା

ଝେକ୍‌ହି ବଲ୍ଲୁ ପୁଃନି ମେରାତି ରାଡ଼ି ପତି । ଇଦି ଜିକେଏ ଜହନ ତାଣାଟି ଜୀସୁ କ୍ରୀସୁ ଜାର୍ନାଆଡ଼ି ୯୫ ବାର୍ଯା ତାୟୁ ରାସ୍‌କି ଆହାମାତେ ୧:୧ । ଏଝାସି ଜହନତି ନେହ୍ କାରୁତଲେ ତାନିଗଟା ଆକୁ ପତିୟାଁ ରାଟାମାତେସି ଏଝି ୧ଜହ, ୨ଜହ ଅଡ଼େ ୩ଜହ । ଜହନ ଆମିନି ଗାଟାଣାଇଁ ଜୀସୁ ହାରେକା ଜୀଝୁ ନହ୍ ମାତେସି । ଜହନ ଏୟୁ ମାଦିମାନି ବୁନିତି ପାଡ଼ମସ୍ ଗାୟୁତା ମାନି ବେଲାତା ଇ ଝେକ୍‌ହି ବଲ୍ଲୁ ରାଟାମାତେସି, ଇଚିହ୍ ଜୀସୁ କ୍ରୀସୁତି ନେହ୍ କାରୁତାକି ଏଝାଣାଇଁ ଏମ୍ବାଆଁ ଅଝିଆହାମାତେ ଜହ ୧୩:୨୩ ।

ଜୀସୁ ଝେଣ୍ଡା ଝାନ୍ତି ଦିନା ତାଗେ ଝାହି ମାନାକି ଜୀସୁ କ୍ରୀସୁ ତାଣା ନାମୁତଲେ ମାଞ୍ଜାଲି ପଡ଼ଝି ଆନାରାକି ସାସା ଅଡ଼େ ଆସା ହୀହାଲିତାକି ଇ ଝେକ୍‌ହି ବଲ୍ଲୁ ରାଟିତେସି ୧:୩; ୨୨:୭ । ଏଝାସି ବାରେ ନାମିତି ଲକୁ ଅଡ଼େ ବାରେକିହାଁ ସାଡ଼ାଗଟା କୁଲମିତାକି ରାଟିମାନେସି ୨-୩ । ଜହନ ତାନି ରାଟିନି ତାଣା ମାହାପୁରୁ ଅଣ୍‌ପୁତି ବଲ୍ଲୁ୧:୩ ଅଡ଼େ ତାନି ମେସାମାନି ହାରେକା ସିନାୟାଁତି କାତା ରାଟିମାନେସି । ଇ ପତିତି ଏରେକା ତାଣା ପୁଃଇ ପତି ତଲେ ସମାନା ମାନାଣି, ଜିକ ୬:୧-୮ ମେସାଲି ଆଡ଼ିନାୟି । ସାଡ଼ାଗଟା ତୀଡ଼ି ଅଡ଼େ ସାଡ଼ାଗଟା ଗିନାୟାଁ ଏମିନି ଗାଟାଇଁ ମାହାପୁରୁ ମିସରତି ଲକୁଣି ତଣ୍ଡ ହୀହାଲିତାକି କସୁୟାଁ ପାଣ୍ଡାନେସି ହାନାୟି ୭-୯ ।

ଝେକ୍‌ହି ବଲ୍ଲୁ ରାନ୍ତି ବେଲାତି କାତା ଝେସିମାନେ, ଜୀସୁ ତାୟୁ ଜୀଣା ଆନେସି ଅଡ଼େ ଆମିନି ଗାଟାରି ଏଝାଣି ତାଣା ବାର୍ସୁ ଇଚିନେରି ଏଝାରି ବାରେବେଲା ଏଝାଣିତଲେ ଡ଼ୟିନେରି । ଇ ପତି ନିଙ୍ଗେ ଜାଗ୍ରାତା କିୟାପେ ଅଡ଼େ ଆସା ହିୟାପେ, ଇଚିହ୍ ଜୀସୁ ତବେ ଝେଣ୍ଡା ଝାହିମାନେସି ।

ପତିତା ମାନାୟି

- ୧. ଜହନ ତାଙ୍ଗେ ପୁଣ୍ଡିକିନାୟି ଅଡ଼େ ଡାୟୁତି କାତା ମେହନାୟି । ୧:୧-୨୦
- ୨. ସାଡ଼ାଗଟା କୁଲମିକାକି ଜୀସୁ କ୍ରୀସ୍ତ ତାଣାଟି ଜହନତି କାରୁ । ୨:୧-୩:୨୨
- ୩. ସାଡ଼ାଗଟା ବୁରୁ ମୁଦ୍ରା ଅଡ଼େ ସାଡ଼ାଗଟା ଡାଡ଼ି । ୪:୧-୧୧:୧୯
- ୪. ମୀରକା ଅଡ଼େ ସାଡ଼ାଗଟା ଡାକ୍‌ଗାଟି ରାଚୁ ତଲେ ଜୁଜୁ । ୧୨:୧-୧୪:୨୦
- ୫. ସାଡ଼ାଗଟା କପାଗାଟି ଗିନାୟି । ୧୫:୧-୧୬:୧୮
- ୬. ମାହାପୁରୁ ଲାକପୁରୁ ତାନି ସାଡ଼ୁଇଁ ଜୀଣା ଆନାୟି । ୧୭:୧-୨୦:୧୫
- ୭. ପୁଝନି ଲାକପୁରୁ ଅଡ଼େ ପୁଝନି ଦାରତି । ୨୧:୧-୨୨:୨୧

୧ ଜୀସୁ କ୍ରୀସ୍ତୁତି ଝେକ୍‌ହି ବଲ୍ଲୁ; ଝେଡ଼ା ଆଆନା ଏନାୟି ଗଟଝି ଆନେ ଏଦାଆଁ ବାରେ ଏଝାସି ଏନିକ୍ ତାନି ହଲିୟାଙ୍ଗାଣି ଝେହନେସି, ଏଦାଆଁତାକି ମାହାପୁରୁ ଇଦାଆଁ ଜୀସୁ ନକିତା ହେରପିତେସି, ଅଡ଼େ ଏଝାସି ତାନି ଦୁଡୁଇଁ ପାଣ୍ଡାନା ତାନି ହଲିୟା ଜହନଇଁ ଏଦାଆଁ ଝେସ୍ତେସି । ୨ ଏ ଜହନ ମାହାପୁରୁତି ବଲ୍ଲୁ ଅଡ଼େ ଜୀସୁ କ୍ରୀସ୍ତୁତି ସାକି କାତା ଇଚିହିଁ ଏଝାସି ଏନାଆଁ ମେସ୍ତେସି ଏ ବାରେ କାତାତି ସାକି ହାହିମାନେସି । ୩ ଆମ୍ବାଆସି ଇ ପତି ପଡ଼ଝି ଆନେସି ଇଞ୍ଜା ମାହାପୁରୁତି ବଲ୍ଲୁ ଝେଞ୍ଜାନା, ଇ ପତିତା ରାସ୍‌କି ଆହାମାନାଣି ବାରେ ମାନଝି ଆନାର ନେହାରି, ଏନାଆଁତାକି ଇଚିହିଁ ଇ ବାରେ ଗଟଝି ଆନି କାଲମି ତାଗେ ଝାଡ଼େୟିଏ ।

ସାଡ଼ାଗଟା କୁଲମିକି ଜହରା କିନାୟି

୪ *ନାନୁ ଜହନଡେଏଁ, ଆସିୟାତା ମାନି ସାଡ଼ାଗଟା କୁଲମିକାଣି ଜହରା ଝେସାନା ରାଡ଼ିମାଞ୍ଜାଇଁ, ମାହାପୁରୁତି କାର୍ମାମେହନାୟି ଅଡ଼େ ହିଡ଼ଡ଼ି ଜୀଝୁ ମିଙ୍ଗେ ଆୟାପେ, ନୀର୍ଏ ଆମ୍ବାଆସି ମାନେସି ତଲି ମାଚାସି ଅଡ଼େ ଜିକେଏ ଡାୟୁ ଦିନା ଝାନେସି, ଅଡ଼େ ତାନି ରାଜିତି ସିଂଗାସାଣି ନକିତା ନିଚାମାନି ସାଡ଼ାଗଟା ଜୀଝୁୟାଁ ତାଣାଟି, ୫ ଜୀସୁ କ୍ରୀସ୍ତ ନାମୁତି ସାଡ଼ା ସାକି ହାନାସି, ହାଡ଼ାରି ବିତ୍ରାଟି ତଲିଏ ନିଙ୍ଗିତାସି, ଜାର୍ନା ଆଡ଼ାସି, ଅଡ଼େ ଦାରତିତି ରାଜାୟାଣି ସାଲଝି କିନାସି । ଏଝାସି

☆ ୧:୪ ୧:୪ ଝେ ବଲ୍ଲୁ ୪:୫

ମାଙ୍ଗେ ଜୀଝୁ ନହାଁମାଞ୍ଜାନେସି, ଅଡ଼େ ତାନି ନେତେରିଟି ମାଙ୍ଗେ ପାପୁଟି ଗେଲ୍‌ପାତେସି । ୬ *ଅଡ଼େ ମାଙ୍ଗେ ର ରାଜାତି କୁଲୁଲେହେଁ କିହାନା ଆବା ମାହାପୁରୁ ନକିତା ପୂଜେରା ଲେହେଁ ଆଚାମାଞ୍ଜାନେସି, ତାନି ଗାଝୁରମି କାଜାପାଣା କାଲାକାଲା ତାକି ଆପେ । ଆମେନ୍ ।

୭ *ମେହଦୁ ଏଝାସି ଦୁନ୍ଦା ତଲେ ଝାହିମାନେସି, ଏଚେଟିଏ ବାରେ କାଶ୍‌କା ଏଝାଶାଲ୍ ମେହନୁ, ଅଡ଼େ ଏଝାଶାଲ୍ ଗୁକ୍‌ହା ମାଚାରି ଜିକେଏ ମେହନେରି, ଦାରତିତାରି ବାରେ କୁଡ଼ା ଏଝାସି ଝାହିମାନାକି ଡୀନେରି ଏଦି ସାତା ଆନେ । ଆମେନ୍ ।

୮ ବାରେ ବାଡ଼ୁଲୁ ଗାଟି ପ୍ରବୁ ମାହାପୁରୁ ଝେସିମାନେସି, ନାନୁ ମାଟ୍‌ନାତେଏଁ ଅଡ଼େ ରାପ୍‌ନାତେଏଁ, ଆମ୍ବାଆସି ନୀଏଁ ମାନେସି ତଲିଏ ମାଚେସି ଅଡ଼େ ତାୟୁ ଦିନା ଝାନ୍ଦାସି ନାନୁ ଏଝାତେଏଁ ।

କ୍ରୀସ୍ତୁଲ୍ ମେହନାୟି

୯ ନାନୁ ଜହନତେଏଁ, ମୀ ତାୟିତେଏଁ, ଜୀସୁତି ସୀସୁ ଆହାଁ ତାନି ରାଜି ଲକ୍‌ତାକି ଝାହିମାନି କସ୍ତୁ ଅରହାଲି ନାନୁ ମୀ ତଲେତି ର ମାଣସିତେଏଁ । ଜୀସୁ ତସାମାନି ସାତା ଇଞ୍ଜା ମାହାପୁରୁଟି ବଲ୍ଲୁ ଝେସିମାଚାକି ନାଙ୍ଗେ ପାଡ଼ମସ୍ ସାମ୍‌ଦୁରି ମାଦି ମାନି ଟାୟୁତା ପାଣ୍ଡାମାଞ୍ଜାତେରି । ୧୦ ପ୍ରବୁତି ଦିନାତା ସୁଦୁଜୀଝୁ ନା ଲାକ ରେଚାଝାଡ଼େ, ଅଡ଼େ ନାନୁ ତାୟୁ ଝାକିଟି ତୀତ୍ରି ମହୁରି ଲେହେଁତି କାଜା ଗିୟାଁତଲେ ଏଲେ ଇଞ୍ଜିମାଚି ର ହାଡ଼ା ଝେଚେଏଁ । ୧୧ ନାନୁ ମେସିମାନାଣି ରାଚାମୁ ଅଡ଼େ ଇ ପତିତି ଇ ସାଡ଼ାଗାଟା କ୍ରୀସ୍ତାନା କୁଲମି ଇଚିହଁ ଏପିସି, ସ୍ପର୍ନା, ପର୍ଗମ, ତୁୟାତିରା, ସାଦ, ପିଲାଦେଲ୍‌ପିୟା ଅଡ଼େ ଲାଝୁଦିକିୟାତି କୁଲମିତା ପାଣ୍ଡାମୁ ।

୧୨ ଆମ୍ବାଆସି ନା ତଲେ କାତା ଆହିମାନେସି, ଇଦାଆଁ ମେସାଲି ଝେଶ୍ଟେ ସିନିକିତେଏଁ, ଇଞ୍ଜା ସାଡ଼ାଗଟା ବାଂଗାରା ଦୀଝୁୟାଁ, ୧୩ ଇଞ୍ଜା ଏ ଦୀଝୁୟାଁ ମାଦିଏ ମାଣସି ମୀରଏଣା ଲେହେଁ ର ମାଣସି; ଏଝାଣି ପାଞ୍ଚାନାୟାଁ ପାତେକା ହିମ୍‌ରି ପିକ୍‌ହା ମାଚେ ଅଡ଼େ ବକତା ବାଂଗାରା ପାଚାତି ଡ଼ରି ରୁପାମାଚେ; ୧୪ ଏଝାଣି ତାୟୁଁ ବାଣାୟାଁ ଅପହି ଲୁଲୁ

* ୧:୬ ୧:୬ ଝେ ବଲ୍ଲୁ ୫:୧୦ ☆ ୧:୭ ୧:୭ ମାତି ୨୪:୩୦; ମାର୍କ ୧୩:୨୬; ଲୁକ ୨୧:୨୭; ୧ତେସ ୪:୧୭; ଜହ ୧୯:୩୪,୩୭; ମାତି ୨୪:୩୦

ଅଡ଼େ ପେଣ୍ଡି ମାରୁ ଲେହେଁ ଦବଲା, ଅଡ଼େ ଏଞ୍ଜାଣି କାଣ୍ଡା ହିରୁ ଲେହେଁ ଡ଼ାଞ୍ଜି ମାରୁ । ୧୫ ତାନି ପାଃଆନାୟାଁ ହଲ୍ଲୁତା ହୁଡ଼ିତି ପିତାଡ଼ା ମୁସିମାନି ଲେହେଁ ମିଶସି ମାରୁ, ଅଡ଼େ ତାନି ଗିୟାଁ ଲଦ ଲଦ ଇଞ୍ଜି ରିହିମାନି ଏୟୁତି ହାଡ଼ା ଲେହେଁତାୟି । ୧୬ ତାନି ଚିଃନି କେୟୁତା ସାଡ଼ାଗଟା ହୁକାୟାଁ ମାରୁ, ତାନି ଗୁଡ଼ିଚି ରିକଞ୍ଜାକି ଦାରାଗାଟି କାଣ୍ଡା ହଡ଼େ, ତାନି ମୁମ୍ବୁ ମୁାଦେନା ବେଲା ଡ଼ାଞ୍ଜିମାନି କାରା ଲେହେଁ ଉଜେଡ଼ି ଗାଟାୟି । ୧୭ ନାନୁ ଏଞ୍ଜାଣାଲ୍ ମେସପନିଏ ହାଡ଼ିଲେହେଁ ତାନି କତାୟାଁ ଡ଼ଇ ରୀତେସ୍, ଏମ୍ପାଟିଏ ଏଞ୍ଜାସି ନା ଲାକ ତାନି ଚିଃନି କେୟୁ ଇଟାନା ଇଲେ ଇଞ୍ଜାଡେସି, ଆଜାଆନି ନାନୁ ମାଟ୍ନାତେସ୍ ଅଡ଼େ ରାପ୍ନାତେସ୍ । ୧୮ ଆଜାଆଦୁ ନାନୁ ନୀଡ଼ା ମାନାତେସ୍ ହାଡ଼ାତେସ୍, ନାନୁ କାଲା କାଲେଏତାକି ନୀଡ଼ାମାଲ୍, ହାନାୟି ଅଡ଼େ ହାଡ଼ାରି ରାଜିତି କୁଚିକାଡ଼ି ନା କେୟୁତା ମାନେ । ୧୯ ଇଚିହ୍ ନାନୁ ଏନାଆଁ ମେସାମାଞ୍ଜି, ଅଡ଼େ ଏନାୟି ନୀସ୍ ଆହିମାନେ ଇଞ୍ଜା ଇଦାଣି ଜେଚ ଏନାୟି ଆନେ ଇ ବାରେ ରାଡ଼ା ଇଟାମୁ । ୨୦ ନା ଚିଃନି କେୟୁତା ମେସାମାନି ସାଡ଼ାଗଟା ହୁକାୟାଁ ଅଡ଼େ ସାଡ଼ାଗଟା ବାଂଗାରା ଦୀଞ୍ ସଡ଼ାୟାଁତି ଡ଼ଗୁମାନି କାତା ଇଦି, ସାଡ଼ାଗଟା ହୁକାୟାଁ ସାଡ଼ାଗଟା କୁଲମିତି ଦୂଡୁୟାଁ, ଅଡ଼େ ସାଡ଼ାଗଟା ବାଂଗାରା ଦୀଞ୍ ସଡ଼ାୟାଁ ସାଡ଼ାଗଟା କୁଲମିକା ।

୨

ଏପିସି କୁଲମିତାକି କାରୁ

୧ “ଏପିସି କୁଲମିତି ଦୂଡୁ ଡାଣା ରାଡ଼ାମୁ, ଆମ୍ପାଆସି ଚିଃନି କେୟୁତା ସାଡ଼ାଗଟା ହୁକାୟାଁ ଆସାମାନେସି ଅଡ଼େ ସାଡ଼ାଗଟା ବାଂଗାରା ଦୀଞ୍ ସଡ଼ାୟାଁ ମାଦି ରେଜିମାନେସି, ୨ ଏଞ୍ଜାସି ଏଲେଇଞ୍ଜି ମାନେସି, ନାନୁ କିହାମାନି କାମା ନାନୁ ପୁଞ୍ଜାମାଲ୍, ନାନୁ ଏନିକ୍ ଖାହୁତଲେ କାମା କିହିମାଞ୍ଜି, ଅଡ଼େ ଏଚେକା ଅରହିମାଞ୍ଜି ଏଦାଆଁ ପୁଞ୍ଜାମାଲ୍, ନାନୁ ଲାଗେଏ ପଲେଏ କାମା କିନାରାଲ୍ ଅପିହିଲଅତି, ଅଡ଼େ ପାଣ୍ଡୁଞ୍ଜି ଆଆନା ମାମ୍ପୁ ପାଣ୍ଡୁଞ୍ଜି ଆହାମାନମି ଇଞ୍ଜି ଝେସା କଡ଼ିନେରି, ନାନୁ

☆ ୧:୧୭ ୧:୧୭ ଝେକହି ବଲ୍ଲୁ ୨:୮; ୨୨:୧୩

ତାୟିପାରି କିହାଁ ଏଝାରି ମିଚି କାତା ଝେହନାରି ଇଞ୍ଜି ପୁଞ୍ଜିମାଞ୍ଜି ।
 ୩ ନା ଦରୁ ତାକି ଦୁକୁ କସ୍ତୁ ଅରହିମାଞ୍ଜି ଇଞ୍ଜା ଝାହାହିଲଅତି ଇଦାଆଁ
 ଜିକେଏ ନାନୁ ପୁଞ୍ଜାମାଇଁ । ୪ ଆତିହିଁ ଜିକେଏ ନୀ କପାଟି ନା ଇ
 କାତା ମାନେ, ତଲି ଜୀଝୁନହିଁ ମାଞ୍ଜାତିଲେହେଁ ନୀଏଁ ଜୀଝୁନହିଁ
 ମାଞ୍ଜଅତି । ୫ ଅଡେ ନୀନୁ ଏନିକିଁ ଡଇ ତରଗା ମାଞ୍ଜି ଏଦାଆଁ
 ଅଶ୍‌ପାନା ନୀ ପାପୁ ପିସାହାଁ ମନ ଝେଟ୍‌ମୁ ଅଡେ ତଲିତିଲେହେଁ
 ସାତା କାମା କିମୁ, ଆଆତ୍‌ ଏଚେତା ନୀନୁ ହିୟାଁ ଝେଟ୍‌ଅତି,
 ନାନୁ ନୀ ତାଣା ତବେ ଝାହାନା ନୀ ଦୀଝିଁ ନୀ ତାଣାଟି ଏଚ୍‌କା
 ଗୁଚିକିୟାଁ । ୬ ଆଡିଜିକେଏ ନୀ ତାଣା ର ନେହିଁ ଗୁଣୁ ମାନେ ନାନୁ
 ଏନିକିଁ ନିକଲାଇତାରି ବାରେ କାମା ଅପିହିଲଅଁ ଏଲେକିଁ ନୀନୁଝା
 ଅପିହିଲଅତି ।”

୭ * “କୁଲମିକାଣି ସୁଦୁଜୀଝୁ ଏନାଆଁ ଝେସିମାନେ ଆମ୍ବାଆରି କୀର୍କୀ
 ମାନୁ ଏଦାଆଁ ଝେଣ୍‌ମାସି । ଆମ୍ବାଆସି ଜୀଣା ଆନେସି, ଏଝାଣାଇଁ ନାନୁ
 ମାହାପୁରୁ ରାଜିତା ମାନି ଜୀଝୁଗାଟି ମାରନ୍ତୁତି ପାଡେୟି ତିଞ୍ଜାଲି ହୀଇ
 ।”

ସ୍ପର୍ନା କୁଲମିତାକି କାରୁ

୮ * “ସ୍ପର୍ନା କୁଲମିତି ଦୁତୁ ତାଣା ରାଚାମୁ, ଆମ୍ବାଆସି ତଲିତାସି
 ଅଡେ ତାୟିତାସି, ଆମ୍ବାଆସି ହାହାମାଚେସି ଅଡେ ଝେଣ୍‌ଣେ ନୀଡିତେସି,
 ଏଝାସି ଏଲେଇଞ୍ଜି ମାନେସି । ୯ ନାନୁ ନୀ ବାରେ କସ୍ତୁ ଅଡେ ହାକି
 କାକୁଲି ପୁଞ୍ଜାମାଇଁ, ସାମା ନୀନୁ ବାଡକୁ ଗାଟାଟି ଅଡେ ଆମ୍ବାଆରି
 ଜୀହୁଦି ଲକୁ ଆଆନା ମାମ୍ବୁ ଜୀହୁଦି ଲକୁତମି ଇଞ୍ଜିଁ ଇନେରି,
 ଏଝାରି ସୟତାନ ଗଚିତାରି ଏଝାରି ନିୟା ଜିକେଏ ନାନୁ ପୁଞ୍ଜାମାଇଁ
 । ୧୦ ମୀରୁ ଏମିନି ଦୁକୁ ବେଟାଆହାଲି ହାଜି ମାଞ୍ଜେରି, ଏ ବାରେ
 ଆଜାଆଦୁ; ମେହଦୁ ମିଙ୍ଗେ ତାୟିପାରି କିହାଲି ସୟତାନ ମୀ ବିତ୍ରାଟି
 ଆମ୍ବା ଆମ୍ବାଆରାଇଁ କାୟିଦିତା ଇଚିନେ, ଅଡେ ମୀରୁ ଦସ ଦିନା କସ୍ତୁ
 ବେଟାଆଦେରି । ମୀରୁ ହାନି ପାତେକା ନାମୁତଲେ ମାଞ୍ଜୁ, ଆତିହିଁ
 ନାନୁ ମିଙ୍ଗେ ଜୀଝୁତି ଚପେରି ହିୟାଁ ।”

☆ ୨:୭ ୨:୭ ଝେ ବଲ୍ଲ ୨୨:୨ ☆ ୨:୮ ୨:୮ ଝେ ବଲ୍ଲ ୧:୧୭; ୨୨:୧୩

୧୧ ☆ “କୁଲମିତି ସୁଦୁଜୀଝୁ ଏନାଆଁ ଝେସିମାନେ, ଝେଞ୍ଜାଲି କୀର୍କୀ ମାଟିସାରେ ଝେଶମ୍ବାସି, ଆମ୍ବାଆସି ଜୀଣା ଆନେସି ଏଝାଣାକ୍ ଅର ଦେବାତି ହାକି ତଲେ ନସ୍ତୁ କିହାଲି ଆଡେଏ ।”

ପର୍ଗମ କୁଲମିତାକି କାରୁ

୧୨ “ପର୍ଗମ କୁଲମିତି ଦୂତୁ ତାଣା ରାତାମ୍, ଆମିନି ଗାଟାଣି ତାଣା ରିକଝାକି ଦାରା ଗାଟି କାଣ୍ଡା ମାନେ ଏଝାସି ଏଲେଇଞ୍ଜି ମାନେସି । ୧୩ ଆମିନି ତାଣା ସୟତାନତି ସିଂଗାସାଣି, ଏମ୍ବାଆଁ ନୀନୁ ବାସା କିହିମାଞ୍ଜି, ଇଦାଆଁ ନାନୁ ପୁଞ୍ଜାମାକ୍, ଆଡିହିଁ ଜିକେଏ ନୀନୁ ନା ଦରୁତି ଆଟ୍ଝା ତଲେ ଆସାମାଞ୍ଜି, ଅଡେ ନା ସାକି ଆନ୍ତିପା ଏତିବେଲା ମୀ ତାଣା ସୟତାନତି ବାସା ଟାୟୁତା ପାୟୁଝି ଆହାମାରେସି, ମୀରୁ ନା ତାଣା ନାମାମାନାକି ଏତିବେଲାତା ଜିକେଏ ନାଞ୍ଜେ ପୁଞ୍ଜାହିଲିଆଁ ଇଞ୍ଜାଆତି । ୧୪ ଆଡିଜିକେଏ ନୀ କପାଟି ର କାତା ମାନେ, ଇତିହିଁ ଆମିନି ବିଲିୟମ ପେଶକା ବମାୟାକି ଡାକାମାନି ବଗୁ ତିନି ତାଣାଟି ପାପୁ ଅଡେ ଦାରିକାମା କିଝିକିନି ପାନ୍ଦା ମେଡହାଲି ଇସାୟେଲ ମୀରକା ବାଲାକକ୍ ଜାପୁହା ମାରେସି, ଏଲେତି କାମା କିନି ଲକୁ ମୀ ବିତ୍ରାଟି ଏତରଜାଣା ତାକିନାରି ମାନେରି । ୧୫ ଏଲେକିହିଁ ଏ ନିକଲାୟ ଜାପୁନାଣି ଆସାମାନି ଲକୁ ମୀ ବିତ୍ରା ମାନେରି । ୧୬ ଏଦାଆଁତାକି ମୀ ପାପୁ ପିସାନା ହିୟାଁ ଝେଟ୍ଟୁ ଆଆଡିଁ ନାନୁ ମୀ ତାଣା ତବେ ଝାହାନା ନା ଗୁତିଟି ହନି କାଣ୍ଡାତଲେ ଏଝାରି କପାଟି ଜୁଜୁ କିକ୍ ।”

୧୭ ☆ “କୁଲମିକାଣି ସୁଦୁଜୀଝୁ ଏନାଆଁ ଝେସିମାନେସି ଆମ୍ବାଆରି କୀର୍କୀ ମାନୁ ଏଦାଆଁ ଝେଶମ୍ବାସି । ଆମ୍ବାଆସି ଜୀଣା ଆନେସି ଏଝାଣାକି ଡଗୁମାନି ମାନା ତିଞ୍ଜାଲି ହୀକ୍ ଅଡେ ଏଝାରି ବିତ୍ରାଟି ବାରେଜାଣାଟି ପୁଝନି ଦରୁ ରାସକି ଆହାମାନି ର ଦବଲା ଝାଲି ହୀକ୍, ଏ ପୁଝନି ଦରୁ ଏନାୟି ଝାଲି ଆନାଣି ପିସପେ ଆମ୍ବାଆସି ପୁନଅସି ।”

ତୁୟାତିରା କୁଲମିତାକି କାରୁ

୧୮ “ତୁୟାତିରା କୁଲମିତି ଦୂତୁ ତାଣା ଇଲେଇଞ୍ଜି ରାଡ଼ାମ୍ବୁ, ମାହାପୁରୁ ଆମିନି ମୀରୁଏଣା କାଣକା ଡ଼ାଞ୍ଜିମାନି ହିରୁ ଲେହେ ଇଞ୍ଜା ପାଃଆନା କଡ଼ାୟା ମ୍ବିସିମାନି ପିତାଡ଼ା ଲେହେ ଏଞ୍ଜାସି ଏଦାଆଁ ଏଲେଇଞ୍ଜି ମାନେସି । ୧୯ ନାନୁ ନୀ କାମା, ଜୀଞ୍ଜୁ ନନାଣି, ନାମୁତଲେ ସେବା କିନାଣି, ଅରୁହିନାଣି ପୁଞ୍ଜାମାଲ୍, ଅଡ଼େ ନୀ ତଲିତି କାମା କିହାଁ ନୀଏଁ ହାରେକା ଗାଡ଼ି କାମା କିହିମାଞ୍ଜି, ଇଦାଆଁ ଜିକେଏ ପୁଞ୍ଜାମାଲ୍ । ୨୦ ଆଡ଼ିଜିକେଏ ନୀ କପାଟି ର ଇତି କାତା ମାନେ, ଜିଜେବଲ୍ ଦରୁଗାଟି ଆମିନି ଇୟା ଜାହାରାଲ୍ ମାହାପୁରୁ ଅଣ୍ପୁତି ବଲ୍ଲୁ ଝେକ୍‌ନାତେଏଁ ଇଞ୍ଜି ଝେସାକତାନା, ନା ସେବା କିନାରାଲ୍ ଦାରିକାମା ଅଡ଼େ ପେଣକା ବମାୟାକି ଡ଼ାକାମାନି ବଗୁ ତିଞ୍ଜାଲି ଜାପୁହାନା ଲାଗେଏ କିଞ୍ଜି କିହାମାନେ, ମୀରୁ ଏଦାଣି ଅରୁହି ମାଞ୍ଜେରି । ୨୧ ନାନୁ ଏଦାନାକି ତାନି ପାପୁ କାମା ପିସାନା ମନ ଝେଟ୍‌ହାଲି ହୀତି ଜିକେଏ, ତାନି ଦାରିକାମା ପିସାଲି ମନ କିଆଡ଼େ । ୨୨ ଇଦାଆଁତାକି ନାନୁ ଏଦାନି ମାଡ଼ ଛୁଞ୍ଜିକିଲ୍, ଅଡ଼େ ଆମିନି ଗାଟାରି ଏଦାନିତଲେ ଦାରିକାମା କିନେରି, ଏଞ୍ଜାରି ତାନି ପାପୁ କାମାଟି ହିୟାଁ ଝେଟ୍‌ଆତ୍ ନାନୁ ଏଞ୍ଜାରାଲ୍ ଆଜିହପେତି ସାସ୍ତି ହୀଲ୍ । ୨୩ ଅଡ଼େ ନାନୁ ତାନି ମୀରୁକା ମାସକାଲ୍ ହାକି ତଲେ ନାସାକିଲ୍, ଏତେଟିଏ ନାନୁ ବାରେ ଲକୁତି ହିୟାଁ ଅଡ଼େ ମନତି ଅଣ୍ପୁତି ପୁନାତେଏଁ, ଅଡ଼େ ବାରେଜାଣାକି ତାନି କାମାଟି ପାଡ଼େୟି ହୀନାତେଏଁ ଇଞ୍ଜି ବାରେ କୁଲମିକା ପୁଞ୍ଜାନୁ ।”

୨୪ “ସାମା ମୀରୁ ତୁୟାତିରାତି ଏଚରଜାଣା ମାନାତେରି ଏ ଲାଗେଏତି ଜାପୁନାଣି ଆସା ହିଲଅତେରି, ଇଞ୍ଜା ଏଟ୍‌କାତାରି ଏଦାଆଁ ସୟତାନତି ଡ଼ଗୁମାନି କାତା ଇଞ୍ଜି ଇନେରି, ଏଦାଆଁ ମୀରୁ ଜାପାହିଲଅତେରି, ନାନୁ ଏଞ୍ଜାରି ଲାକ ଏନି ପୁଞ୍ଜି ବଲ୍ଲୁ ହୀଅଁ । ୨୫ ଇତିହଁ ମୀ ତାଣା ଏନାୟି ମାନେ ଏଦାଆଁ ନା ଞ୍ଜାନି ଦିନା ପାତେକା ତାରିତଲେ ଆସାମାଞ୍ଜୁ ।”

୨୬ ଆମ୍ବାଆସି ଜୀଣା ଆନେସି, ଅଡ଼େ ତାୟୁ ପାତେକା ନା କାମା କିନେସି, ନାନୁ ଏନିକିହଁ ନା ଆଡ଼ା ତାଣାଟି ଅଦିକାରା ବେଟାଆହାମାଲ୍, ଏଲେକିହଁ ଏ ଏଞ୍ଜାଣାକି ଏ ଦେସାତି ଅଦିକାରା ହୀଲ୍ । ୨୭ ଏଞ୍ଜାସି ବାରେ କୁଡ଼ାତି ଲକୁଣି ଲହ ବାଡ଼ଗା ତଲେ ସାଲ୍‌ଞ୍ଜି

କିନେସି ଅଡ଼େ ଇରଆ ଡ଼କାୟାଁ ଲେହେଁ କୁଚୁକୁଚା କିନେସି ।^{୨୮} ଅଡ଼େ ନାନୁ ଏଞ୍ଜାରାକି ଝେୟାଜାରା ହୁକା ଜିକେଏ ହାଁ ।

^{୨୯} “କୁଲମିକାଣି ସୁଦୁଜାଞ୍ଜୁ ଏନାଆଁ ଝେସିମାନେ ଆମ୍ବାଆରାକି କୀର୍କା ମାନୁ ଏଦାଆଁ ଝେଶ୍‌ମାସି ।”

୩

ସାଦି କୁଲମିକି କାରୁ

^୧ “ସାଦି କୁଲମିତି ଦୁଚୁ ତାଣା ରାଚାମ୍, ଆମ୍ବାଆସି ମାହାପୁରୁତି ସାଡ଼ାଗଟା ଜାଞ୍ଜୁୟାଁ ଅଡ଼େ ସାଡ଼ାଗଟା ହୁକାୟାଁ ଆସାମାନେସି ଏଞ୍ଜାସି ଏଲେଇଞ୍ଜି ମାନେସି, ନାନୁ ମୀ କାମା ବାରେ ପୁଞ୍ଜାମାଲ୍ ମୀରୁ ଦରୁ ତାକି ଜାଞ୍ଜୁ ଗାଟାତେରି, ସାମା ସାତା ତଲେ ହାଡ଼ାତେରି ।^୨ ଜାଗ୍ରାତା ଆଦୁ ଅଡ଼େ ମୀ ତାଣା ଏନାୟି ମାନେ ଏ ବାରେ ଡ଼ଗୁନି ନକେଏ ଏଞ୍ଜାଆଁ ବାଡ଼ୟୁ କିଦୁ, ଇଚିହିଁ ନାନୁ ମୀ ବାରେ କାମା ନା ମାହାପୁରୁ ନକିତା ଦହ ହିଲାଆଗାଟାୟି ତଞ୍ଜା ଆହା ହିଲେଏ ।^୩ ☆ଏଦାଆଁତାକି ମୀରୁ ଏନିକିଁ ଜାପାମାଞ୍ଜେରି ଅଡ଼େ ଝେଞ୍ଜାମାଞ୍ଜି ଏଦାଣି ଅଶ୍‌ପାନା ମାନଞ୍ଜି ଆଦୁ ଇଞ୍ଜା ପାପୁଟି ହିୟାଁ ଝେଟ୍‌ଦୁ; ମୀରୁ ଜାଗ୍ରାତା ଆଆଡ଼ିହିଁ ନାନୁ ସରୁଲେହେଁ ମୀ ତାଣା ଖାଲ୍, ଏଦାଣି ଏନିଜିକେଏ ମୀରୁ ପୁଞ୍ଜାଲି ଆଡ଼ଅତେରି ।^୪ ସାମା ସାଦିତା ମୀ ବିତ୍ତା ଏଚରଜାଣା ମାନେରି, ଏଞ୍ଜାରି ତାମି ହିମ୍ବରିକା ମାହିଁ କିହାଁ ହିଲଅରି, ଏଞ୍ଜାରି ଅପ୍‌ନି ହିମ୍ବରିକା ହୁଚାନା ନା ତଲେ ତାକିନେରି, ଏନାଆଁତାକି ଇଚିହିଁ ଏଞ୍ଜାରି ପାଡ଼ା ଆଡ଼ାରି ।^୫ ☆ଆମ୍ବାଆରି ଜାଣା ଆନେରି ଏଞ୍ଜାରି ଏଲେତି ଅପ୍‌ନି ହିମ୍ବରିକା ହୁଚିନେରି, ଅଡ଼େ ନାନୁ ଏଞ୍ଜାରି ଦରୁ ଜାଞ୍ଜୁଗାଟି ପତିଟି ଏଚେଲାଞ୍ଜା ମେକ୍‌ଅଁ, ଇଞ୍ଜା ନାନୁ ନା ଆବା ଅଡ଼େ ତାନି ଦୁଚୁୟାଁ ନକିତା ନା ତଲେତାରି ଇଞ୍ଜିହିଁ ଏଞ୍ଜାରି ଦରୁ ଝେକ୍‌ଇଁ ।”

^୬ “କୁଲମିକାଣି ସୁଦୁଜାଞ୍ଜୁ ଏନାଆଁ ଝେସିମାନେସି ଆମ୍ବାଆରି କୀର୍କା ମାନୁ ଏଦାଆଁ ଝେଶ୍‌ମାସି ।”

ପିଲାଦେଲ୍‌ପିୟା କୁଲମିତାକି କାରୁ

☆ **୩:୩** ୩:୩ ମାତି ୨୪:୪୩,୪୪; ଲୁକ ୧୨:୩୯,୪୦; ଝେ ବଲ୍ଲୁ ୧୭:୧୫ ☆ **୩:୫** ୩:୫ ଝେ ବଲ୍ଲୁ ୨୦:୧୨; ମାତି ୧୦:୩୨; ଲୁକ ୧୨:୮

୭ “ପିଲାଦେଲ୍‌ପିୟା କୁଲମିତି ଦୂତୁ ତାଣା ରାତାମୁ, ଆମ୍ବାଆସି ସୁଦୁଗାଗାସି ଅଡ଼େ ସାତାତାସି ଆମିନିଗାଟାଣି କେୟୁତା ଦାଝୁଦତି କୁଟିକାଡ଼ି ମାନେ, ଏଝାସି ଦାରା ଦେଡିସାରେ ଆମ୍ବାଆସି ସୁଶାଲି ଆଡ଼ଅସି, ଅଡ଼େ ଦାରା ସୁଶିସାରେ ଆମ୍ବାଆସି ଦେଚାଲି ଆଡ଼ଅସି, ି ଏଝାସି ଏଲେଇଞ୍ଜି ମାନେସି ନାନୁ ମୀ କାମା ପୁଞ୍ଜାମାଲ୍, ସିନିକିଦୁ ନାନୁ ମୀ ନକିତା ର ଦାରା ଦେଚାମାଲ୍, ଏଦାଆଁ ଆମ୍ବାଆସି ସୁଶାଲି ଆଡ଼ଅସି, ଇଚିହ୍ ମୀ ବାଡ଼ୟୁ ଡ଼ଣା ମାଟି ଜିକେଏ ନା ଜାପୁନାଣି ମୀରୁ ମାନିଝି ଆହାମାଞ୍ଜେରି, ଇଞ୍ଜାଁ ନା ଦରୁ ଏଚେଲା ପୁଞ୍ଜାହିଲଅମି ଇଞ୍ଜାଁ ଇଞ୍ଜାହିଲଅତେରି । ୯ ମେହ୍‌ଦୁ ଆମ୍ବାଆରି ଜୀହୁଦି ଲକୁ ଆଏ, ସାମା ମିତି ତଲେ ଜୀହୁଦି ଲକୁଡମି ଇଞ୍ଜାଁ ଇଞ୍ଜିମାନେରି ଇଲେଡି ସୟତାନ ଗତିତି ଲକୁଣି ନାନୁ ମୀ କଡାଣା ଜହରା କିଝି କିୟାଲ୍, ଇଞ୍ଜାଁ ନାନୁ ମିଙ୍ଗେ ଜୀଝୁନହ୍ ମାଞ୍ଜାଲ୍ ଇଞ୍ଜାଁ ଏଝାରି ପୁଞ୍ଜାଲି ଆଡ଼ିନେରି । ୧୦ ନା ହୁକୁମି ଲେହେଁ ସାସା ଆସାନା ମାଞ୍ଜେରି, ଇଦାଆଁତାକି ଦାରୁଡିତି ଲକୁଣି ତାୟିପାରି କିହାଲି ବାରେ ଦାରୁଡିତା ଆମିନି ତାୟିପାରି କିନି ଦିନା ଝାନେ, ଏମ୍ବାଟି ନାନୁ ଜିକେଏ ମିଙ୍ଗେ ଗେଲ୍‌ପାଲ୍ । ୧୧ ନାନୁ ତବେ ଝାହିମାଲ୍ ମୀ ଜୀଣାଆଡ଼ି ଟପେରି ଏନିକି ଆମ୍ବାଆସି ମୀଞ୍ଜା ଅୟଅସି ଏଦାଆଁତାକି ମୀ ତାଣା ଏନାୟି ମାନେ ଏଦାଆଁ ତାଟା ତଲେ ଆସାଁ ଡ଼ୟାଦୁ । ୧୨ ଆମ୍ବାଆସି ଜୀଣା ଆନେସି ନାନୁ ଏଝାଣାଲ୍ ନା ମାହାପୁରୁ ଇଲୁଡି ମୁଶାଲେହେଁ କିଲ୍, ଏଝାସି ଏମ୍ବାଟି ପାଙ୍ଗାତା ହାଲଅସି, ନାନୁ ନା ମାହାପୁରୁଡି ଦରୁ ଅଡ଼େ ଲାକପୁରୁଡି ଝାହାମାନି ପୁଝନି ଜିରୁସାଲମ ମା ମାହାପୁରୁଡି ଗାଡ଼ାତ ଦରୁ ଇଞ୍ଜାଁ ନା ପୁଝନି ଦରୁ ତାନି ଲାକ ରାଡ଼ିଲ୍ ।”

୧୩ “କୁଲମିକାଣି ସୁଦୁଜାଝୁ ଏନାଆଁ ଝେସିମାନେସି, ଆମ୍ବାଆରି କୀର୍କା ମାନୁ ଏଦାଆଁ ଝେଶ୍‌ମାସି ।”

ଲାଝୁଦିକିୟା କୁଲମିକି କାବୁ

୧୪ “ଲାଝୁଦିକିୟା କୁଲମିତି ଦୂତୁ ତାଣା ରାତାମୁ, ଆମ୍ବାଆସି ସାତା ଇଞ୍ଜାଁ ନାମୁଗାଗାସି ଅଡ଼େ ସାତା ସାକି ହୀନେସି, ଅଡ଼େ ଆମ୍ବାଆସି ମାହାପୁରୁ ଗାଡ଼ିକିତାଣି ମୂଲୁଏ ଗାଡ଼ିକିତାସି ଏଝାସି ଏଲେଇଞ୍ଜି

☆ ୩:୧୨ ୩:୧୨ ଝେ ବଲ୍ଲ ୨୧:୨

ମାନେସି । ୧୫ ନାନୁ ମୀ କାମା ପୁଞ୍ଜାମାଇଁ, ମୀରୁ ହିଡ଼ଡ଼ି ଆଏ କି ଉସମି ଜିକେଏ ଆଏ, ମୀରୁ ହିଡ଼ଡ଼ି କି ଉସମି ଆହାମାତି ନେହୁଁ ଆଡେମା । ୧୬ ସାମା ମୀରୁ ହିଡ଼ଡ଼ି କି ଉସମି ଆଆନା କାଞ୍ଜିନି ଆହାମାନାକି ନାନୁ ମିଙ୍ଗେ ନା ଗୁଡ଼ିଟି ହୁପାଲି ହାଜିମାଇଁ । ୧୭ ନୀନୁ ଏଲେ ଇଞ୍ଜିମାଞ୍ଜି, ‘ନାନୁ ବାଡ଼କୁ ଗାଟାଡେଏଁ ନାଙ୍ଗେ ହାରେକା ଦନ ମାନେ; ନାଙ୍ଗେ ଏନାୟି ଲଡ଼ା ହିଲେଏ ।’ ସାମା ନୀନୁ କାର୍ମା କାକୁଲି ଗାଟାଡ଼ି ଅଡେ ସାୟେମି ହିଲାଆଗାଟାଡ଼ି, ହାକି ଗାଟାଡ଼ି, କାଣା ଅଡେ ନାଗଡ଼ା ଗାଟାଡ଼ି, ଇଦାଆଁ ପୁଞ୍ଜାହିଲଅତି; ୧୮ ଇଦାଆଁତାକି ନାନୁ ନିଙ୍ଗେ ଇ କାତା ଝେସିମାଞ୍ଜାଇଁ ନୀନୁ ବାଡ଼କୁ ଗାଟାଡ଼ି ଆହାଲିତାକି ହିରୁତା ହୁଡ଼ିତି ବାଂଗାରା ଅଡେ ନୀ ନାଗଡ଼ାଡ଼ି ଲାଜା ଏନିକିହୁଁ ତଞ୍ଜା ଆଏ ଇଦାଆଁତାକି ହୁଚାଲି ଦବ୍‌ଲା ହିମ୍ବରି ଇଞ୍ଜା କାଣକା ମେସାଲି ତାକି କାଣକାଣାଁ ରୁବାକଡ଼ିନାଣି ନା ତାଣାଟି କଡାମୁ । ୧୯ ନାନୁ ଏତେକା ଲକୁଣି ଜୀଞ୍ଜୁ ନଇଁ ଏଞ୍ଜାରାଇଁ ଦାକା ଅଡେ ତଣ୍ଡ ହାଇଁ ଏଦାଣିତାକି ରାହାଁ ଆହାଁ ମନ ଝେଟହା କଡାମୁ । ୨୦ ମେହ୍‌ମୁ ନାନୁ ଦୁଝେରି ତାକିତା ନିତାନା ଦାରା ଝେଟିମାଇଁ ଆମ୍ବାଆସି ନା ଗିୟାଁ ଝେଞ୍ଜାନା ଦାରା ଦେନେସି ଆଡୁଁ ନାନୁ ବିତ୍ରା ହଡ଼ାନା ତାନି ତାଣା ହାଇଁ ଅଡେ ନାନୁ ଏଞ୍ଜାଣିତଲେ ରାନ୍ଦା ତିଇଁ ଅଡେ ଏଞ୍ଜାସି ନା ତଲେ ରାନ୍ଦା ତିନେସି । ୨୧ ନାନୁ ଏନିକିହୁଁ ଜୀଣାଆହାନା ନା ଆବା ତଲେ ସିଂଗାସାଣିତା କୁଗାମାଇଁ ଏଲେକିହୁଁଏ ଆମ୍ବାଆସି ଜୀଣା ଆନେସି ନାନୁ ଏଞ୍ଜାଣାଇଁ ନା ତଲେ ନା ସିଂଗାସାଣିତା କୁଗାଲି ହାଇଁ ।”

୨୨ “ସୁଦୁଜୀଞ୍ଜୁ କୁଲମିକାଣି ଏନାଆଁ ଝେସିମାନେ, ଆମ୍ବାଆରି କୀକା ମାନୁ ଏଦାଆଁ ଝେଣ୍‌ମାସି ।”

୪

ଲାକପୁରୁ ପ୍ରାତାନ

୧ ଏତେଟିଏ ନାନୁ ମେସ୍‌ସେଏଁ, ମେହ୍‌ଦୁ ଲାକପୁରୁଟି ର ଦାରା ଦେପିଆହାମାନେ; ଅଡେ ତୀଡ଼ି ମହୁରି ହାଡ଼ାଲେହେଁ ନା ତଲେ ନକେଏ ଜଳିମାଟାଣି ଝେଞ୍ଜା ମାଟେଏଁ, ଏଦି ଏଲେଇଞ୍ଜାତେ “ଇମ୍ବାଆଁ ନିଙ୍ଗା ଝାମୁ, ଏନାୟି ଇଦାଆଁ ତାୟୁ ଗଟଞ୍ଜି ଆନେ ଏ ବାରେ ନିଙ୍ଗେ

☆ ୩:୧୯ ୩:୧୯ ଏବଂ ୧୭:୭

ନାନୁ ତସ୍ତାଙ୍କୁ ।” ୨ ଏ ଦେବୁଣିଏ ସୁଦୁଜୀଝୁ ନାଙ୍ଗେ ଲକ୍‌ହାତେ, ମେହ୍‌ଦୁ ଲାକପୁରୁ ର ସିଂଗାସାଣି ମାଚେ, ଇଞ୍ଜା ସିଂଗାସାଣି ଲାକ ରଅସି କୁଗାମାନେସି । ୩ କୁଗାମାନାଣି ଖାଣା ହୀରା ଅଡେ ମାଣିକ୍ୟ ଇନି ଦାରାଗାଟି ଖାଲି ଲେହେଁ, ଅଡେ ସିଂଗାସାଣିତି ମରକତ ଇନି ଦାରା ଗାଟି ଖାଲକା ଲେହେଁ ସାରିସୁଟୁ ର ଦାରଣକି ଗୁରଚାମାଚେ । ୪ ଅଡେ ସିଂଗାସାଣି ସାରିସୁଟୁ କଡେ ସାରିଗଟା ସିଂଗାସାଣି ମାନୁ, ଅଡେ ସିଂଗାସାଣିୟା ଲାକ କଡେ ସାରି ଜାଣା ପ୍ରାତିନାଙ୍ଗା କୁଗାମାନେରି, ଏଝାରି ଦବ୍‌ଲା ହିମ୍‌ପରିକା ହୁଚାମାନେରି ଇଞ୍ଜା ଏଝାରି ତାୟ୍‌ତୁ ବାଂଗାରା ଟପେରି । ୫* ସିଂଗାସାଣିଟି ବିଲିବାଲା ମିହ୍‌ନାୟ୍ ଅଡେ ହାଗୁ ଗୁଣ୍‌ନି ହାଡା ହଡେ, ଅଡେ ସିଂଗାସାଣି ନକିତା ହିଚୁଗାଟି ସାଡାଗଟା ଦୀଝିୟା ଡଞ୍ଜିମାରୁ, ଇ ସାଡାଗଟା ହିଚୁ ବନ୍ଦାୟା ମାହାପୁରୁତି ସୁଦୁଜୀଝୁୟା ୬ ସିଂଗାସାଣି ନକିତା ଦାପେଣିଲେହେଁ ର ନେହ୍‌ ସାମ୍‌ଦୁରି ତଞ୍ଜାଆହିମାଚେ, ସିଂଗାସାଣି ସାରିସୁଟୁତି ମାଦିଏ ସାରିଗଟା ଜନ୍ତ ଜିଝେଡିକା, ଏଝାସିକା ନକିତା ଅଡେ ତାୟ୍‌ତା କାଣ୍‌କା ମାରୁ । ୭ ନକିତି ଜନ୍ତ ସିହ୍ କାଃଆନି ଲେହେଁ, ଅଡେ ରୀ ଲମ୍‌ପର ଜନ୍ତ ବାଚା କଡି ଲେହେଁ, ତାନି ଲମ୍‌ପର ଜନ୍ତ ମୁମ୍‌ମୁଣ୍‌ସିତି ମୁମ୍‌ଲେହେଁ, ଅଡେ ସାରି ଲମ୍‌ପର ଜନ୍ତ ଲାକ ଡମ୍‌ମାନି ଲେଡ ଚୁଲେହେଁ ତଞ୍ଜାଆହିମାଚେ । ୮ ବାରେ ଜନ୍ତୟାକି ସ ଗଟା ମାରାୟା ଏ ମାରାୟା ବିତ୍ତା ଅଡେ ପାଙ୍ଗାତା କାଣ୍‌କା ମାନୁ ଏଝି ଲାଆଁ ମାଦେନା ଜମାଆନା ଏଲେଇଞ୍ଜି ମାନୁ ।

“ସୁଦୁ, ସୁଦୁ, ସୁଦୁ, ବାରେ ବାଡ଼ୟୁଗାଟି ମାହାପୁରୁ,
ଆମ୍ବାଆସି ତଲିଏ ମାଚେସି ନୀର୍‌ସ ମାନେସି ଅଡେ କାଚେଲଏ ମାନେସି, ଏ ପ୍ରବୁ ।”

୯ ଜନ୍ତୟା ଏଟିବେଲା ଏ ସିଂଗାସାଣିତା କୁଗାମାନି କାଲାକାଲାତି ଜୀଝୁଗାଟି ମାଣ୍‌ସିଙ୍କି ଗାଝୁରମି ସାମ୍‌ମି ଅଡେ ଜହରା କିନେରି । ୧୦ ଏଟିବେଲା କଡେ ସାରି ଜାଣା ପ୍ରାତିନାଙ୍ଗା ସିଂଗାସାଣିତା କୁଗାମାନି ମାଣ୍‌ସିଙ୍କି ମେଣ୍ଡାକୁତାନା କାଚେଲଏ ନୀତାମାନି ମାଣ୍‌ସିଙ୍କି ଜହରା କିଚେରି, ଇଞ୍ଜା ସିଂଗାସାଣି ନକିତା ତାନି ଟପେରିକା ଇଚାନା ଏଲେଇଚେରି ।

୧୧ ମା ପ୍ରବୁ ଅଡେ ମାହାପୁରୁ ।

* ୪:୫ ୪:୫ ଝେ ବଲ୍ଲୁ ୮:୫; ୧୧:୧୯; ୧୭:୧୮; ଝେ ବଲ୍ଲୁ ୧:୪

ନୀନୁ ଗାଝୁରମି ସାମ୍ବୁନି ଅଡ଼େ ବାଡ଼ୁୟୁ ବେଟାଆହାଲି ଜଗେ
 ଗାଟାତି ।
 ଏନାଆଁତାକି ଇତିହିଁ ନୀନୁ ବାରେ ଗାଡ଼ିକିହା ମାଞ୍ଜି ।
 ଅଡ଼େ ନୀ ଅଣପୁ ତଲେ ବାରେ ଗାଡ଼ି ଆହାମାନୁ, ଅଡ଼େ
 ଜୀଝୁତଲେ ନୀତାମାନୁ ।

୫

ରୁପିନି ପତି ଅଡ଼େ ମେଣ୍ଡା ଡାଲୁ

^୧ ନାନୁ ସିଂଗାସାଣିତା କୁଗାମାନାଣି ଚିଃନି କେୟୁତା ର ପ୍ଲାଃଇ ପତି
 ମେସ୍‌ସେସ୍, ଏଡ଼ି ରିକଞ୍ଜାକି ରାସ୍‌କି ଆହାମାଟେ ଇଞ୍ଜା ସାଡ଼ାଗଟା ସୀଲି
 ଝେପି ଆହାମାଟେ । ^୨ ଅଡ଼େ ନାନୁ ବାଡ଼ୁୟୁ ଗାଟି ର ଲାକପୁରୁତି
 ଦୂତୁଇଁ ମେସ୍‌ସେସ୍, ଏଞ୍ଜାସି କାଜା ଗିୟାତଲେ ଏଲେଇଡେସି,
 ଆମ୍ବାଆସି ଇ ସୀଲି ହୁକହାନା ପତିତି ଦେଟାଲି ପାଡ଼ାଆନେସି ।
^୩ ସାମା ପତିତି ଦେଟାଲି, ଏମ୍ବାଆଁ ଏନାୟି ରାସ୍‌କି ଆହାମାନେ,
 ସିନିକିହାଲି ଲାକପୁରୁ, ଦାରତିତା ଅଡ଼େ ତାଡ଼େପୁରୁତା ଆମ୍ବାଆସି
 ସାସା କିଆଡେସି । ^୪ ଏ ପତିତି ଦେଟାଲି କି ଏଦାଆଁ ସିନିକିହାଲି
 ଆମ୍ବାଆସି ସାସା କିଆଲିଏ ନାନୁ ହାରେକା ଡାଡେସ୍ । ^୫ ଏମ୍ବାଟିଏ
 ପ୍ରାତିନାଙ୍ଗା ବିତ୍ରାଟି ରଅସି ନାଙ୍ଗେ ସାସା ହୀହାନା ଏଲେଇଞ୍ଜାଡେସି,
 “ଡାଆନି, ସିନିକିମୁ ଜୀହୁଦା ଗତିତି ଦାଝୁଦ କୁଡାତି ସିହିଁ ଜୀଣା
 ଆହାମାନେସି; ଏଞ୍ଜାସି ଇ ପତିତି ସାଡ଼ାଗଟା ସୀଲି ଦେଟାଲି ଅଡ଼େ ଏ
 ରୁପିତି ପତି ଏକହାଲି ପାଡ଼ା ଆହାମାନେସି ।”

^୬ ଏରେଟିଏ ନାନୁ ସିନିକିଡେସ୍ ସିଂଗାସାଣି, ଅଡ଼େ ପ୍ରାତିନାଙ୍ଗା
 ମାଦିଏ ସାରିଗଟା ଜନ୍ତୁ ତଲେ ର ମେଣ୍ଡା ଡାଲୁ ନିଟାମାନାଣି ମେସ୍‌ସେସ୍,
 ଏ ମେଣ୍ଡା ଡାଲୁ ପାୟୁଞ୍ଜି ଆଡ଼ି ଲେହେଁ ତଞ୍ଜାଆହିମାଟେ, ଏଦାନାକି
 ସାଡ଼ାଗଟା କମ୍‌କା ଅଡ଼େ ସାଡ଼ାଗଟା କାଶକା ମାରୁ, ଏ କାଶକା
 ଦାରତିତି ବାରେଞ୍ଜାକି ପାଶୁଞ୍ଜି ଆହାମାଟି ମାହାପୁରୁତି ସାଡ଼ାଗଟା
 ସୁଦୁଜୀଝୁୟାଁ । ^୭ ମେଣ୍ଡା ଡାଲୁ ସିଂଗାସାଣିତା କୁଗାମାନାଣି ତାଗେ
 ହାଜାନା ଏଞ୍ଜାଣି ଚିଃନି କେୟୁଟି ଏ ରୁପିତି ପତି ଅଡ଼େସି । ^୮ ଏ ପତି
 ଅହାଲିଏ ସାରିଗଟା ଜନ୍ତୁ ଅଡ଼େ କଡ଼େ ସାରି ଜାଣା ପ୍ରାତିନାଙ୍ଗା ଏ
 ମେଣ୍ଡା ଡାଲୁ ନକିତା ମୁନୁ କୁଡାହାଁ ଜହରା କିଡେରି, ଏ ବାରେଜାଣା
 ତାକି ର ର ସେରଙ୍ଗି ଅଡ଼େ ମାହାପୁରୁ ଲକୁ ପ୍ରାଡାନାତି ଦୁପା ଦୁପାଣି

ନେଞ୍ଜାମାନି ର .ବାଂଗାରା ଗିନା ମାତେ । ୯ ଏଞ୍ଜାରି ର ପୁଃନି ପାତୁ
ପାଡ଼ିମାତେରି;

“ନୀନୁ ଏ ରୁପିତି ପତି ଅହାଲି ଅଡ଼େ ଏମ୍ବାତି ସାଲି ଦେଚାଲି ପାଡ଼ା
ଆନାତି,

ନୀନୁ ପାୟ୍‌ଝିଆହାମାଟି, ନୀ ନେତେରିଟି ବାରେ ଗଟି, ବାରେ
ହାଡ଼ା, ଦେସା,

ଅଡ଼େ ବାରେ କୁଡ଼ାତି ଲକୁଇଁ ମାହାପୁରୁ ତାକି କଡ଼ାମାଞ୍ଜି,

୧୦ ✱ନୀନୁ ଏଞ୍ଜାରାଇଁ ରାଜାୟାଁ କୁଡ଼ା ଅଡ଼େ ମାହାପୁରୁ ସେବା କିୟାଲି
ପୂଜେରାଜା କିହାମାଞ୍ଜି ।

ଏଞ୍ଜାରି ଦାର୍‌ତିତି ସାଲୁଝି କିନେରି ।”

୧୧ ଏମ୍ବାଟିଏ ନାନୁ ସିନିକିତେସାଁ, ସିଂଗାସାଣି, ଜନ୍ତୁୟାଁ ଅଡ଼େ
ପ୍ରାଚିନାଜା ସାରିସୁରୁ ହାରେକା ଦୁତୁୟାଁତି ହାଡ଼ା ଝେଚେସାଁ, ଏଝି
ମାଣା ମାଣା ଅଡ଼େ ଲାକେ ଲାକେ ଜାଣା ନିଚାମାତୁ । ୧୨ ଏଝି କାଜା
ଗିୟାତଲେ ପାଡ଼ିମାତୁ;

“ପାୟ୍‌ଝି ଆହାମାନି ମେଣ୍ଡା ତାଲୁଦେଁ, କାଜାପାଣା, ଦନ, ବୁଦି, ବପୁ,
ସାମ୍ବୁ_ମି, ଗାଞ୍ଜୁରମି,

ଜହରା ବେଗାଆହାଲି ପାଡ଼ାଆନେସି ।”

୧୩ ଅଡ଼େ ନାନୁ ଲାକପୁରୁ, ଦାର୍‌ତି, ତାଡ଼େପୁରୁ ଅଡ଼େ ସାମ୍ବୁରିତା
ମାନି ବାରେ ଜୀଞ୍ଜୁ ଗାଟାଇ ଇଞ୍ଜା ଦାର୍‌ତିତା ମାନି ବାରେ ଜୀଞ୍ଜୁ ଗାଟାଇ
ପାତୁ ପାଡ଼ିମାନାଣି ଝେଚେସାଁ । ଏଝି ପାଡ଼ିମାତୁ;

“ସିଂଗାସାଣିତା କୁଗାମାନି ମାଣ୍‌ସିଇଁ ଇଞ୍ଜା ତାନି ମେଣ୍ଡା ତାଲୁଇଁ ଜହରା
କିଦୁ;

ତାନି ସାମ୍ବୁ_ମି, ଗାଞ୍ଜୁରମି ଅଡ଼େ ବାଡ଼ୁରୁ କାଲାକାଲାତାୟି ।”

୧୪ ଏଚେଟିଏ ସାରିଗଟା ଜନ୍ତୁ ପାଲି ଆସାନା ଏଲେଇରୁ, “ଆମେନ୍”
ଅଡ଼େ ପ୍ରାଚିନାଜା ମୁନୁ କୁଡ଼ାହାଁ ଜହରା କିତେରି ।



ସାତା ଗଟା ସାଲିୟାଁ

^୧ ଅଡ଼େ ନାନୁ ମେଣ୍ଡା ଡାଲୁଇଁ ସାଡ଼ାଗଟା ସାଲିୟାଁ ବିତ୍ରାଟି ର ଲମ୍ବର ସାଲି ଦେତାଣି ମେସ୍ତେସ୍, ଅଡ଼େ ସାରିଗଟା ଜନ୍ତୁ ବିତ୍ରାଟି ର ଜନ୍ତୁ ହାଗୁ ଗୁଣ୍ଡିନି ହାଡ଼ାତଲେ ହାଟିମାଚାଣି ଝେଚେସ୍ “ଝାମ୍ବୁ !”
^୨ ଏମ୍ବାଟିଏ ନାନୁ ସିନିକିତେସ୍ ଅଡ଼େ ର ଦବ୍‌ଲା ଗଡ଼ା ଇଞ୍ଜା ତାନି ଲାକ ହଟାମାଚାଣି କେୟୁତା ର ଆମ୍ବୁ ଆସାମାଚେସି, ଅଡ଼େ ଏଞ୍ଜାଣାକି ର ଚପେରି ହାପକିଆଡ଼େ, ଅଡ଼େ ଏଞ୍ଜାସି ଜୀଣା ଆହାଁ ଜୀଣା ଆୟାଲି ହଟାହାଚେସି ।

^୩ ମେଣ୍ଡା ଡାଲୁ ଏଟିବେଲା ରୀ ଲମ୍ବର ସାଲି ଦେତେସି, ଏଟିବେଲା ଅଡ଼େ ରୀ ଲମ୍ବର ଜନ୍ତୁ ଏଲେଇଚାଣି ଝେଚେସ୍ “ଝାମ୍ବୁ,”
^୪ ଏମ୍ବାଟିଏ ଅଡ଼େ ର ଗଡ଼ା ହଟା ଝାଡ଼େ, ଏଡ଼ି ନେତେରି ଝାଣାଗାଚାୟି; ଲକୁ ଏନିକି ତାମ୍ବୁ ତାମ୍ବୁ ପ୍ରାୟୁଞ୍ଜି ଆନେରି, ଏଦାଆଁତାକି ଦାରତିଟି ହିଡ଼ଡ଼ି ହେକ କିହାଲି ତାନି ଲାକ ହଟାମାଚାଣାକି ବାଡ଼ୟୁ ହାପକିଆଡ଼େ ଅଡ଼େ ଏଞ୍ଜାଣାକି କାଜା କାଣ୍ଡା ହାପକିଆଡ଼େ ।

^୫ ମେଣ୍ଡା ଡାଲୁ ଏଟିବେଲା ତାନି ଲମ୍ବର ସାଲି ଦେତେସି, ଏଟିବେଲା ତାନି ଲମ୍ବର ଜନ୍ତୁ ଏଲେଇଞ୍ଜିମାନାଣି ଝେଚେସ୍, “ଝାହାଁ ସିନିକିମ୍ବୁ” ଏମ୍ବାଟିଏ ନାନୁ ସିନିକିତେସ୍, ମେହ୍‌ଦୁ ର କାଡ଼ିନି ଗଡ଼ା; ଅଡ଼େ ଏମ୍ବାଆଁ ହଟାମାଚାଣି କେୟୁତା ର କେଜି ତୁକ୍‌ନାୟି ମାଚେ ।
^୬ ଅଡ଼େ ନାନୁ, ସାରିଗଟା ଜନ୍ତୁଟି ଗୁଡ଼ିଟି ହଡ଼ି ଲେହେଡ଼ି ର ହାଡ଼ା ଝେଚେସ୍; “ର ଟାକା ତାକି ର କେଜି ଗହଁ ଅଡ଼େ ତାନି କେଜି କାଞ୍ଜିଆ ଜନାୟାଁ ମେଡ଼ା ଆନୁ ସାମା ମୀରୁ ଜୀତ ମାର୍‌ନୁଡ଼ି ନିୟୁଁ ଅଡ଼େ ଅଞ୍ଜୁରି ରାସା ନସ୍ତୁ କିଆଡୁ ।”

^୭ ମେଣ୍ଡା ଡାଲୁ ଏଟିବେଲା ସାରି ଲମ୍ବର ସାଲି ଦେତେସି, ଇଞ୍ଜା ନାନୁ ସାରି ଲମ୍ବର ଜନ୍ତୁ ଏଲେ ଇଞ୍ଜିମାଚାଣି ଝେଚେସ୍, “ଝାମ୍ବୁ !”
^୮ ଏମ୍ବାଟିଏ ନାନୁ ସିନିକିତେସ୍ ଦାରମ୍ବୁ ଝାଣାଗାଟି ଗଡ଼ା, ତାନି ଲାକ ହଟାମାଚାଣି ଦରୁ ହାକି, ଏଞ୍ଜାଣି କେଚ କେଚ ଦାରତି ହାଜିମାଚେ, ଏଞ୍ଜାରାକି ଦାରତିଟି ସାରି ବାଗା ବିତ୍ରା ର ବାଗା ମୁହେଁ କାଣ୍ଡା, ହାକି, ରଟା ଅଡ଼େ ଜାଡ଼ାତି ଜନ୍ତୁ ଜିଝେଡ଼ିକା ତଲେ ପାୟାଲି ବାଡ଼ୟୁ ହାପକିଆଡ଼େ ।

^୯ ମେଣ୍ଡା ଡାଲୁ ଏଟିବେଲା ପାସା ଲମ୍ବର ସାଲି ଦେତେସି, ଏଟିବେଲା ଆମିନି ଲକୁ ମାହାପୁରୁତି ବଲ୍ଲୁ ତାକି ଅଡ଼େ ଏଞ୍ଜାରାକି ହାପକି ଆହାମାନି ସାକି ତାକି ହାହାମାଚେରି, ଏଞ୍ଜାରି ଜୀଝୁୟାଁ ନାନୁ

ପୂଜାପିଣ୍ଡା ଡଢ ମେସ୍ତେର୍ସ । ୧୦ ଏଞ୍ଜାରି କାଜା ଗିୟାଁତଲେ ହାଟିହିଁ ଏଲେ ଇଞ୍ଜିମାରେରି, “ସୁଦୁ ଅଡ଼େ ସାତା ପ୍ରବୁ, ନାନୁ ଏଚରଦିନା ପାତେକା ଦାର୍ତିତି ଲକୁଇଁ ନୀହାଁୟି କିଆନା ମାଙ୍ଗେ ପାୟାଲି ତାକି ଏଞ୍ଜାରାକି ତଣ୍ଡ ହୀଆନା ପିହିଦି ?” ୧୧ ଏଚେଟିଏ ଏ ବାରେଜାଣା ତାକି ଦବ୍ଲା ହିମ୍ବରକା ହୀପକିଆଡ଼େ, ଇଞ୍ଜା ଏଞ୍ଜାରି ତଲେତି ତାୟିୟା ସେବା କିନାରି ଏଚରଜାଣା ପାୟୁଞ୍ଜି ଆନି କାତା ପାୟୁଞ୍ଜି ଆଆପାତେକା ଏଞ୍ଜାରାକି ଅଡ଼େ ଏଚରଦିନା ଜମାଲି ଝେସ୍ପିଆଡ଼େ ।

୧୨ ☆ମେଣ୍ଡା ତାଲୁ ସ ଲମ୍ବର ସାଲି ଦେତିମାଚାଟି ନାନୁ ମେସ୍ତେର୍ସ; ଦେବୁଣିଏ ଆଜିହପେତି ବୁମି ଖୀଡ଼ିତେ । ଝେଡ଼ା କାଡ଼ିନି ଖାଣା ହିମ୍ବର ଲେହେଁ ଆଡ଼େ, ଅଡ଼େ ଲେଞ୍ଜୁ ନେତେରି ଖାଣା ଆଡ଼େ । ୧୩ କାଜା ଗାଲି ଏନିକିଁ ମାର୍ନୁଇଁ ଖୀଟ୍‌ହିସାରେ ହିଇଲି ତୟା ପାଡ଼େୟିକା ତରଗିନି ଲେହେଁ ହାଗୁଲକତି ହୁକାୟାଁ ଦାର୍ତିତା ତରଗା ହାରୁ । ୧୪ ହାଗୁପାକା ତଲୁ ପତି ରୁପ୍‌ଞ୍ଜି ଆଡ଼ି ଲେହେଁ ରୁପ୍‌ଞ୍ଜିଆହାଁ ମେଣ୍ଡାଙ୍ଗାହାଚେ । ଅଡ଼େ ହରକା ଇଞ୍ଜା ସାମ୍‌ଦୁରି ବିତ୍ରାମାନି ଇଚି ଇଚି ଦେସାୟାଁ ତାମି ଟାୟୁଟି ଗୁଟା ଆହାହାରୁ । ୧୫ ଅଡ଼େ ଦାର୍ତିତି ରାଜାୟାଁ, ସାଲ୍‌ଞ୍ଜି କିନାରି, ଜୁଜୁକିନି କାଜାରି, ଦନ ଗାଟାରି, ବାଡ଼ୟୁ ଗାଟାରି, ହଲିୟାଙ୍ଗା ଅଡ଼େ ହଲିୟାଙ୍ଗା ଆଆତାରି ଏଞ୍ଜାରି ବାରେଜାଣା ପାଞ୍ଜୁତା ଇଞ୍ଜା ହରକାତି କାଜା ଖାଲ୍‌କା ପାରଡ଼ା ଡଢ ହାଜାନା ତୁଗୁତେରି । ୧୬ ☆ଅଡ଼େ ଏଞ୍ଜାରି ହରକା ଇଞ୍ଜା ଖାଲ୍‌କାଣି ହାଟିହିଁ ଏଲେଇଚେରି, “ମା ମୁହେଁ ତରଗାନା ସିଂଗାସାଣିତା କୁଗାମାନାଣି ତାଣାଟି ଅଡ଼େ ମେଣ୍ଡା ତାଲୁ କପାଟି ! ମାଙ୍ଗେ ଡକୁହାମୁ । ୧୭ ଇଚିହିଁ ଏଞ୍ଜାରାକି ଆଜିହପେତି କପାତି ଦିନା ଏଦାତେୟିଏ, ଇଞ୍ଜା ଏମ୍‌ଆଁ ଆମ୍‌ଆସି ନିଚାଲି ଆଡ଼ିନେସି ?”



ଇସ୍ତାୟେଲତି ୧୪୪,୦୦୦ ଲକୁ

୧ ଏଚେଟିଏ ନାନୁ ଦାର୍ତିତି ସାରି କନତା ସାରିଗଟା ଦୁତୁୟାଁଇଁ ନିଚାମାନାଣି ମେସ୍ତେର୍ସ, ଅଡ଼େ ଦାର୍ତିତି ସାରିଖାକିତି ଗାଲି

☆ ୭:୧୨ ୭:୧୨ ଝେ ବଲ୍ଲ ୧୧:୧୩; ୧୭:୧୮; ମାତି ୨୪:୨୯; ମାର୍କ ୧୩:୨୪,୨୫; ଲୁକ ୨୧:୨୫
 ☆ ୭:୧୭ ୭:୧୭ ଲୁକ ୨୩:୩୦

ଆଜ୍ଞାମାନେରି, ଏଚେଟିଏ ଦାରତି ସାମ୍ବୁରି ଅଡେ ଆମିନି ମାରନ୍ତୁ ମୁହେଁ ଗାଲି ଖାଆପେଖା ଇଞ୍ଜି ଗାଲିତି ଆଜ୍ଞାମାନେରି ।^୨ ଅଡେ ନାନୁ ର ଦୂତୁଇଁ ଝେଡା ହପୁଖାକିଟି ହଚାଖାଡାଣି ମେସ୍ତେଏଁ, ଏଦାନି କେୟୁଡା ଜୀଝୁତି ମାହାପୁରୁତି ବୁଟୁ ମୁଦ୍ରା ମାଚେ, ଏ ଦୂତୁ ଦାରତି ଅଡେ ସାମ୍ବୁରି ନସ୍ତ କିହାଲିତାକି ସାରିଗଟା ଦୂତୁକି ଅଦିକାରା ହାହାମାଚେ, ଏଦି କାଜା ଗିୟାତଲେ ହାଟାନା ଏଲେଇଚେଟି,^୩ “ମାମ୍ବୁ ମାହାପୁରୁତି ସେବା କିନାରି ମୁଞ୍ଚୁଡା ବୁଟୁ ମୁଦ୍ରା ନାବଗାଆ ପାତେକା ମୀରୁ ଦାରତି, ସାମ୍ବୁରି, କି ମାରକାଣି ନସ୍ତ କିଆଦୁ ।”^୪ ଏଚେଟିଏ ମୁଞ୍ଚୁଡା ବୁଟୁ ମୁଦ୍ରା ନାବଗାନା କଡିତାରି ୧୪୪,୦୦୦ ଲକୁ ମାଚେରି ଇଞ୍ଜି ନାନୁ ଝେଚେଏଁ ଏଞ୍ଜାରି ଇସ୍ତାୟେଲତି ବାର କୁଡାତି ଲକୁ ମାଚେରି ।^୫ ଜୀହୁଦା କୁଡାଟି ବାର ମାଣା ଲକୁଇଁ ବୁଟୁ ମୁଦ୍ରା କିହାମାନେସି, ରୁବେନ୍ କୁଡାଟି ବାର ମାଣା, ଗାଦ୍ କୁଡାଟି ବାର ମାଣା,^୬ ଆସେର୍ କୁଡାଟି ବାର ମାଣା, ନପ୍ତାଲି କୁଡାଟି ବାର ମାଣା, ମନସି କୁଡାଟି ବାର ମାଣା,^୭ ସିମିୟନ କୁଡାଟି ବାର ମାଣା, ଲେବି କୁଡାଟି ବାର ମାଣା, ଇସାକାର କୁଡାଟି ବାର ମାଣା,^୮ ସୁବୁଲୁନ୍ କୁଡାଟି ବାର ମାଣା, ଜସେପ କୁଡାଟି ବାର ମାଣା, ବିନ୍ୟାମିନ୍ କୁଡାଟି ବାର ମାଣା ଲକୁଇଁ ବୁଟୁ ମୁଦ୍ରା କିହାମାନେସି ।

ଗାଡି ମାନ୍ଦା ଲକୁ

^୯ ଏଚେଟିଏ ନାନୁ ସିନିକିଡେଏଁ ମେହଦୁ ବାରେ ଜାଡି, ବାରେ କୁଡା, ବାରେ ଦେସା, ବାରେ ହାଡା, ଏଜିକିହାଲି ଆଡାଆଗାଟି ର ମାନ୍ଦା ଲକୁ ଅଜିତି ଦବଲା ହିମ୍ବରିକା ହୁଚାନା କାଜୁରି ମାଟାୟା କେୟୁଡା ଆସାନା ସିଂଗାସାଣି ଅଡେ ମେଣ୍ଡା ତାଲୁ ନକିତା ନିଚାମାନେରି ।^{୧୦} ଏଞ୍ଜାରି କାଜା ଗିୟାତଲେ ଏଲେଇଚେଟି, “ଞ୍ଜାରଇ ସିଂଗାସାଣିତା କୁଗାମାନି ମାହାପୁରୁ ଅଡେ ମେଣ୍ଡା ତାଲୁ ମାଙ୍ଗେ ଗେଲ୍ପାନାସି ।”^{୧୧} ସିଂଗାସାଣି, ପ୍ରାଚିନାଜ୍ଞା ଅଡେ ବାରେ ସାରିଗଟା ଜନ୍ତୁ ସାରିସୁଟୁ ଲାକପୁରୁତି ଦୂତୁୟା ନିଚାମାନେରି, ଅଡେ ସିଂଗାସାଣି ନକିତା ମୁନ୍ତୁ କୁଡାନା ମାହାପୁରୁଇଁ ଜହରା କିହାନା,^{୧୨} ଏଲେଇଚେଟି, “ଆମେନ୍ ନେହାୟି, ଗାଝୁରମି, ବୁଦି, ଜହରା, ସାମ୍ବୁମି, ଅଦିକାରା ଅଡେ ବାଡୁୟୁ, କାଲାକାଲା ତାକି ମା ମାହାପୁରୁଖାୟି ! ଆମେନ୍ ।”

୧୩ ଅଡ଼େ ପ୍ରାଚିନାଙ୍ଗା ବିଦ୍ରାଟି ରଅସି ନାଙ୍ଗେ ଝେଞ୍ଜାଡେସି, “ଦବ୍‌ଲା ହିମ୍ବରିକା ହୁଚାମାନି ଇ ଲକ୍ଷୁ ଆମ୍ବାଆରି ? ଅଡ଼େ ଏଞ୍ଜାରି ଏମ୍ବିଟି ଝାହାମାନେରି ?” ୧୪ ✨ନାନୁ ଏଞ୍ଜାଣାଇଁ ଏଲେଇଚେର୍ଏ, “ଏ ନା ପ୍ରବୁ ନାନୁଏ ଏଦାଆଁ ପୁଞ୍ଜାମାଞ୍ଜି” ଏମ୍ବାଟିଏ ଏଞ୍ଜାସି ଏଲେଇଞ୍ଜାଡେସି, “ଇଞ୍ଜାରି ଆଜିହ୍‌ପେଡି ସାସ୍ତି ଅରହାନା ହଚା ଝାହାମାନେରି, ଇଞ୍ଜା ଫେଣ୍ଡା ତାଲୁଡି ନେଡେରି ତଲେ ଏଞ୍ଜାରି ତାମି ହିମ୍ବରିକା ରାଚାନା ଦବ୍‌ଲା କିହାମାନେରି । ୧୫ ଏଦାଆଁତାକି ଏଞ୍ଜାରି ମାହାପୁରୁ ଇଲୁଡି ସିଂଗାସାଣି ନକିତା ନିଚାନା ଲାଆଁ ମାଦେନା ଏଞ୍ଜାଣି ଜହରା କିନେରି, ଇଞ୍ଜା ସିଂଗାସାଣିତା କୁଗାମାନସି ଏଞ୍ଜାରାକି ବାସାଟାୟୁ ହାନେସି । ୧୬ ଏଞ୍ଜାରାକି ଏଚେଲାଞ୍ଜା ହାକି କି ଏସକି ଆଏ; ଇଞ୍ଜା କାରା କି ଏନି ଝେହ୍‌ନାୟି ତୀଗାଲି ଆଡେଏ । ୧୭ ଇଚିହ୍‌ ସିଂଗାସାଣି ମାଦିତି ଫେଣ୍ଡା ତାଲୁ ଏଞ୍ଜାରି ଫେଣ୍ଡା ଗଡ଼ୁ ଆନେସି । ଅଡ଼େ ଜୀଞ୍ଜୁହାନି ଏୟୁ ହଚିମାନି ତାଣା ଏଞ୍ଜାରାଇଁ ତାକିକିହା ଅନେସି, ଅଡ଼େ ମାହାପୁରୁ ଏଞ୍ଜାରି କାନୁଡି ବାରେ କାଣ୍ଡୁ ଚୁଡ଼ଜାଡୁହନେସି ।”

୮

ସାଡ଼ା ଲମ୍ବର ସାଲି

୧ ଫେଣ୍ଡା ତାଲୁ ଏଚିବେଲା ସାଡ଼ା ଲମ୍ବର ସାଲି ଦେଡି ଦେବୁଣିଏ ଲାକପୁରୁ ଆଦା ଗଂଟା ପାଡେକା ସାପିଆଡେ । ୨ ଏମ୍ବାଟିଏ ନାନୁ ମାହାପୁରୁ ନକିତା ନିଚାମାନି ସାଡ଼ା ଜାଣା ଦୁଡୁୟାଁଇଁ ଫେସ୍ତେର୍ଏ, ଏଞ୍ଜାରାକି ସାଡ଼ାଗଟା ତୀଡ଼ି ମହୁରି ହାପକି ଆଡୁ ।

୩ ଏମ୍ବାଟିଏ ଅଡ଼େ ର ଦୁଡୁ ଝାହାଁ ପିଣ୍ଡା ନକିତା ନିଡେ, ଏଦାନି କେୟୁଡା ବାଂଗାରା ଦୁପ୍‌ଣି ସାଡ଼ଞ୍ଜା ମାଚେ, ଅଡ଼େ ସିଂଗାସାଣି ନକିତି ବାଂଗାରା ପୂଜାପିଣ୍ଡା ଲାକ ବାରେ ମାହାପୁରୁ ଲକ୍ଷୁଡି ପ୍ରାଡାନା ତଲେ ହେର୍‌ପାଲି ତାକି ହାଚେରକା ଦୁପ୍‌ଣି ହାପକିଆଡେ । ୪ ଏମ୍ବାଟିଏ ଲାକପୁରୁ ଦୁଡୁ କେୟୁଡି ଦୁପ୍‌ଣି ବୟ୍‌ ମାହାପୁରୁ ଲକ୍ଷୁଡି ପ୍ରାଡାନା ତଲେ ଆଣ୍ଡାନା ମାହାପୁରୁ ନକିତା ଏଗାଡେ । ୫ ତାୟୁ ଏ ଦୁଡୁ ଦୁପ୍‌ଣି ସାଡ଼ଞ୍ଜାତା ପୂଜା ପିଣ୍ଡାଟି ହିଚୁଡଲେ ନେଞ୍ଜିକିହାନା ଦାରଡି ଲାକ

✨ ୭:୧୪ ୭:୧୪ ମାଡି ୨୪:୨୧; ମାର୍କ ୧୩:୧୯

ଡ଼ାଞ୍ଜିତେ, ଏମ୍ବାଟି ହାଗୁ ଗୁଣ୍ଡତେ ବିଜା ରିନି ହାଡ଼ା ଝେଞ୍ଜିତେ ଇଞ୍ଜା ବୁଫି
ଝୀଡ଼ିତେ ।

ତୀତ୍ରି ଉକିନାୟି

୬ ଏଚିବେଲ୍ଲା ସାଡ଼ା ଜାଣା ତୀତ୍ରି ଆସାମାନି ଦୂତୁୟାଁ ସାଡ଼ା ଜାଣା
ତୀତ୍ରି ଉକାଲି ତିୟାରା ଆଡ଼େରି ।

୭ ର ଲମ୍ବର ଦୂତୁ ତାନି ତୀତ୍ରି ଉକିତେ ଏଚେଟିଏ ନେତେରି ତଲେ
ଆଜିୟାଁ ଅଡ଼େ ହିରୁ ଆଣ୍ଡ଼ି ଆହାଁ ଦାରତି ଲାକ ରିତୁ, ଇଞ୍ଜା ବାରେ
ମାର୍‌ନୁ ମାଡ଼ା, ହିଇଲି ଜାଡ଼ା ତଲେ ଦାରତିତି ତାନି ବାଗାଟି ର ବାଗା
ବାରେ ଝେହା ହାଚେ ।

୮ ଏଚେଟିଏ ରୀ ଲମ୍ବର ଦୂତୁ ତାନି ତୀତ୍ରି ଉକିନି ଦେବୁଣିଏ
ଡ଼ାଞ୍ଜିମାନି ର କାଜା ହରୁ ଲେହେତାୟି ସାମ୍‌ଦୁରି ଲାକ ରୀତେ ଇଞ୍ଜା
ସାମ୍‌ଦୁରିତି ଏୟୁ ତାନି ବାଗାଟି ର ବାଗା ନେତେରି ଆହାହାରୁ ।
୯ ସାମ୍‌ଦୁରିତା ମାନି ତାନି ବାଗାଟି ର ବାଗା ଜୀଝୁ ଗାଟାଈ ହାହାହାରୁ,
ଅଡ଼େ ସାମ୍‌ଦୁରିତା ମାନି ଜାଜାୟାଁ ତାନି ବାଗାଟି ର ବାଗା ଜାଜାୟାଁ
ବିଡ଼ହାହାରୁ ।

୧୦ ତାନି ଲମ୍ବର ଦୂତୁ ତୀତ୍ରି ଉକିତେସି, ଇଞ୍ଜା ଦେବୁଣିଏ ହିରୁ
ବନ୍ଦାଲେହେଁ ଡ଼ାଞ୍ଜିମାନି ର କାଜା ହୁକା ହାଗୁଟି ତାନି ବାଗା କାଡ଼ା
ଅଡ଼େ ଉସାଣାଁ ରୀତେ । ୧୧ ଏ ହୁକାତି ଦରୁ “କାମ୍‌ଲି” ଏଚେଟିଏ
ତାନି ବାଗାଟିଏ ର ବାଗା ଏୟୁ କାମ୍‌ଲି ଆତୁ, ଇଞ୍ଜା ହାରେକା ଲକୁ
ଏୟୁ ଗସାନା ହାଡ଼େରି, ଇଚିହଁ ଏଝି କାମ୍‌ଲି କିଝି ଆହାମାରୁ ।

୧୨ ସାରି ଲମ୍ବର ଦୂତୁ ତୀତ୍ରି ଉକିତେସି ଇଞ୍ଜା ଝେଡ଼ା, ଲେଞ୍ଜୁ,
ହୁକାୟାଁତି ବାରେ ତାନି ବାଗାଟି ର ବାଗା ନସ୍ତୁ ଆତୁ, ଇଞ୍ଜା ତାନି
ବାଗାଟି ର ବାଗା ଉଜେଡ଼ି ଉଣା ଆଡ଼େ, ଇଞ୍ଜା ଲାଆଁୟାଁ ମାଦେନା
ତାନି ବାଗାଟି ର ବାଗା ଉଜେଡ଼ି ଉଣା ଆଡ଼େ ।

୧୩ ତାୟୁ ନାନୁ ମେସ୍‌ସେଏଁ, ହାଗୁତି ମାଦି ଉମ୍‌ମାନି ର ଲେଡ଼ କାଜା
ହାଡ଼ାତଲେ ଏଲେଇଞ୍ଜିମାଟାଣି ଝେଚେଏଁ, ଆହା ! ଦାରତିତା ବାସା
ଆହାମାନି ଲକୁ ଆଜିହ୍‌ପେତି ତଣ୍ଡ ବେଟାଆନାରି, ଇଚିହଁ ଅଡ଼େ
ତାନି ଜାଣା ଦୂତୁୟାଁ ତୀତ୍ରି ଉକାଲି ହାଜିମାନେରି ।



୧ ଏତେଟିଏ ପାସା ଲମ୍ବର ଦୂତୁ ତୀତ୍ରି ଉକିତେସି ନାନୁ ର ହୁକା ହାଗୁଟି ଦାରତିତା ରିତାଣି ମେସ୍ତେସି, ଏଝାଣାକି ତାଡ଼େପୁରୁତି କୁଟିକାଡ଼ି ହୀପକି ଆହାମାତେ । ୨ ଏଝାସି ଏ ତାଡ଼େପୁରୁ ଗାଡ଼ୁଲୁ ଦେତାଲିଏ ଏମ୍ପାଟି କାଜା ହଲୁତା ହନିଲେହେଁ ବୟ୍ ହଟାଝାତେ, ଇଞ୍ଜା ଏ ହିରୁ ଗାଡ଼ୁଲୁତି ବୟ୍ ତାକି ଝେଡ଼ା ଇଞ୍ଜା ହାଗୁ ଆନ୍ଦେରି ଆଡେ । ୩ ଏ ବୟ୍ ଟି ଗପ୍‌ଏରିକା ହଟାନା ଦାରତିତା ଝାଡୁ, ଏଝାସିକାକି ଦାରତିତି କାଚାକୁପିତା ମାନି ବୀସାତି ବାଡ଼ୁଲୁ ହୀପକିଆଡେ । ୪ ଏଝି ଦାରତିତି ମାରକା ଗଚା ଜାଡ଼ାତି ନସ୍ତ କିଆନା, ଆମ୍ପାଆରି ମୁଞ୍ଜୁତା ମାହାପୁରୁତି ବୁଟୁ ମୁଦ୍ରା ହିଲାଆତେ ଏଝାରାଲ୍ କସ୍ତ ହୀହାଲି ଏଲେଇଣସି ଆଡେ । ୫ ଏଝାରାଲ୍ ପାୟାଆନା ପାସା ଲେଞ୍ଜୁ ତାକି କସ୍ତ ହୀହାଲି ଗପ୍‌ଏରିକାକି ଅଦିକାରା ହୀପକିଆଡେ, କାଚାକୁପି କାଚିତେ ଇଚିସାରେ ଏନିକ୍ ବୀସା ଆନ୍ଦେ ଏ କସ୍ତ ଏଲେତାୟି । ୬ ଏଚିବେଲା ଲକୁ ହାହାଲି ଅଣ୍ପିନେରି ସାମା ହାଅରି, ଏଝାରି ହାହାଲି ଅଣ୍ପିନେରି, ସାମା ହାକି ଏଝାରି ତାଣାଟି ହଟାଡୁହନେ ।

୭ ଏ ଗପ୍‌ଏରିକା ଜୁଜୁତା ହାଜାଲି ତିୟାରା ଆହାମାନି ଗଡ଼ାୟାଁ ଲେହେଁ ତଞ୍ଜାଆହିମାଡୁ, ଏଝାସିକା ତାର୍କାଣା ବାଂଗାରା ଚପେରି ଲେହେଁ ପିଡ଼ରି ଆହାମାତେ, ଏଝାସିକା ମୁମ୍ପୁମାଣସି ମୁମ୍ପୁଲେହେଁ ମାତେ । ୮ ଇୟାସିକା ତାୟ୍ ବୁଣାୟାଁ ଲେହେଁ ଏଝାସିକା ବାଣାୟାଁ, ସିହ୍ କ୍ଳାଠନିତି ପାଲକା ଲେହେଁତି ତାମି ପାଲକା ମାଡୁ । ୯ ତାମି ବକତା ଲହ୍ ପାଟା ଲେହେଁତି ପାଟା, ତାମି ମାରାୟାଁ ଝାଡ଼ିମାନି ହାଡ଼ା ଜୁଜୁ ତାକି ଗଡ଼ାୟାଁ ରାତାୟାଁଣି ରେଜା ଅହିମାନି ଲେହେଁତି ହାଡ଼ା । ୧୦ କାଚାକୁପିତି ଲେଂଗୁଣି ଇଞ୍ଜା ବୀସା ସୂଜା ଲେହେଁ ଏଝାସିକାକି ଲେଂଗୁଣି ଅଡେ ବୀସା ସୂଜା ମାତେ, ପାସା ଲେଞ୍ଜୁ ତାକି ମାଣସିୟାଁଲ୍ ସାସି ହିୟାଲି ଏଝାସିକା ଲେଂଗୁଣିକାଣା ବାଡ଼ୁଲୁ ବେଟାଆହାମାଡୁ । ୧୧ ଏଝାସିକା ମୁହେଁ ର ରାଜା ସାଲଞ୍ଜି କିହିମାନେସି, ଏଝାସି ତାଡ଼େପୁରୁ ଗାଡ଼ୁଲୁତି ଦୂତୁ, ଏଦାନି ଦରୁ ଏବ୍ରି ହାଡ଼ାତଲେ ଆବାଦନ୍ ଅଡେ ଗିକ୍ ହାଡ଼ାତଲେ ଅପ୍ଲିୟନ୍ ଇଚିସାରେ “ନାସା କିନାଇ ।”

୧୨ ତଲିତି ଆଜିହପେତି ତଣ୍ଡ ଉଣା ଆଡେ ଅଡେ ଜଡ଼େକା ଆଜିହପେତି ତଣ୍ଡାୟାଁ ଝାହିମାଡୁ ।

୧୩ ସ ଲମ୍ବର ଦୂତ ତୀବ୍ର ଉକିତେସି, ଇଞ୍ଜା ନାନୁ ମାହାପୁରୁ ନକିତି ବାଂଗାରା ପୂଜା ପିଣ୍ଡାତି ସାରିଗଟା କମ୍‌କା ବିଦ୍ରାଟି ର ହାଡ଼ା ଝେଚେଏ । ୧୪ ଏଦି ତୀବ୍ର ଆସାମାନି ସ ଲମ୍ବର ଦୂତୁଇଁ ଏଲେଇଚେ, “ପରାଡ଼ କାଜା କାତାତା ଦସପି ଆହାମାନି ସାରି ଜାଣା ଦୂତୁୟାଁଇଁ ପିସପି କିମ୍ପୁ ।” ୧୫ ଏମ୍ବାଟିଏ ମାଣ୍ଡସିୟାଁଇଁ ତାନି ବାଗାଟି ର ବାଗା ଲକୁଇଁ ପାୟାଲି ତାକି ତିୟାରା ଆହାମାନି ଆମିନି ସାରି ଜାଣା ଦୂତୁୟାଁଇଁ ଏ ଦିନା, ଲେଞ୍ଜୁ, ଅଡ଼େ ବାସୀ କିଝି ଆହାମାଚେ ଏଝାରାଇଁ ପିସପି କିଝିଆଡ଼େ । ୧୬ ଗଡ଼ାୟାଁ ଲାକ କୁଗାନା ଜୁଜୁ କିନାରି ରୀ କଟି ମାଚେରି ନାନୁ ଝେଚେଏ । ୧୭ ଅଡ଼େ ନାନୁ ଗଡ଼ା ଇଞ୍ଜା ଏମ୍ବାଆଁ ହଚାମାନାରାଇଁ ମେସ୍‌ସେଏ, ଏଝାରି ବକ ପାଟା ହିରୁ ଅଡ଼େ ନୀଲି, ହୀଙ୍ଗେରି ଝାଣା; ଗଡ଼ାୟାଁତି ତାକା ସିହଁକ୍‌ଟାଠନି ତାକା ଲେହେଁ, ଇଞ୍ଜା ଏଝାସିକା ଗୁଡିଟି ହିରୁ, ବୟଁ, ଅଡ଼େ ଗାନ୍ଦାଗୁଣ୍ଡା ହଚିମାଚେ । ୧୮ ଏଝାସିକା ଗୁଡିଟି ହିରୁ, ବୟଁ, ଅଡ଼େ ଗାନ୍ଦାଗୁଣ୍ଡା ଲେହେଁ ଇ ତାନିଗଟା ଡ଼ଣ୍ଡାୟାଁ ହତୁ, ଇ ଡ଼ଣ୍ଡାୟାଁତି ମାଣ୍ଡସିୟାଁ ତାନି ବାଗାଟି ର ବାଗା ପାୟାଝି ଆଡ଼େରି । ୧୯ ଏନାଆଁତାକି ଇଚିହଁ ଗଡ଼ାୟାଁତି ବାଡ଼ୁୟାଁ ତାନି ଗୁଡି ଅଡ଼େ ଲେଂଗୁଣିତା ମାଚେ, ଇଚିହଁ ଏଝାସିକା ଲେଂଗୁଣିକା ତାୟଁ ଗୁାଟି ରାତୁ ଲେହେଁ ମାଚାକି ତାନି ଲେଂଗୁଣିକା ତଲେ ଲକୁଣି ନସ୍ତୁ କିହିମାତୁ ।

୨୦ ଆମିନି ଲକୁ ଇ କସ୍ତଲେ ପାୟାଝି ଆହା ହିଲାଆଡ଼େରି, ଏଝାରି ତାନି କେନ୍ଦୁତଲେ କିତି କାମାତାକି ମନ୍ ଝେଚ୍‌ପି କିଆଡ଼େରି, ଇଚିହଁ ବୂତୁୟାଁଣି ପୂଜା, ଅଡ଼େ ମେସାଲି, ଝେଞ୍ଜାଲି, ତାକାଲି ଆଡ଼ାଆଗାଟି ବାଂଗାରା, ଝେଣ୍ଡି, ପିତାଡ଼ା, ଝାଲକା ଅଡ଼େ ମାରକା ତଲେ କେପିତି ପେଶକା ବମାୟାଁଣି ପୂଜା କିହାଲି ପିହୁଆଡ଼େରି । ୨୧ ଅଡ଼େ ଏଝାରି ଲକୁଣି ପାୟିନାୟି, ଗୁଣି ଗାରଡ଼ି, ଦାରିକାମା, ଅଡ଼େ ସରୁ କାମା କିନିତାଣାଟି ମନ୍ ଝେଚ୍‌ଆଡ଼େରି ।

୧୦

ଲାକପୁରୁତି ଦୂତୁ ଅଡ଼େ ରୁପିତି ଉଣା ପତି

୧ ଏଚେଟିଏ ନାନୁ ର ବାଡ଼ୁୟାଁଗାଟି ଦୂତୁଇଁ ଲାକପୁରୁଟି ଚେଟା ଝାହିମାଚାଣି ମେସ୍‌ସେଏ, ଏଦାନି ସାରିସୁଟୁ ଦୂୟା ଇଞ୍ଜା ତାନି ତାୟଁ

ଲୀକ ଦାରଣକି ଅଡ଼େ ତାନି ମୁମ୍ବୁ ଚୁଝଡ଼ା ଲେହେଁ ଅଡ଼େ ତାନି କଡ଼ାୟାଁ ହିରୁ ମୁଣ୍ଡାଲେହେଁ ତଞ୍ଜାଆହିମାରୁ; ^୨ ତାନି କେୟୁତା ଦେପି ଆହାମାନି ର ଉଣା ତଲ୍ଲୁ ପତି, ଏଦି ତାନି ଚିଃନି କଡ଼ା ସାମ୍ବୁରିତା ଅଡ଼େ ଚେବୁ କଡ଼ା ଦାର୍ତ୍ତିତା ଇଟାମାତେ; ^୩ ସିହ୍‌କ୍‌ୱାଠନି ଗାଜ୍‌ନିଲେହେଁ କାଜା ହାଡ଼ାତଲେ ହାଡ଼ିତେ, ଏଦି ହାଟାଲିଏ ଏଲେକିହିଁ ଏ ସାଡ଼ାଗଟା ହାଗୁ ଗୁଣ୍ଡନାଲ ତାନି ହାଡ଼ା ଝେଜ୍‌ଜି କିତୁ । ^୪ ଏ ସାଡ଼ାଗଟା ହାଗୁ ଗୁଣ୍ଡନାଲ ଝେସାଲିଏ ନାନୁ ରାଡ଼ିକ୍‌ଇଞ୍ଜି ତିୟାରା ଆଡ଼େଏଁ, ଏଚେଟିଏ ନା ତାକି ହାଗୁଟି ଇ ହାଡ଼ା ଝେଚେଏଁ, “ଏ ସାଡ଼ାଗଟା ହାଗୁ ଗୁଣ୍ଡନିତାଣାଟି ଏନାଆଁ ଝେଞ୍ଜାମାଞ୍ଜି ଏଦାଆଁ ରାଟାଆନା ଡ଼କୁହା ଇଟାମୁ ।”

^୫ ଏଚେଟିଏ ଆମିନି ଦୁତୁକ୍‌ ସାମ୍ବୁରି ଅଡ଼େ ଦାର୍ତ୍ତି ଲୀକ ନିଟାମାଟାଣି ନାନୁ ମେସାମାଚେଏଁ, ଏଞ୍ଜାସି ତାନି ଚିଃନି କେୟୁ ଲୀକପୁରୁ ଝାକି ଦାସାନା ^୬ ଆମ୍ବାଆସି ଲୀକପୁରୁ, ଦାର୍ତ୍ତି, ସାମ୍ବୁରି, ଅଡ଼େ ଏମ୍ବାଆଁ ମାନାଣି ବାରେ ଗାଡ଼ି କିହାମାନେସି, ଏ କାଲେଏ ତାକି ନୀଡ଼ାମାନାଣି ଦରୁଟି ପାରମାଣା କିହାନା ଏଲେଇଚେସି, “ଅଡ଼େ ଝେଡ଼ା ଆଏଦେ” ^୭ ଏଚିବେଲାତା ସାଡ଼ା ଲମ୍ବର ଦୁତୁ ତୀତ୍ରି ଉକିନେ, ମାହାପୁରୁ ଅଣ୍‌ପୁତି ବଲ୍ଲୁ ଝେକ୍‌ନାରି ଅଡ଼େ ତାନି ସେବା କିନାରାକ୍‌ ନେହିଁ କାରୁ ଝେସାମାଚେସି, ଏଚିବେଲା ମାହାପୁରୁ ତାନି ଡ଼ଗୁମାନି ଅଣ୍‌ପୁ ପୁରା କିନେସି ।

୮ ଇଞ୍ଜା ନାନୁ ଲୀକପୁରୁଟି ଆମିନି ହାଡ଼ା ଝେଞ୍ଜା ମାଚେଏଁ, ଅଡ଼େ ଝେଣ୍ଡେ ନା ତାକି ଏଲେଇଞ୍ଜି ଝେଜ୍‌ଜିତେ, “ହାଲୀମୁ, ସାମ୍ବୁରି ଅଡ଼େ ଦାର୍ତ୍ତି ଲୀକ ନିଟାମାନି ଦୁତୁ କେୟୁତା ଆମିନି ତଲ୍ଲୁ ପତି ଦେପିଆହାମାନେ ଏଦାଆଁ ଅମୁ ।” ^୯ ଏଚେଟିଏ ନାନୁ ଏ ଦୁତୁ ତାଗେ ହାଜାହାଁ ଏ ଉଣା ତଲ୍ଲୁ ପତିତି ରାସ୍ତେଏଁ, ଏଞ୍ଜାସି ନାଙ୍ଗେ ଏଲେଇଞ୍ଜାତେସି, “ଇଦାଆଁ ଅହାଁ ତିନାମୁ: ଇଦି ନୀ ବାଣ୍ଡିତି କାମ୍ବେଲି କିୟାନେ ସାମା ନୀ ଗୁଡ଼ି ତାକି କିରୟାଁ ଲେହେଁ ଆନେ ।” ^{୧୦} ଏଚେଟିଏ ନାନୁ ଦୁତୁ କେୟୁଟି ଏ ଉଣା ତଲ୍ଲୁ ପତି ଅହାଁ ତିଚେଏଁ, ଏଦି ନା ଗୁଡ଼ି ତାକି କିରୟାଁ ଲେହେଁ ଆଡ଼େ, ସାମା ଏଦାଆଁ ତିତି ତାୟୁ ନା ବାଣ୍ଡି କାମ୍ବେଲି ଆହାହାଚେ ।

^{୧୧} ଏଚେଟିଏ ନାଙ୍ଗେ ଏଲେଇଞ୍ଜି ଝେସ୍ତାତେସି ହାରେକା ଗଟି, କୁଡ଼ା,

ହାଡ଼ା ଗାଟାରି ଅଡ଼େ ରାଜାୟାଁ କପାଟି ଡାୟୁ ଏନାୟି ଗଟଞ୍ଜି ଆନେ ଏଦାଆଁ ନାନୁ ଅଡ଼େ ଝେଣ୍ଠେ ଝେହ୍‌ନାୟି ମାନେ ।

୧୧

ରିଆରି ସାକି ହୀନାରି

୧ ଏଚେଟିଏ ନାଙ୍ଗେ ଲାଡ଼ିନି ଲେହେଁତି ର ବାଡ଼ଗା ହୀପ୍‌କିଆଡେ, ରଅସି ନାଙ୍ଗେ ଏଲେଇଞ୍ଜାଡେସି, “ହାଲାମ୍, ମାହାପୁରୁ ଦେଝୁଡ଼ି, ପୂଜାପିଣ୍ଡା ଲାଟାମ୍ ଅଡ଼େ ଆମ୍ବାଆରି ଏମ୍ବାଆଁ ପ୍ରାଡାନା କିନେରି ଏଞ୍ଜାରାଇଁ ଏଜିକିମ୍ । ୨ *ସାମା ଦେଝୁଡ଼ି ପାଙ୍ଗାତି ଆଂଗେଣିତି ପିହ୍‌ମ୍ ଏଦାଆଁ ଲାଟାଆନି, ଇତିହ୍ ଏଡ଼ି ଜୀହୁଦିଆଆଡାରାକି ହୀପ୍‌କି ଆହାମାନେ, ଏଞ୍ଜାରି ରୀ କଡ଼ି ରୀ ଲେଞ୍ଜୁ ପାଡେକା ମାହାପୁରୁ ସୁଦୁ ଗାଡ଼ାତି କଡାତଲେ ଓସାନା ଦୂଡ଼ି କିନେରି । ୩ ଅଡ଼େ ନାନୁ ନା ରୀ ସାକିୟାଁଇଁ ପାଣ୍ଡିଇଁ ଏଞ୍ଜାରି ବାସ୍ତାୟାଁ ପରହାନା ୧,୨୭୦ ଦିନା ପାଡେକା ମାହାପୁରୁ ଅଣ୍‌ପୁଡ଼ି ବଲ୍ଲୁ ଝେକ୍‌ନେରି ।”

୪ ଏଞ୍ଜାରି ଦାରୁଡ଼ିତି ପୁରୁତି ନକିଡା ନିଚାମାନି ରୀ ଜୀତ ମାରକା ଅଡ଼େ ରୀ ଦୀଞ୍ଜି ସଡ଼ାୟାଁ ଲେହେଁଡାରି । ୫ ଆମ୍ବାଆସି ଏଞ୍ଜାରାଇଁ ନସ୍ତୁ କିହାଲି ଅଣ୍‌ପିନେସି, ଆତିହ୍ ଏଞ୍ଜାରି ଗୁଡ଼ିଟି ହିରୁ ହଡ଼ାହାଁ ଏଞ୍ଜାରି ସାଡୁୟାଁଇଁ ନାସାକିନେ, ଆମ୍ବାଆସି ଏଞ୍ଜାରାଇଁ ନସ୍ତୁ କିହାଲି ଅଣ୍‌ପିତିହ୍, ଏଞ୍ଜାସି ନାସା ଆନେସି । ୬ ଏଞ୍ଜାରି ମାହାପୁରୁ ବଲ୍ଲୁ ଝେକ୍‌ନାଟି ଏନିକ୍ ପିୟୁ ଆଏ ଏଦାଆଁଡାକି ହାଗୁଡ଼ି ସୁଣ୍ଡାଲି ଅଦିକାରା ହୀପ୍‌କି ଆହାମାନେ, ଏଚର ଦେବା ଏଞ୍ଜାରି ମନ ଆନେ ଏଚର ଦେବା ଏଞ୍ଜାରି ଏୟୁଣି ନେଡେରି ମ୍ବୁପ୍‌ହାଲି ଅଡ଼େ ଦାରୁଡ଼ିତି ଏନି ଇଟି ଏଲେଡି ମରଡ଼ି ତଲେ ଡଣ୍ଡୁ ହାହାଲି ଏଞ୍ଜାରାକି ଅଦିକାରା ମାନେ ।

୭ *ଏଞ୍ଜାରି ସାକି ହୀହାଲି ରାଡ଼ି ଡାୟୁ ଡାଡ଼େପୁରୁ ଗାଡ଼ୁୟୁଟି ର ଜନ୍ତୁ ହଡ଼ାଞ୍ଜାହାନା, ଏଞ୍ଜାରିତଲେ ଜୁଜୁ କିନେ । ୮ ଏମ୍ବାତି ଏମିନି କାଜା ଗାଡ଼ା ସୁଦୁଜୀଞ୍ଜୁ ତଲେ ସଦମ ଅଡ଼େ ମିସର ଇଞ୍ଜି ଇନେରି, ଏମିନିତାଣା ତାମି ପ୍ରବୁ ଜିକେଏ ପାସିଡା ହାହାମାଡେସି, ଏ କାଜା ଗାଡ଼ାତି ଆଂଗେଣିତା ଏଞ୍ଜାରି ମାଡ଼ହାୟାଁ ଡ଼ୟିନ୍ତୁ । ୯ ଅଡ଼େ ବାରେ

☆ ୧୧:୨ ୧୧:୨ ଲୁକ ୨୧:୨୪ ☆ ୧୧:୭ ୧୧:୭ ଝେ ବଲ୍ଲୁ ୧୩:୫-୭; ୧୭:୮

ଦେସା ଗତି, ହାଡ଼ା, ଇଞ୍ଜା କୁଲୁତି ଲକୁ ତାନିଦିନା ଆଦା ପାତେକା ଏଝାରି ମାଡ଼ହାୟାଁଇଁ ମେହନେରି ଅଡ଼େ ଏ ମାଡ଼ହାୟାଁଇଁ ମୁସାଲି ହେଲ ହାଅରି । ୧୦ ଏଚେଟିଏ ଦାରତିତା ବାସା ଆହାମାନାରି ଏଝାରି ହାଡ଼ି କାରୁ ଝେଞ୍ଜାନା ତିଞ୍ଜି ଉଣ୍ଡିହିଁ ରାହାଁ କିନେରି, ଅଡ଼େ ରଅସି ରଅଶାକି ରାହାଁତଲେ ବେଟୁ ହାପକି ଆନେରି, ଇଚିହିଁ ଇ ରୀ ମାହାପୁରୁ ଅଣ୍ପୁତି ବଲ୍ଲୁ ଝେହନାରି ଦାରତିତି ଲକୁଣି କସ୍ତ ହାହିମାଚେରି । ୧୧ ତାନିଦିନା ଆଦା ତାୟୁ ମାହାପୁରୁ ତାଶାଟି ଜାହୁତି ଗାଲି ଝାହାଁ ଏଝାରି ଆଜ୍ଞାତା ହଚେ, ଏଚେଟିଏ ଏଝାରି କଡ଼ାଣି ବାଡ଼ୟୁ କିହାନା ନିଚେରି, ଅଡ଼େ ଆମ୍ବାଆରି ଇ କାମାତି ମେସ୍ତେରି ଏଝାରି ଆଜାହାଚେରି । ୧୨ ଏଚେଟିଏ ଏଝାରି ଲାକପୁରୁଟି ର କାଜା ହାଡ଼ାତଲେ ଏ ରିଆରାକି ଏଲେ ଇଞ୍ଜିମାଚାଣି ଝେଚେରି, “ଇମ୍ବାଆଁ ଝାଡୁ” ଏଚେଟିଏ ଏଝାରି ତାମି ସାଡୁୟାଁ ଏଝାରାଇଁ ମେସ୍ପଦିଏ ଦୁହା ତଲେ ଲାକପୁରୁ ହାଚେରି । ୧୩ ☆ଏ ଦେରୁଣିଏ ବୁମି ହାଚେକା ଝାଡ଼ିତେ ଅଡ଼େ ଗାଡ଼ାତି ଦସ ବାଗାଟି ର ବାଗା ନାସା ଆଡ଼େ, ଅଡ଼େ ୭,୦୦୦ ଲକୁ ହାଡ଼େରି, ଇଞ୍ଜା ଏଚେକା ଲକୁ ନୀତାମାଚେରି ଆଜିତାକି ଲାକପୁରୁତି ମାହାପୁରୁଇଁ ଗାଝୁରମି କିଚେରି ।

୧୪ ରୀ ଲମ୍ବର ଆଜିହପେତି ତଣ୍ଡ ରାଡ଼େ, ସାମା ତାନି ଲମ୍ବର ଆଜିହପେତି ତଣ୍ଡ ତବେ ଝାହିମାନେ ।

ସାତା ଲମ୍ବର ତୀତ୍ରି ମହୁରି

୧୫ ତାୟୁ ସାତା ଲମ୍ବର ଦୁତୁ ତୀତ୍ରି ଉକିଚେସି ଇଞ୍ଜା ଲାକପୁରୁ କାଜା ହାଡ଼ାତଲେ ଇ ହାଡ଼ା ଝେଜିତେ, “ମା ପ୍ରବୁ ଅଡ଼େ ଏଝାଣି ମସିହା ଦାରତିତି ସାଲଝି କିନି ଅଦିକାରା ନୀଏଁ ତାନି କେୟୁତା ଅହାମାନେସି, ଏଝାସି କାଲେଏ ତାକି ରାଜି କିନେସି ।” ୧୬ ଏଚେଟିଏ ମାହାପୁରୁ ନକିତା ଜାହା ଜାହାରା ସିଂଗାସାଣିତା କୁଗାମାନି କଡ଼େ ସାରି ଜାଣା ପ୍ରାତିନାଜା ମୁନୁ କୁତାହାଁ ମାହାପୁରୁଇଁ ଜହରା କିହାଁ, ୧୭ ଏଲେଇଚେରି,

“ପ୍ରବୁ, ବାରେକିହାଁ ବାଡ଼ୟୁଗାଟି ମାହାପୁରୁ, ନୀନୁ ନୀଏଁ ଅଡ଼େ ତଲିତାତି,

ମାମ୍ବୁ ନୁିଙ୍ଗେ ଜହରା କିହିମାଞ୍ଜାନମି;

ଏନାଆଁତାକି ଇତିହାସ ନୀନୁ ନୀ କାଜା ବାଡ଼ୟୁ ତଲେ ସାଲଝି
କିୟାଲି ଅଦିକାରା ନୀଞ୍ଜୁଟିଏ ଅହାମାଞ୍ଜି ।

୧୮ ଜୀହୁଦିଆଆତାରି କାରବି ଆହାମାଚେରି,
ସାମା ନୀଏଁ ନୀ କପା ଆନି ଦିନା ଝାଡେ,
ଇଞ୍ଜା ହାଡାରି ନୀଏଁ ନୀହାଁୟି କିଝିଆନେରି,
ଇଞ୍ଜା ନୀ ହଲିୟାଙ୍ଗା ମାହାପୁରୁ ଅଶ୍‌ପୁତି ବଲ୍ଲୁ ଝେହ୍‌ନାରି,
ମାହାପୁରୁ ଲକୁ, ଅଡେ ନୀ ଦରୁତି ଆଜିନି କାଜାରି ଇଚାରି
ବାରେ ଲକୁ ଦାନା ବେଟାଆନେରି,
ଅଡେ ଆମ୍ବାଆରି ଦାରୁତିତି ନାସା କିନେରି ଏଝାରି ଜିକେଏ ନାସା
ଆନେରି ।”

୧୯ ☆ଏଚେଟିଏ ଲାକପୁରୁ ମାନି ମାହାପୁରୁତି ଇଲୁତି ଦାରା
ଦେପିଆଡେ, ଅଡେ ତାନି ଇଲୁତା ମାନି ରାଜିମାନାତି ପେଡ଼ା
ତଞ୍ଜାଆଡେ, ଅଡେ ବିଲିବାଲା ମ୍ବୁହ୍‌ନାୟି, ହାରେକା ଗିୟାଁ, ହାଗୁ
ଗୁଣ୍‌ନି ହାଡ଼ା, ଇଞ୍ଜା ବୁମି ଝାଡିତେ ଅଡେ ହାରେକା ଆଜିୟାଁ ରିତୁ ।

୧୨

ଆୟାତି ଅଡେ ରାତୁ

୧ ତାୟୁ କାବାଆନି ଲେହେଁତି ସିନା ହାଗୁତା ତଞ୍ଜାଆଡେ, ର ଆୟାତି
ଲେଞ୍ଜୁ ଲାକ ନିଚାମାଚେ ଅଡେ ଝେଡ଼ାତି ଉଜେଡି ପରହାମାଚେ ।
ଏଦାଣି ତାୟୁଁ ତୁ ବାରଗଟା ହୁକାୟାଁଗାଟି ଟପେରି ମାଚେ । ୨ ଏଡି
ପୁରା ମାସା ଆହାନା ଜାନି କିନି ବେଲାତା ଲୁଞ୍ଜିନି ବୀସା ତାକି କସୁ
ବେଟାଆହିମାଚେ ।

୩ ଏଚିବେଲା ହାଗୁ ଲାକ କାବାଆନି ର ସିନା ତଞ୍ଜାଆଡେ, ଏମ୍ବାଆଁ
ପାରୁ ଝାଣାଗାଟି କାଜା ରାତୁ ଏ ରାତୁକି ସାଡାଗଟା ତାର୍‌କା, ଇଞ୍ଜା
ଦସଗଟା କମ୍‌କା, ଅଡେ ତାର୍‌କା ଲାକ ସାଡାଗଟା ଟପେରିକା ମାତୁ
। ୪ ତାନି ଲେଂଗୁଣି ତଲେ ହାଗୁତି ତାନି ବାଗା ହୁକାୟାଁଣି ଦାରୁତି
ଲାକ ମେଡ଼ହେ, ଇଞ୍ଜା ଏ ରାତୁ, ଜାନି କିନି ଦେବୁଣିଏ ଇୟାନି
ତାଲୁତି ଗୁସାଲି ଏଦାନି ନକିତା ନିତେ । ୫ ଆମ୍ବାଆସି ବାରେ କୁଡ଼ାତି

☆ ୧୧:୧୯ ୧୧:୧୯ ଝେ ବଲ୍ଲୁ ୮:୫; ୧୭:୧୮; ଝେ ବଲ୍ଲୁ ୧୭:୨୧

ଲକୁଣି ଲହ ବାଡ଼ଗା ତଲେ ସାଲୁଝି କିନେସି ଇଲେତି ର କକାଣି ତାଲୁଇଁ ଏ ଇୟା ଜାନ କିତେ, ଅଡ଼େ କକାଣି ତାଲୁଇଁ ମାହାପୁରୁ ଇଞ୍ଜା ତାନି ସିଂଗାସାଣି ନକିତା ପେରହା ଅଝିଆଡ଼େ । ୭ ଅଡ଼େ ଏ ଇୟା ଲକୁ ହିଲାଆ ବାଟାତା ହଟେ, ଏମ୍ବାଆଁ ୧,୨୭୦ ଦିନା ପାତେକା ପହିକିଝି ଆୟାଲି ମାହାପୁରୁ ତାଣାଟି ଏମ୍ବାଆଁ ଏଦାନାକି ର ଟାୟୁ କେପି ଆହାମାଟେ ।

୭ ✧ଏମ୍ବାଟିଏ ଲାକପୁରୁ ଜୁଜୁ ଆଡ଼େ, ମିକାୟେଲ ଅଡ଼େ ତାନି ଦୂତୁୟାଁ ଏ ରାରୁ ତଲେ ଜୁଜୁ କିତୁ, ଏଚେଟିଏ ଏ ରାରୁ ଅଡ଼େ ତାନି ଦୂତୁୟାଁ ଜିକେଏ ଜୁଜୁ କିତୁ । ୮ ସାମା ରାରୁ ଇଞ୍ଜା ତାନି ଦୂତୁୟାଁ ଜୀଣା ଆହାଲି ଆଡ଼ାଆତୁ, ଇଞ୍ଜା ଲାକପୁରୁ ଏଝି ଟାୟୁ ବେଟାଆଆତୁ । ୯ ✧ଏଚିବେଲା ଦାରତିତି ନାଡ଼ିକିନି ପଲୁଆ ପେନୁ ଇଞ୍ଜା ସୟତାନ ଦରୁଟି ଝେକ୍‌ତି କାଜା ରାରୁ ଏ ପ୍ଲାଃଇ ନାଗା, ଏଦି ତାନି ଦୂତୁୟାଁ ତଲେ ଦାରତିତା ମେଡ଼ପି ଆଡ଼େ ।

୧୦ ଏଚେଟିଏ ଲାକପୁରୁଟି ଏଲେଇଞ୍ଜି ର କାଜା ହାଡ଼ା ଝେଚେଏଁ, ନୀଏଁ ମାହାପୁରୁ ତାଣାଟି ଗେଲପିନାୟି ଏଗାଝାଡ଼େ, ତାନି ରାଜି ଅଡ଼େ ବାଡ଼ୟୁ ଇଞ୍ଜା କ୍ରୀସ୍ତତି ଅଦିକାରା ଝାହାମାନେ, ଇଚିହଁ ଆମିନି ସାତୁ ମା ତାୟି ତାଜିସ୍ତା କପାଟି ନିଜ୍ଞାନା ଲାଆଁ ମାଦେନା ମାହାପୁରୁ ନକିତା ଦାଝା କିହିମାଟେ, ଏଦି ଲାକପୁରୁଟି ଦାରତିତା ମେଡ଼ପି ଆହାମାନେ । ୧୧ ଏଝାରି ମେଣ୍ଡା ତାଲୁତି ନେତେରି ତଲେ ଅଡ଼େ ଝେକ୍‌ହାମାନି ସାତା କାତାତଲେ ଜୀଣା ଆହାମାନେରି ଇଞ୍ଜା ଏଝାରି ହାହାଲିତାକି ଜିକେଏ ତାନି ଜୀଝୁଇଁ ଜୀଝୁ ନହାଁ ହିଲାଆତେରି । ୧୨ ଏଦାଆଁତାକି ଏ ଲାକପୁରୁ ଅଡ଼େ ଏମ୍ବାଆଁ ବାସା ଆହାମାନାତେରି ରାହାଁ ଆଦୁ, ସାମା ଦାରତି ଅଡ଼େ ସାମଦୁରି ମୀରୁ ଡଣ୍ଡ ବେଟା ଆନାତେରି ଏନାଆଁତାକି ଇଚିହଁ ତାନି ବେଲା ହାରେକା ଡଣ୍ଡା ମାନେ ଇଞ୍ଜା ପୁଞ୍ଜାନା ପଲୁଆ ପେନୁ ସୟତାନ ହାରେକା କପାତଲେ ମୀ ତାଣା ରେଟା ଝାହାମାନେ ।

୧୩ ରାରୁ ଜାହାରାଇଁ ଦାରତିତା ମେଡ଼ପି ଆହାମାନାଣି ମେସାନା ଏ କକାଣି ତାଲୁଇଁ ଜାନ କିତି ଇୟାନି ଜେଚ ଜେଚ ପେରହା ଅଡ଼େ । ୧୪ ଏଚେଟିଏ ଏ ଇୟା ରାରୁ ଗୁଡିଟି ଏନିକଁ ଗେଲପିଆହାଁ

✧ ୧୨:୭ ୧୨:୭ ଜୀହୁଦା ୧:୯ ✧ ୧୨:୯ ୧୨:୯ ଲୁକ ୧୦:୧୮

ତାନି ବାର୍ଯ୍ୟା ସ ଲେଞ୍ଜୁ ପାତେକା ପହିକିଝି ଆନେ, ଏଦାଆଁତାକି ଲକୁ ହିଲାଆ ବାଗତି ତାନି ଟାୟୁତା ଉମ୍ବାହାଜାଲି ଲେଡ଼ତୁ ରୀ ମାରାୟା ହୀପକି ଆତୁ । ୧୫ ଏଚେଟିଏ ଏ ଇୟାନି ଅଝି କିୟାଲି ରାରୁ ତାନି ଗୁତିଟି ର କାଜା କାତା ଏୟୁ ହପ୍ତହେ । ୧୬ ସାମା ଏ ଇୟାନି ସାୟେମି କିହାଲି ଦାରତି ତାନି ଗୁତିଟି ଦେଚାନା ରାରୁ ଗୁତିଟି ହଡ଼ି କାତା ଏୟୁଣି ଗୁସ୍ତେ । ୧୭ ଏଚେଟିଏ ରାରୁ ଏ ଇୟାନି ହାରେକା କପା ଆହାଁ ତାନି କୁଡ଼ାତାରି ଏଚେକା ଲକୁ ମାହାପୁରୁତି ହୁକୁମି ମାନଝି ଆହାଁ ଜୀସୁତି କାତା ଝେସିମାନେରି, ଏଝାରିତଲେ ଜୁଜୁ କିହାଲି ହାଚେ । ୧୮ ଇଞ୍ଜାଁ ରାରୁ ସାମ୍ପୁରି ଗାରୁତି ବାଃଲିତା ନିତେ ।

୧୩

ରୀ ଜନ୍ତୟାଁ

୧ ✨ଏଚେଟିଏ ନାନୁ ସାମ୍ପୁରି ମାଦିଟି ହଚାଝାହିମାନି ର ଜନ୍ତ ମେସ୍ତେସ୍, ଏଦାନାକି ଦସଗଟା କମ୍‌କା ଅଡ଼େ ସାଡ଼ାଗଟା ତାର୍‌କା, ତାନି କମ୍‌କାଶା ଦସଗଟା ଟପେରିକା ଇଞ୍ଜାଁ ତାର୍‌କା ଲାକ ମାହାପୁରୁ ନିନ୍ଦାକିନି ର ର ଦରକା ମାରୁ । ୨ ଏ ଜନ୍ତ ତାରିରେଙ୍ଗଣା କ୍ଳାଠନି ଲେହେଁ ତଞ୍ଜାଆହିମାଚେ, ତାନି କତାୟାଁ ଅଃଅଡ଼ି କତାୟାଁ ଲେହେଁ ଇଞ୍ଜାଁ ଗୁତି ସିହଁକ୍ଳାଠନି ଗୁତି ଲେହେଁ ଏ କାଜା ରାରୁ ଜନ୍ତକି ତାନି ବାଡ଼ୟୁ, ସିଂଗାସାଣି, ଅଡ଼େ ବାରେ ଅଦିକାରା ହୀତେ । ୩ ଏ ଜନ୍ତତି ତାୟୁଁ ତୁ ଆମିନି ହାନିଲେହେଁତି ଗାହାଁ ତଞ୍ଜାଆହିମାଚେ, ସାମା ଏ ଗାହାଁ ନେହଁ ଆଡ଼େ, ଅଡ଼େ ଦାରତିତା ମାନାରି ବାରେ କାବା ଆହାଁ ତାନି ଜେଚ ହାଚେରି । ୪ ଅଡ଼େ କାଜା ରାରୁ ଜନ୍ତକି ତାନି ଅଦିକାରା ହୀତାକି ଏଝାରି ରାରୁଇଁ ଜହରା କିଚେରି, ଏଝାରି ଏ ଜନ୍ତଇଁ ଜିକେଏ ଜହରା କିହାଁ ଏଲେଇଚେରି, “ଆମ୍ବାଆସି ଇ ଜନ୍ତ ଲେହେଁ ଆନେସି ଅଡ଼େ ଆମ୍ବାଆସି ଏଦାଣି ତଲେ ଜୁଜୁ କିହାଁ ଜୀଶା ଆନେସି ।”

୫ ଏଦାନାକି ଆଙ୍କାରା ଅଡ଼େ ମାହାପୁରୁ ନିନ୍ଦାତି କାତା ଝେସାଲି ଗୁତି ହୀଝିଆଡ଼େ, ଅଡ଼େ ରୀ କଡ଼ି ରୀ ଲେଞ୍ଜୁ ପାତେକା ସାଲଝି କିୟାଲି ଅଦିକାରା ହୀପକିଆଡ଼େ । ୬ ଏମ୍ବାଟିଏ ଏଦି ତାନି ଗୁତି ଏକହାନା ମାହାପୁରୁ ନିନ୍ଦା କାତା ଜଲାନା, ମାହାପୁରୁ ଦରୁ, ମାହାପୁରୁ ବାସାଆନି

✨ ୧୩:୧ ୧୩:୧ ଝେ ବଲ୍ଲୁ ୧୭:୩,୭-୧୨

ଗାୟୁ, ଅଡ଼େ ଲାକପୁରୁ ବାସା ଆହାମାନାରାଇଁ, ବାରେତି ନିନ୍ଦା କିତେ । ୭ ବାରେ ମାହାପୁରୁ ଲକୁଇଁ ଜୁଜୁ କିହାଁ ଜୀଣା ଆହାଲି ଅଦିକାରା ହୀଝିଆହାମାରେ, ଅଡ଼େ ବାରେ ଗତି, କୁଡ଼ା, ହାଡ଼ା, ଦେସା, ଲାକ ଅଦିକାରା ହୀଝିଆହାମାରେ । ୮ ଆମ୍ବାଆରି ଦରୁ ଦାର୍ତତି ଗାଡ଼ି ଆଆ ନକେଏ ପୂଜା ମେଣ୍ଡା ତାଲୁତି ଜୀଝୁଗାଟି ପଡ଼ିତା ରାୟୁକି ଆହାହିଲେଏ, ଦାର୍ତତି ବାସା କିହାମାନି ଏ ବାରେ ଲକୁ ଏ ଜନ୍ତଇ ଜହରା କିନେରି ।

୯ “ଆମ୍ବାଆରାକି କୀର୍କା ମାନୁ ଏଝାସି ଝେଣମ୍ବାସି ! ୧୦ ଆମ୍ବାଆସି ଦସାହାଁ ଅନେସି, ଏଝାସି ଏଲେକିହିଁ ଏ ଦସପି ଆନେସି, ଆମ୍ବାଆସି କାଣ୍ଡାତଲେ ପାୟିନେସି, ଆଡ଼ିହିଁ ଏଝାସି ଏଲେଆହିଁ ଏ କାଣ୍ଡାତଲେ ପାୟୁଝି ଆନେସି, ଏରିବେଲାତା ମାହାପୁରୁ ଲକୁତାକି ନାମୁ ଅଡ଼େ ଅରହିନାୟି ଲଡ଼ାମାନେ ।”

୧୧ ଏଚେଟିଏ ନାନୁ ର ଜନ୍ତଇଁ ବୁମି ବିତ୍ରାଟି ହଚାଝାଡ଼ାଣି ମେସ୍ତେସ୍, ମେଣ୍ଡା ତାଲୁ ଲେହେଁ ଜଡ଼େକା କମକା, ଅଡ଼େ ଏଦି ରାତୁ ଲେହେଁ କାତା ଆହିମାରେ । ୧୨ ଏ ଜନ୍ତ ନକେଏତି ଜନ୍ତ ନକିତା ତାନି ବାଡ଼ୁରୁ ତସାନା ଏମିନି ନକେଏତି ଜନ୍ତକି ହାନିଲେହେଁତି ଗାହାଁ ମାଡ଼ାମାରେ, ଏଦାନି ଜହରା କିହାଲି ଦାର୍ତତି ଅଡ଼େ ଏମ୍ବାଆଁ ବାସା ଆହାମାନାରାଇଁ ବାଲାମାତମି କିନେ । ୧୩ ଏ ଜନ୍ତ କାବାଆନି କାମାୟାଁ କିନେ, ଏଦି ବାରେ ଲକୁ ନକିତା ହାଗୁଟି ଦାର୍ତତିତା ହିତୁ ରିଝିକିନେ । ୧୪ ଇଞ୍ଜା ଏ ତଲିତି ଜନ୍ତ ନକିତା ଆମିନି କାବାଆନି କାମା କିହାଲି ଅଦିକାରା ବେଟାଆହାମାରେ, ଏମ୍ବାଟି ଦାର୍ତତିତା ବାସାଆହାମାନି ଲକୁଣି ନାଡ଼ିକିହାଁ, ଆମିନି ଜନ୍ତ କାଣ୍ଡାତଲେ ଗାହାଁ ଆହାମାଟି ଜିକେଏ ନୀଡ଼ିତେ, ଏଦାନି ର ବୁମା କିହାଲି ଏଝାରାଇଁ ଏଲେଇନେ । ୧୫ ଏ ଜନ୍ତୁତି ବମା ଏନିକଁ ଜଲ୍ଲାଲି ଆଡ଼ିନେ ଅଡ଼େ ଏଚେକା ଲକୁ ଜନ୍ତୁତି ବମାଟି ଜହରା କିଅରି, ଏଝାରି ଏନିକଁ ପାୟୁଝି ଆନେରି, ଏଦାଆଁତାକି ତାୟୁତି ଜନ୍ତକି ତଲିତି ଜନ୍ତୁତି ବମାକି ଜୀଝୁ ହୀହାଲି ଅଦିକାରା ହୀପକିଆଡ଼େ । ୧୬ ଅଡ଼େ ଏ ଜନ୍ତ ଉଣା, କାଜାରି, ବାଡ଼କୁ ଗାଟାରାଇଁ, ହାକି ଗାଟାରାଇଁ, ହଲିୟାଙ୍ଗା, ହଲିୟାଙ୍ଗା ଆଆତାରାଇଁ, ବାରେଜାଣାତି ତାନି ଚିଝନି କେୟୁତା ଆଆତଁ ମୁଞ୍ଜୁତା ର ସିନା ଇଟା କଡ଼ାଲି ବାଲାମାତମି କିନେ । ୧୭ ଅଡ଼େ ଏ ସିନା ଇଡ଼ିହିଁ ଜନ୍ତୁତି

ଦରୁ ଆଆତ ତାନି ଦରୁତି ଲମ୍ବର ଇଟା କତାଆତି ଲକୁଣି ଏନାଆଁ କତାଲି କି ପାରତାଲି ହୀଏ ।

୧୮ ଏ ବାରେତାକି ବୁଦି ଲଡ଼ାମାନେ, ଆମ୍ବାଆରାକି ବୁଦି ମାନେ ଏଞ୍ଜାସି ଏ ଜନ୍ତୁତି ଲମ୍ବର ଏଜିକିପାସି, ଏନାଆଁତାକି ଇଚିହିଁ ଏଦି ର ମାଣସିତି ଲମ୍ବର ଅଡ଼େ ଏ ଲମ୍ବର ଆହିମାନେ ସ ଖାଞ୍ଜା ତାନିକଡ଼ି ସ ।

୧୪

ମେଣ୍ଡା ଡାଲୁ ଅଡ଼େ ତାନି ଲକୁ

୧ ☆ଏଚେଟିଏ ନାନୁ ସିନିକିହାଁ ମେସ୍ତେଏଁ, ଅଡ଼େ ମେଣ୍ଡା ଡାଲୁ ସିୟନ ହରୁତା ନିଟାମାନେ, ଅଡ଼େ ଆମ୍ବାଆରି ମୁଞ୍ଜୁତା ମେଣ୍ଡା ଡାଲୁ ଇଞ୍ଜା ତାନି ଆବାତି ଦରୁ ରାସ୍‌କି ଆହାମାଚେ ଇଲେତି ଲକୁ ସାଡ଼ାକଡ଼ି ସାରି ମାଣା ଲକୁ ତାନିତଲେ ନିଟାମାଚାଣି ମେସ୍ତେଏଁ । ୨ ଅଡ଼େ ଲାକପୁରୁଟି ଲଦ ଲଦ ଆହି ରିନି ଏୟୁ ଇଞ୍ଜା ହାଗୁ ଗୁଣ୍ଡନିଲେହେଁତି ର କାଜା ହାଡ଼ା ଝେଚେଏଁ, ଆମିନି ହାଡ଼ା ନାନୁ ଝେଚେଏଁ ଏଦି ସେରଞ୍ଜି ଡ଼ିଡ଼ହିମାନାରି ହାଡ଼ାଲେହେଁ ଝେଞ୍ଜିମାଚେ । ୩ ସିଂଗାସାଣି ସାରିଗଟା ଜନ୍ତୁ ଅଡ଼େ ପ୍ରାତିନାଜା ନକିତା ର ପୁଝନି ପାରୁ ପାରିମାଚେରି, ଅଡ଼େ ଦାରତିଟି କଡ଼ଞ୍ଜି ଆହାମାନି ସାଡ଼ାକଡ଼ି ସାରି ମାଣା ଲକୁ ପିସ୍‌ପେ ଆମ୍ବାଆରି ଏ ପାରୁ ପାଚାଲି ଆଡ଼ାଆଚେରି । ବାରେ ମାଣସି କୁଡ଼ା ବିତ୍ରାଟି ଖାରଇ ଏଞ୍ଜାରିଦେଁ ଗେଲପି ଆହାମାଚେରି । ୪ ଏଞ୍ଜାରି ଇୟସିକା ତଲେ କାଲୁହାନା ତାମ୍ବୁ ଜାହାରାଇଁ ଦହ କିହାଁ କତା ହିଲାଆଚେରି, ଇଚିହିଁ ଏଞ୍ଜାରି ଅଟ୍‌ହାରି, ମେଣ୍ଡା ଡାଲୁ ଆମ୍ବିୟାଞ୍ଜାକି ହାନେ ଏଞ୍ଜାରି ତାନି ଜେଚ ହାନେରି, ଏଞ୍ଜାରି ମାହାପୁରୁତି ମେଣ୍ଡା ଡାଲୁତି ତଲିତି ପାଡ଼େୟି ସମାନା ମାଣସିୟା ବିତ୍ରାଟି ଗେଲପି ଆହାନା ମେଣ୍ଡା ଡାଲୁ ନକିତା ହେରପିଆହାମାନେରି । ୫ ଏଞ୍ଜାରି ଗୁଡ଼ିତା ଏଦି ମିଟି ଜଲିନାୟି ହିଲେଏ, ଏଞ୍ଜାରି ଦହ ହିଲାଆ ଗାଟାରି ।

ତାନି ଜାଣା ଦୁତୁ

୬ ଏଚେଟିଏ ନାନୁ ହାଗୁତି ମାଦି ଉସିମାନି ର ଦୁତୁଇଁ ମେସ୍ତେଏଁ, ଏଦି ଦାରତିତା ବାସାଆହାମାନି ବାରେ ଗଟି, କୁଡ଼ା, ହାଡ଼ା ଅଡ଼େ

ଦେସାତି ଲକୁଡାଣା ଝେକ୍‌ହାଲି କାଲାକାଲା ତାକି ଡ଼ୟିନି ନେହିଁ କାରୁ ଝେକ୍‌ହି ମାନେସି ।^୭ ଏଡ଼ି କାଜା ଗିୟାଁତଲେ ଏଲେଇଚେ “ମାହାପୁରୁଇଁ ଆଜାଦୁ ଅଡ଼େ ଏଝାଣାଇଁ ଗାଝୁରମି ହୀଦୁ, ଇଚିହିଁ ମାଣସିତି ନୀହାଁୟି କିନି ଦିନା ଏଗାଝାଡ଼େ, ଅଡ଼େ ଆମ୍ବାଆସି ହାଗୁ, ଦାରତି, ସାମଦୁରି ଇଞ୍ଜା ଜାରଣା ଏମୁତି ଗାଡ଼ିକିହା ମାନେସି, ଏଝାଣାଇଁ ଜହରା କିଦୁ ।”

୮ ✨ତାନି ତାମୁ ଅଡ଼େ ର ଦୁତୁ ଇଚିହିଁ ରୀ ଲମ୍ବର ଦୁତୁ ଝାହାନା ଏଲେଇଚେ, “ଆମିନି କାଜା ଗାଡ଼ା ବାବିଲନ ବାରେ କୁଡ଼ାତି ଲକୁଇଁ ତାନି ଦାରିକାମା କିଝିକିନି କାଡ଼ ଡୁର୍‌ହାନା ହଚିକିହାମାରେ, ଏଡ଼ି ରିହା ହାଜାମାନେ ।”

୯ ଏଦାଣି ତାମୁ ଅଡ଼େ ର ଦୁତୁ ଇଚିହିଁ ତାନି ଲମ୍ବର ଦୁତୁ ଝାହାନା କାଜା ଗିୟାଁତଲେ ଏଲେଇଚେ, “ଆମ୍ବାଆସି ଏ ଜନ୍ତୁ ଅଡ଼େ ତାନି କିହାମାନି ବମାତି ଜହରା କିନେସି ଅଡ଼େ ମୁଞ୍ଜୁତା କି କେୟୁତା ତାନି ସିନା ଇଟା କଡ଼ିନେସି,^{୧୦} ଏଝାସି ମାହାପୁରୁତି କପାଗାଟି ସଲ୍ଲାତା ଝାକ୍‌ହାମାନି ହାରେକା କାରବିତି କାଡ଼ ଗୁହ୍‌ନେସି, ଆମ୍ବାଆରି ଇ କାମା କିନେରି ଏଝାରି ବାରେ ମେଣ୍ଡା ତାଲୁ ଅଡ଼େ ସୁଦୁ ଲାକପୁରୁତି ଦୁତୁୟା ନକିତା ହିରୁ ଅଡ଼େ ଗାନ୍ଧାଗାଟି ଗୁଣ୍ଡା ତଲେ କସ୍ତ ବେଟା ଆନେସି ।^{୧୧} ଇଲେତି ଲକୁଣି କସ୍ତ ହୀନି ହିରୁ ବୟିଁ କାଲାକାଲା ତାକି ହଚେମାନେ, ଆମିନି ଗାଟାରି ଜନ୍ତୁ ଅଡ଼େ ବମାତି ଜହରା କିନେରି ଅଡ଼େ ତାନି ଦରୁ ଇଞ୍ଜା ସିନା ବେଟା ଆହାମାନେରି, ଏଝାରି ଲାଆଁ ମାଦେନା ଜମାଲି ବେଟାଆଅରି ।”

୧୨ ଇମ୍ବାଆଁ ମାହାପୁରୁ ଲକୁ ଇଚିହିଁ ମାହାପୁରୁତି ହୁକୁମି ମାନଝିଆନେରି, ଇଞ୍ଜା ଜୀସୁଇଁ ନାମିନେରି, ଏଝାରାକି ଅରୁହିନାୟି ଲଡ଼ାମାନେ ।

୧୩ ଇଞ୍ଜା ଲାକପୁରୁତି ଇ ହାଡ଼ା ଝେଚେଏଁ, ଇ କାତା ରାଟାମୁ, “ନୀଏଁ ଆମ୍ବାଆରି ମାହାପୁରୁ ତାଣା ମାଞ୍ଜାନା ହାନେରି, ଏଝାରି ନେହେଁ ।” ଅଡ଼େ ନାନୁ ଝେଚେଏଁ ସୁଦୁଜୀଝୁ ଝେସିମାଞ୍ଜାନେ, “ଏଝାରି ତାନି କାମାତି ଝାହୁଟି ଜମିନେରି, ଇଚିହିଁ ଏଝାରି କାମାତି ପାଡ଼େୟି ଏଝାରିତଲେ ଡ଼ୟିନେ ।”

✨ ୧୪:୮ ୧୪:୮ ଝେ ବଲ୍ଲୁ ୧୮:୨

ତାସା ଦାନାୟି

୧୪ ଅଡ଼େ ନାନୁ ମେସ୍ତେସ୍, ଇଚାୟି ଦବ୍‌ଲା ହାଗୁ ଇଞ୍ଜା ଏଦାଣି ଲାକ କୁଗାମାନେସି ର ମାଣ୍‌ସି ମୀରଏସି ଲେହେତାସି; ତାନି ତାୟି ତୁ ବାଂଗାରା ଚପେରି, ଇଞ୍ଜା କେୟୁତା ର ଝାହ୍‌ନି କଚାତଖେଲି । ୧୫ ଏମ୍ବାଟିଏ ମାହାପୁରୁତି ଇଲୁଟି ର ଦୁତୁ ଝାହ୍‌ନା ହାଗୁତା କୁଗାମାନାଣାଇଁ କାଜା ଗିୟାତଲେ ଏଲେଇଚେ, “ନୀ କଚାତଖେଲି ଆସାନା ତାସା ଦାମୁ । ଦାରତିତି ତାସା ଦାଝନି କାଟୁ ଏଗାଝାଡେୟିଏ ।” ୧୬ ଇଦାଆଁ ଝେଞ୍ଜାନା ହାଗୁତା କୁଗାମାନି ମାଣ୍‌ସି ତାନି କଚାତଖେଲି ଅଗିତେସି ଇଞ୍ଜା ଦାରତିତି ତାସା ବାରେ କୁଡ଼ିକିଝିଆଡେ ।

୧୭ ଏଦାଆଁ ତାୟି ଲାକପୁରୁତି ମାହାପୁରୁ ଇଲୁଟି ଅଡ଼େ ର ଦୁତୁ ହଚାଝାଡେସି, ଏ ଦୁତୁକି କେୟୁତା ଜିକେଏ ଝାହ୍‌ନି କଚାତଖେଲି ମାଚେ ।

୧୮ ଅଡ଼େ ପୂଜା ପିଣ୍ଡାତି ହିରୁ ଅଦିକାରାତା ମାନି ର ଦୁତୁ କଚାତଖେଲି ଆସାମାନି ଅର ଦୁତୁଇଁ କାଜା ଗିୟାତଲେ ଏଲେଇଚେ, “କଚାତଖେଲି ଅଗାନା ଦାରତିତି ଅଜୁରି ବାଡ଼ାଟି ଅଜୁରିକା ବାରେ ଡଡ଼ହା ତୁହ୍‌ମୁ; ଏଝି ବାରେ କାମ୍ବାମାନୁ ।” ୧୯ ଏମ୍ବାଟିଏ ଦୁତୁ ଦାରତିତା ତାନି କଚାତଖେଲି ଅଗାନା ଅଜୁରି ମାଡ଼ାୟାଟି ଅଜୁରି ଡଡ଼ହେ ଇଞ୍ଜା ଏଝି ମାହାପୁରୁ କାରବିତି ଅଜୁରି ପୀଡ଼ିକିନି ଦନିତା ମେଡ଼ହେ । ୨୦ ☆ଗାଡ଼ାତି ପାଙ୍ଗାତା ମାନି ଏ ଦନିତା ଅଜୁରି ପୀଡ଼ିକିଝିଆଡେ ଇଞ୍ଜା ଏମ୍ବାଟି ଗଡ଼ାୟା ବାକେରି ପାତେକା ନିଙ୍ଗାନା ତାନି ଝାଞ୍ଜା କିଲମିଚର ହେକ ପାତେକା ଇଞ୍ଜା ରୀ ମିଚର ଲାକ ପାତେକା ନେତେରି ଝାଙ୍ଗିତେ ।

୧୫

ସାଡ଼ାଗଟା ରଗ କିନି ସାଡ଼ାଗଟା ଦୁତୁୟାଁ

୧ ଏମ୍ବାଟିଏ ନାନୁ ହାଗୁତା ଅଡ଼େ ର କାବାଆନି ଲେହେତି ସିନା ମେସ୍ତେସ୍, ସାଡ଼ାଗଟା ଦୁତୁୟାଁ ସାଡ଼ାଗଟା ରଗୟାଁ ତାନି କେୟୁତା ଆସାନା ତଞ୍ଜାଆତୁ, ଏ ରଗୟାଁ ମାହାପୁରୁତି କପା ତହ୍‌ନାୟି ରାନାୟି ମାଚେ ।

☆ ୧୪:୨୦ ୧୪:୨୦ ଝେ ବଲ୍ଲୁ ୧୯:୧୫

୨ ଅଡ଼େ ନାନୁ ମେସ୍‌ସେଏଁ, ହିରୁ କାଲ୍‌ହିତି ଦାପେଣି ଲେହେଁତି ସାମ୍‌ଦୁରି, ଆମ୍ବାଆରି ଜନ୍ତ, ଏଦାନି ବମା ଇଞ୍ଜା ଏଦାନି ଦରୁତି ଲମ୍‌ରତି ଜୀଣା ଆଡାରି, ଏଞ୍ଜାରି ମାହାପୁରୁ ହୀହାମାନି ସେର୍‌ଜି ଆସାନା ଗାଜୁ ଲେହେଁତି ସାମ୍‌ଦୁରି ଗିରୁତା ନିଚାମାଚେରି । ୩ ଏଞ୍ଜାରି ମାହାପୁରୁ ହୀତି ରାମଗଂଗା ଝେଟିହିଁ ମାହାପୁରୁତି ସେବାକିନି ମସାତି ପାରୁ ଇଞ୍ଜା ମେଣ୍ଡା ଡାଲୁତି ପାରୁ ପାଡ଼ିହିଁ ଏଲେ ଇଞ୍ଜାଁ ମାନେରି,

“ବାରେତି କିହାଁ ବାଡ଼ୁଲୁ ଗାଟି ପ୍ରବୁ ମାହାପୁରୁତି,

ନୀ କାମା ଏଚେକା କାଜାୟି ଅଡ଼େ କାବା ଆନାୟି,

ବାରେ ଲକ୍ଷୁତି ରାଜାତି,

ନୀ କାମାତି ଜିରୁ ବାରେ ନୀହାଁୟି ଗାଟାୟି ଇଞ୍ଜାଁ ସାତାତାୟି ।

୪ ପ୍ରବୁ ! ନିଙ୍ଗେ ଆମ୍ବାଆସି ଆଜାଆ ଗାଟାସି ମାନେସି ?

ଆମ୍ବାଆସି ନୀ ଗାଞ୍ଜୁରମି ଝେକ୍‌ଆଗାଟାସି ମାନେସି ?

ଇଚିହିଁ ନାନୁ ରଅତିଏ ସୁଦୁ ଗାଟାତି;

ବାରେ କୁଡାତି ଲକ୍ଷୁ ଖାହାନା ନୀ ପୂଜା କିନେରି,

ଏନାଆଁତାକି ଇଚିହିଁ ନୀ ଦାମ୍‌ଗାଟି ନୀହାଁୟିତି କାମାୟାଁ

ବାରେଜାଣା ମେସାମାନେରି ।”

୫ ଏମ୍ବାଟିଏ ନାନୁ ମେସ୍‌ସେଏଁ, ଲାକପୁରୁତି ସାକି ହାନି ତୁମୁ ଦେଝୁଡ଼ିତି ଦାରା ଦେପିଆଡେ ୬ ସାଡାଗଟା କସ୍‌ୟାଁ ଆସାମାନି ସାଡାଗଟା ଦୁତୁୟାଁ ଲାକପୁରୁତି ଦେଝୁଡ଼ିତି ହଟାଞ୍ଜାତୁ; ଏଞ୍ଜି ଅପହି ମୁହନି ହିମ୍‌ରିକା ହୁଟାମାରୁ ଇଞ୍ଜାଁ ଏଞ୍ଜାସିକା ବକ ସାରିସୁରୁ ବାଂଗାରା ପାଟା ଦସାମାରୁ । ୭ ସାରିଗଟା ଜନ୍ତୟାଁ ବିତ୍ରାଟି ର ଜନ୍ତ କାଲେଏତାକି ନୀତାମାନି ମାହାପୁରୁ କପାତଲେ ନେଞ୍ଜାମାନି ସାଡାଗଟା ବାଂଗାରା ଗିନାୟାଁ ଏ ସାଡାଗଟା ଦୁତୁୟାଁକି ହୀତେ । ୮ ମାହାପୁରୁତି ଗାଞ୍ଜୁରମି ଅଡ଼େ ତାନି ବାଡ଼ୁଲୁଟି ହଟିମାନି ବୟାଁ ଦେଝୁଡ଼ିତା ନେଞ୍ଜାହାଚେ; ସାଡାଗଟା ଦୁତୁୟାଁ ତାଗାମାନି ସାଡାଗଟା ରଗାୟାଁ ରାଆ ପାତେକା ଏ ଦେଝୁଡ଼ି ବିତ୍ରା ଆମ୍ବାଆସି ହଡାଲି ଆଡାଆତେସି ।



ମାହାପୁରୁ କପାତି ସାଡାଗଟା ଗିନାୟାଁ

୧ ଏଚେଟିଏ ନାନୁ ଝେଚେଏଁ, ଦେଝୁଡ଼ିଟି ରଅସି କାଜା ଗିୟାଁତଲେ ଏ ସାଡାଗଟା ଦୂତୁୟାଁଇଁ ଝେସିମାଚେସି, “ହାଜୁ, ସାଡାଗଟା ଗିନାୟାଁଣା ନେଞ୍ଜାମାନି ମାହାପୁରୁତି କପାତି ଦାରତି ଲାକ ଝାକ୍‌ଦୁ !”

୨ ଏଚେଟିଏ ମୂଲୁତି ଦୂତୁ ହାଜାନା ତାନି ଗିନାତା ଏନାୟି ମାଚେ, ଦାରତି ଲାକ ଝାକ୍‌ହେ; ଦେରୁଣିଏ ଆମ୍ବାଆରି ତାଣା ଜନ୍ତୁତି ସିନା ମାଚେ, ଇଞ୍ଜା ତାନି ବମାତି ପୂଜା କିହାମାଚେରି, ଏଝାରି ଆକ୍ମାତା ହାରେକା କସ୍ତଗାଟି ବସା ପଟ୍‌କା ହତୁ । ୩ ଏଚେଟିଏ ରୀ ଲମ୍ବର ଦୂତୁ ତାନି ଗିନାତାଣି ସାମ୍‌ଦୁରି ଲାକ ଝାକ୍‌ହେ; ଇଞ୍ଜା ସାମ୍‌ଦୁରିତି ଏୟୁ ହାଡ଼ି ଲକୁତି ନେତେରିଲେହେଁ ଆତୁ, ଇଞ୍ଜା ସାମ୍‌ଦୁରିତା ମାଟି ବାରେ ଜନ୍ତୁୟାଁ ହାହାହାଚୁ ।

୪ ତାନି ଲମ୍ବର ଦୂତୁ ତାନି ଗିନାତା ଏନାୟି ମାଚେ, କାତା ଇଞ୍ଜା ଉସା ଏୟୁ ଲାକ ଝାକ୍‌ହେ; ଇଞ୍ଜା ଏ ଏୟୁ ବାରେ ନେତେରି ମିଣ୍ଡା ହାଚୁ । ୫ ଏଚିବେଲାତା ନାନୁ ଝେଚେଏଁ, ଏୟୁ ଲାକ ଅଦିକାରା ବେଟାଆହାମାନି ଦୂତୁ ଏଲେଇଞ୍ଜିମାଚେ, “ନାନୁ ସୁଦୁ ଗାଟାତି, ନାଏଁ ମାନାତି ଅଡ଼େ ତଲିଏ ମାଚାତି; ନାନୁ ତୀରପୁତଲେ ନାହାଁୟି କିହାମାଞ୍ଜି । ୬ ଏଝାରି ମାହାପୁରୁ ଲକୁଇଁ ଇଞ୍ଜା ମାହାପୁରୁ ଅଣ୍‌ପୁତି ବଲ୍ଲୁ ଝେହ୍‌ନାରି ଆମିନି ନେତେରି ବକ୍‌ହାମାଚେରି, ଏଦାଆଁ ମୀରୁ ଏଝାରାଇଁ ଉଟ୍‌ହାମାଞ୍ଜି । ଏଝାରି ଏନାଆଁ ବେଟାଆନାଣି ବେଟାଆହାମାନେରି ।” ୭ ଏଚେଟିଏ ପୂଜା ପିଣ୍ଡାଟି ର ହାଡ଼ା ଝେଚେଏଁ, ବାରେତି କିହାଁ ବାଡ଼ୟୁଗାଟି ମାହାପୁରୁ ପ୍ରବୁ ! ନୀ ନାହାଁୟି ବାରେ ସାଡା ଅଡ଼େ ଟିକାଣାତାୟି ।

୮ ସାରି ଲମ୍ବର ଦୂତୁ ତାନି ଗିନାତା ମାଚାଣି ଝେଡ଼ା ଲାକ ଝାକ୍‌ହେ, ଏଦାଆଁତାକି ଝେଡ଼ା ହାରେକା ଡ଼ାଞ୍ଜାନା ଲକୁଣି ହୁଡ଼ିତେ । ୯ ଏଚିବେଲା ଲକୁ କଣ୍ଡା ହାଟି କାରାତା ଝେହାହାଚେରି, ଅଡ଼େ ଇ ସାସ୍ତି ଲାକ ଅଦିକାରା ମାନି ମାହାପୁରୁ ଦରୁତି ନିନ୍ଦାକିତେରି । ସାମା ହିୟାଁ ବାଦ୍‌ଲି କିହାଁ ଏଝାଣି ଗାଝୁରମି କିଆତେରି ।

୧୦ ପାସା ଲମ୍ବର ଦୂତୁ ତାନି ଗିନାତା ମାଚାଣି ଜନ୍ତୁତି ସିଂଗାସାଣି ଲାକ ଝାକ୍‌ହେ । ଜନ୍ତୁତି ରାଜିତା ଆନ୍ଦେରି ଆହାହାଚେ, ଇଞ୍ଜା ଲକୁ କସ୍ତଲେ ତାନି ଝେନ୍ଦରିକା କାଚା କଡ଼ିତେରି । ୧୧ ଅଡ଼େ ଏଝାରି

ଆଜ୍ଞାତି ରାଣାରାକା ତାକି ଇଞ୍ଜା ପକାୟାଁ ବୀସା ତାକି ଲାକପୁରୁତି ମାହାପୁରୁଇଁ ବାକା ଇଚିତେରି । ସାମା ତାନି ଲାଗେଏତି କାମାଟି ମନ ଝେଟ୍‌ଆତେରି ।

୧୨ ସ ଲମ୍ବର ଦୂତୁ ତାନି ଗିନାତା ମାଚାଣି ପରାତ୍ କାଜା କାତା ଲାକ ଝାକ୍‌ହେ, ଏ କାତାତି ଏମ୍ବୁ ଝାୟାହାରୁ, ଝେଡ଼ା ହପୁ ଝାକିଟି ଝାହିମାନି ରାଜାୟାଁକି ଜିରୁ ପାରଲିଆଡେ । ୧୩ ଏଚେଟିଏ ନାନୁ ମେସ୍‌ସେଏଁ, ପାନାୟାଁଲେହେଁ ତଞ୍ଜାଆହିମାନି ତାନିଗଟା ଲାଗେଏତି ଜୀଝୁୟାଁ । ଏଝି ରାଚୁ ଗୁତିଟି, ଜଡ଼ତି ଗୁତିଟି, ମିଟି ବଲ୍ଲୁ ଝେହ୍‌ନାରି ଗୁତିଟି ହଚାଝାହିମାରୁ । ୧୪ ଏ ଲାଗେଏତି ଜୀଝୁଗାଟି ବୁଡୁୟାଁ କାବାଆନି କାମା କିହାଲି ଆଡ଼ିନୁ, ଏଝି ବାଡ଼ୁୟାଁ ଗାଟି ମାହାପୁରୁତି ଦିନାତା ଜୁଜୁ କିହାଲିତାକି ଦାରତିତି ରାଜାୟାଁଣି କୁଡ଼ିକିହାଲି ହାଚାହାରୁ ।

୧୫ ✽“ଝେଞ୍ଜୁ ! ନାନୁ ସରୁଲେହେଁ ଝାକ୍‌, ଆମ୍ବାଆସି ଜାଗ୍ରାତା ଆହାଁ ସରୁ ତାଣାଟି ଜାହାରା ହିମ୍ବରକା ତୁଲୁହାଲି ଆଡ଼ିମାନେସି, ଏଝାସି ନେହେଁ । ଏଝାସି ନାଗଡ଼ା ଆହାଁ ରେଅସି, ଅଡେ ଏଝାସି ଲାଜା ବେଟାଆଅସି ।”

୧୬ ପଲ୍‌ଆ ଜୀଝୁୟାଁ ଏ ବେଲାତା ଦାରତିତି ରାଜାୟାଁଣି ଆମିନି ଗାୟାତା କୁଡ଼ିକିତୁ ଏବୁ ହାଡ଼ାତଲେ ଏଦାନି ଦରୁ ଆର୍ମାଗାତେନ ।

୧୭ ସାତା ଲମ୍ବର ଦୂତୁ ତାନି ଗିନାତା ମାଚାଣି ଗାଲି ଲାକ ଝାକ୍‌ହେ, ଏଚେଟିଏ ଦେଝୁଡ଼ିତି ସିଂଗାସାଣିଟି ର କାଜା ହାଡ଼ା ଝେଜ୍‌ଜେତେ, “ଇଦାଆଁ କିଝିଆଡେ !” ୧୮ ✽ଦେବୁଣିଏ ବିଲିବାଲା ଆହୁଁ ମୁସ୍‌ସେ ଇଞ୍ଜା ହାଗୁ ଗୁଣିନି ହାଡ଼ା ଆଡେ, ଇଞ୍ଜା ହାରେକା ବୁମି ଝୀଡ଼ିତେ, ଇଚିହୁଁ ଦାରତିତା ମାଣ୍‌ସିୟାଁ ଗାଡ଼ିଆଡ଼ି ଦିନାଟିଏ ଏଚେଲାଝା ଇଲେତି ବୁମି ଝୀଡ଼ାହିଲାଆଡେ, ଇଦି ବାରେକିହାଁ ଆଜିହପେତି ବୁମି ଝୀଡ଼ିନାୟି ମାଚେ । ୧୯ ଏମ୍ବାଟିଏ ଏ କାଜା ଗାଡ଼ା ତାନି ବାଗା ତଲେ ବାଗା ଆଡେ ଅଡେ ଦାରତିତି ବାରେ ଗାଡ଼ାୟାଁ ବିଡ଼ହାହାରୁ, ଅଡେ କାଜା ଗାଡ଼ା ବାବିଲନତି ମାହାପୁରୁ ବାଣା ଆହା ହିଲାଆଡେସି, ଏଝାସି ତାନି ଗହ୍‌ନି ସଲ୍‌ଗି ତାନି ହାରେକା କପାଗାଟି କାଡ଼ୁ ଏଝାଣାକ୍‌

✽ ୧୭:୧୫ ୧୭:୧୫ ମାତି ୨୪:୪୩,୪୪; ଲୁକ ୧୨:୩୯,୪୦; ଝେ ବଲ୍ଲୁ ୩:୩ ୧୭:୧୮ ୧୭:୧୮ ଝେ ବଲ୍ଲୁ ୮:୫; ୧୧:୧୩,୧୯

ଉତ୍ତ୍ରେସି । ୨୦ ☆ସାମ୍‌ଦୁରି ମାଦି ମାନି ଦେସାୟାଁ ମେଣ୍‌ଙ୍ଗାହାରୁ ଇଞ୍ଜା ହରକା ବାରେ ଡଗ୍‌ଗା ହାରୁ । ୨୧ ☆ରା କଡ଼ି ଦସ କେଜି ବଜୁଗାଟି ଆଜିୟାଁ ହାରୁ ଲାକଟି ମାଣ୍‌ସିୟାଁ ଲାକ ରିଡୁ, ଲକୁ ଇ ମର୍ଡ଼ି ତାକି ମାହାପୁରୁଇଁ ନିନ୍ଦାକିତେରି ।

୧୭

ଝେଙ୍ଗିତି ଦାରେଣି

୧ ଏମ୍‌ଗାଟିଏ ସାତାଗଟା ଗିନାୟାଁ ଆସାମାନି ଦୁତୁ ବିତ୍ରାଟି ରଣ୍ଡି ନା ତାଗେ ଖାହାନା ଏଲେଇଞ୍ଜାତେ, “ଇମ୍‌ଗାଆଁ ଖାମୁ ହାରେକା କାତା ଦାରି ଗାଡ଼ି ଆହାମାନି ଦାରେଣି ଲେହେଁତି କାଜା ଗାଡ଼ା ଏନି ସାସ୍ତି ବେଟାଆନ୍‌ନେ ଏଦାଆଁ ତସ୍ତାଇଁ । ୨ ଦାର୍‌ଡିତି ରାଜାୟାଁ ଏ ଦାରେଣି ତଲେ ଦାରିକାମା କିହାମାନେରି, ଇଞ୍ଜା ଦାର୍‌ଡିତା ବାସା ଆହାମାନାରି ବାରେ ଦାରି କାମାଲେହେଁତି କାଡ଼ ଗୁସାହାଁ ହଟାମାନେରି ।”

୩ ☆ଏଚିବେଲାତା ସୁଦୁଜୀଝୁ ନା ତାଣା ଖାଡେ ଇଞ୍ଜା ଏ ଦୁତୁ ନାଞେ ବାଃଲି ବୁମିତା ଅୟାତେ । ଏମ୍‌ଗାଆଁ ନାନୁ ମେସ୍‌ସେଏଁ, ର ପାଟୁ ଖାଣାଗାଟି ଜନ୍ତୁ ଲାକ ର ଇୟା କୁଗାମାଟେ । ଏ ଜନ୍ତୁଟି ଆଙ୍ଗାତା ମାହାପୁରୁ ନିନ୍ଦାକିନି ଦରକା ରାସ୍‌କି ଆହାମାରୁ, ଅଡେ ଏଦାନାକି ସାତାଗଟା ତାର୍କା ଇଞ୍ଜା ଦସଗଟା କମ୍‌କା ମାରୁ । ୪ ଏ ଇୟା ହେୟାଁ ଲେହେଁତି ଖାଣା ଅଡେ ପାଟୁ ଖାଣାଗାଟି ହିମ୍‌ପୁରି ହୁଟାମାଟେ, ଇଞ୍ଜା ଏଦି ବାଂଗାରା ଅଡେ ଗାଡି ଦାରାଗାଟି ମଣି, ମୁଲ୍‌କା ତଲେ ସାକୁ ଆହାମାଟେ, ତାନି ନାଡ଼ିକିନି ପାଡେୟିକା ଲେହେଁ ଅପାଆଗାଟି ଦିଶ୍‌ସୁ ଇଞ୍ଜା ଦାରିକାମା କିନି ଲାଗେଏତି କାମା ତଲେ ନେଞ୍ଜାମାନି ର ବାଂଗାରା ଗିନା ଏଦି ଆସାମାଟେ । ୫ ଏଦାନି ମୁଞ୍ଜୁତା ଡଗ୍‌ଗାମାନି ର ଦରୁ ରାସ୍‌କି ଆହାମାଟେ, “କାଜା ଗାଡ଼ା ବାବିଲନ ଦାର୍‌ଡିତି ବାରେ ଦାରି ଇଞ୍ଜା ଅପାଆଗାଟି କାମାତି ତାଲି ।” ୬ ନାନୁ ଅଡେ ମେସ୍‌ସେଏଁ, ଏ ଆୟାଟି ମାହାପୁରୁ ଲକୁ ଇଞ୍ଜା ଜୀସୁ ତାଣା ମାନି ତଲେ ମାଞ୍ଜା ସାକି ହାହାନା ହାହାମାନି ଲକୁତି ନେତେରି ଗସାନା ହଟାମାଟେ । ନାନୁ ଏଦାନି ମେସାନା ହାରେକା କାବା ଆଡେଏଁ । ୭ ଅଡେ ଦୁତୁ

☆ ୧୭:୨୦ ୧୭:୨୦ ଝେ ବଲ୍ଲୁ ୬:୧୪ ☆ ୧୭:୨୧ ୧୭:୨୧ ଝେ ବଲ୍ଲୁ ୧୧:୧୯ ☆ ୧୭:୩ ୧୭:୩ ଝେ ବଲ୍ଲୁ ୧୩:୧

ନାଙ୍ଗେ ଏଲେଇଞ୍ଜାତେ, “ଏନାଆଁତାକି କାବା ଆହିମାଞ୍ଜି ? ନାନୁ ଏ ଆୟାଟି ଅଡ଼େ ସାତା ଗଟା ତାର୍‌କା ଇଞ୍ଜା ଦସଗଟା କମକା ଗାଟି ଏଦାଣି ଡେକାମାନି ଜନ୍ତୁତି ଡଗୁମାନି କାତା ନାନୁ ନିଙ୍ଗେ ଝେସିମାଞ୍ଜାଇଁ, ଝେନାମ୍ ।”^୮ ✱ଜନ୍ତୁ ର ଦିନା ନୀତାମାତେ; ନୀଏଁ ଅଡ଼େ ନୀତାହିଲେଏ, ସାମା ତବେ ତାଡ଼େପୁରୁଟି ନିଙ୍ଗା ଖାନେ ଇଞ୍ଜା ଅର ଦେବା ନାସା ଆନେ । ଦାରୁତି ଗାଡ଼ି ଆଡ଼ି ନକେଏ ଆମ୍ବାଆରି ଦରୁ ଜୀଞ୍ଜୁତି ପତିତା ରାସ୍‌କି ଆହାହିଲେଏ, ଦାରୁତିତା ବାସାଆହାମାନି ବାରେ ଲକୁ ଜନ୍ତୁଇଁ ମେସାଁ କାବାଆନେରି । ଏଦି ର ଦିନା ନୀତାମାତେ, ନୀଏଁ ଅଡ଼େ ହିଲେଏ, ସାମା ଅଡ଼େ ର ଦେବା ତଞ୍ଜାଆନେ ।”

^୯ “ଇ ବାରେ କାତା ତେଲ୍‌ହାଲି ତାକି ରୁଦି ଲଡ଼ାମାନେ । ଜନ୍ତୁତି ସାତାଗଟା ତାର୍‌କା ସାତେଏ ସାତାଗଟା ହରକା, ଆମିନି ଲାକ ଆୟାଟି କୁଗାମାନେ । ଏଝି ଜିକେଏ ସାତା ଜାଣା ରାଜାୟାଁ ଲେହେଁ ।^{୧୦} ଏଝାରି ବିତ୍ରାଟି ପାସାଜାଣା ମେଶଙ୍ଗା ହାଜାମାନେରି, ନୀଏଁ ରଅସି ମାନେସି, ଅଡ଼େ ରଅସି ନୀଏଁ ପାତେକା ଖାହାହିଲଅସି, ଏଝାସି ଖାଡ଼ିସାରେ ଗାଡ଼େକା ତାକିଏ ସାଲ୍‌ଝି କିନେସି ।^{୧୧} ଅଡ଼େ ଆମିନି ଜନ୍ତୁ ର ଦିନା ନୀତାମାତେ, ଏଦି ଆଟା ଲମ୍ବର ରାଜା, ଏ ବାରେ ରାଜାୟାଁ ବିତ୍ରାଟି ରଅସି ଇଞ୍ଜା ଏଝାସି ଜିକେଏ ତବେ ନାସା ଆନେସି ।”

^{୧୨} “ମୀରୁ ମେସାମାନି ଦସଗଟା କମକା, ଦସ ଜାଣା ରାଜାୟାଁ ଲେହେଁ, ଏଝାରି ନୀଏଁ ପାତେକା ସାଲ୍‌ଝି କିହାହିଲଅରି । ସାମା ଜନ୍ତୁ ତଲେ ସାଲ୍‌ଝି କିହାଲିତାକି ର ଗଟା ତାକି ଏଝାରାକି ବାଡ଼ୁୟୁ ହୀପକିଆନେ ।^{୧୩} ଏଝାରି ରଣ୍ଡିଏ ଅଶ୍‌ପୁ ତଲେ ମାଞ୍ଜାନା ତାମି ବାଡ଼ୁୟୁ ଅଡ଼େ ଅଦିକାରା ଏ ଜନ୍ତୁକି ହୀନେରି ।^{୧୪} ଏଝାରି ମେଶ୍ଟା ତାଲୁ ତଲେ ଜୁଜୁ କିନେରି, ଅଡ଼େ ମେଶ୍ଟା ତାଲୁ ଏଝାରାଇଁ ଜୀଣା ଆନେ, ଇଟିହଁ ଏଝାସି ପ୍ରୁ କିହାଁ ପ୍ରୁ ଅଡ଼େ ରାଜା କିହାଁ ରାଜା, ଅଡ଼େ ଆମିନି ଗାଟାରି ଏଝାଣିତଲେ ମାନେରି ଏ ହାଟାମାନାରି, ଆଟାମାନାରି ଅଡ଼େ ନାମୁଗାଟାରି ଜିକେଏ ଜୀଣା ଆନେରି ।”

^{୧୫} ଦୁତୁ ନାଙ୍ଗେ ଅଡ଼େ ଏଲେଇଞ୍ଜାତେ, “ନୀନୁ ଆମିନି ଏୟୁଣି ମେସି, ଆମିନି ଲାକ ଏ ଦାରେଣି କୁଗାମାନେ, ଏଦି ଆହିମାନେ ଏଟକା ଏଟକାତି ଦେସା, କୁଡ଼ା, ଗଟି ଇଞ୍ଜା ହାଡ଼ାଗାଟି କୁଲମି ।

୧୭ ନାନୁ ମେସାମାନି ଦସଗଟା କମ୍‌କା ଇଞ୍ଜା ଏ ଜନ୍ତ, ଦାରେଣିନି ଅପାତ; ଏଝି ଏଦାନି ତାଣାଟି ବାରେ ପିସ୍‌ପିକିହା ଅହାନା ନାଗୁଡ଼ା କିହାନା ପିହ୍‌ନୁ । ଏଝି ଏଦାନି ଉଞ୍ଜା ତିଞ୍ଜାନା ହିରୁତା ହୁତାନା ନାସା କିନୁ । ୧୭ ଏନାଆଁତାକି ଇଚିହ୍‌, ମାହାପୁରୁ ତାନୁ ଅଶ୍‌ପାମାନାଣି କିହାଲିତାକି ଏଞ୍ଜାଆଁତାକି ଇ ଅଶ୍‌ପୁ ହାହାମାନେସି । ଏଝି ରଣ୍ଡିଏ ମନ ଆହାନା କାମା କିନୁ ଇଞ୍ଜା ମାହାପୁରୁତି ବଲ୍ଲୁ ସାତାତଲେ ଆଆପାତେକା ରାଜିତି ସାଲ୍‌ଝି କିନି ବଲ୍ଲୁ ଏ ଜନ୍ତ କେୟୁତା ପିସାହାନେସି ।”

୧୮ “ଇଞ୍ଜା ଆମିନି ଆୟାଟି ମେସି, ଏଦି ଆହିମାନେ, ଦାର୍‌ତିତି ରାଜାୟାଣି ସାଲ୍‌ଝି କିହିମାନି ଏ କାଜା ଗାଡ଼ା ।”

୧୮

ବାବିଲନ ନାସା ଆନାୟି

୧ ଏଚେଟିଏ ନାନୁ ଅଡ଼େ ର ଦୁତୁଇଁ ଲାକପୁରୁଟି ରେଟା ଝାହିମାଟାଣି ମେସ୍‌ସେସ୍‌; ଏଝି କାଜା ଅଦିକାରା ଗାଟାୟି, ତାନି ଗାଞ୍ଜୁରମି ତାକି ଦାର୍‌ତି ବାରେ ଉଜେଡ଼ି ଆହାହାଚେ । ୨ ☆ଏଦି କାଜା ହାଡ଼ାତଲେ କାଲ୍‌ଝି ଆହ୍‌ ଏଲେଇଚେ, “କାଜା ଗାଡ଼ା ବାବିଲନ ମେଶ୍‌ଜିତେ ! ଏଦି ବାରେ ମେଶ୍‌ଜିତେ ! ଏଦି ବୁତୁୟା ବାସାଟାୟୁ ଅଡ଼େ ପଲ୍‌ଆ ଜାଞ୍ଜୁୟା ଅଡ଼େ ପଲ୍‌ଆ କାମାୟା, ଇଞ୍ଜା ଅପାଆଗାଟି ପଟାୟାଟି ବାସାଟାୟୁ ଆହାମାନେ । ୩ ଇଚିହ୍‌ ବାରେ ଜାଡ଼ିତାରି ତାନି ଦାରି କାମାଲେହେଟି କାଡ଼ୁ ଗୁସାମାନେରି, ଦାର୍‌ତିତି ରାଜାୟା ତାନିତଲେ ଦାରିକାମା କିହାମାନେରି, ଅଡ଼େ ଦାର୍‌ତିତି ବେବାରା ଗାଟାରି ତାନି ଦୁପ୍‌କାଟି ବାଡ଼କୁ ଗାଟାରି ଆହାମାନେରି ।”

୪ ଏଚେଟିଏ ନାନୁ ଲାକପୁରୁଟି ଅଡ଼େ ର ହାଡ଼ା ଏଲେ ଇଞ୍ଜିମାନାଣି ଝେଚେସ୍‌,

“ଏ ମା ଲକୁତେରି ! ଏଦାଆଁତାକି ଏଦାନି ତାଣାଟି ହଡ଼ା ଝାଡ଼ୁ !
ମୀରୁ ଏନିକ୍‌ ଏଦାନି ପାପୁତା ଆଶ୍‌ଅତେରି;
ଇଞ୍ଜା ତାନି ଡ଼ଣ୍ଡି ବାଗା ବେଟାଆଅତେରି;

☆ ୧୮:୨ ୧୮:୨ ଝେକ୍‌ହି ବଲ୍ଲୁ ୧୪:୮

୫ ଏନାଆଁତାକି ଇଚିହିଁ ଏଦାନି ପାପୁ ବାରେ ଲାକପୁରୁ ପାତେକା
ଏଜାମାନେ,
ଅଡ଼େ ଏଦି କିହାମାନି ଲାଗେଏତି କାମା ମାହାପୁରୁ ମନ୍ତା
ଅଣ୍ଠାମାନେସି ।

୬ ଏଦି ମିଙ୍ଗେ ଏନି କିହାମାଞ୍ଜାନେ ଏଲେକିଁ ମୀରୁ ଏଦାନାକି କିଦୁ;
ତାନି କିହାମାନାଣି କିହାଁ ରୀ ଗୁଣୁ ଝେବ୍‌ଦୁ,
ଏଦି ଆମିନି ସଲ୍ଲାତା କାଡ଼ ଆବ୍‌ହାମାନେ,
ଏମ୍‌ଆଁ ରୀ ଗୁଣୁ କାଡ଼ ତୁନି ସଲ୍ଲାତା ଆବ୍‌ଦୁ ।

୭ ଏଦି ଏଚେକା ତାନି ଗାଝୁରମି କିହାମାନେ ଅଡ଼େ ବଡ଼ପଣ ତଲେ
ମାଞ୍ଜାମାନେ,
ଏଲେକିଁ ଏଦାନାକି ଦୁକୁ କସ୍ତ ହୀଦୁ;
ଏନାଆଁତାକି ଇଚିହିଁ ଏଦି ଜାହାରାଇଁ ମନ୍ତା ଝେସା କଡ଼ିମାନେ,
‘ନାନୁ ରାଣି ଆହାଁ କୁଗାମାଇଁ,
ନାନୁ ରାଝେଣିତେଏଁ ଆଏ,
ନାଙ୍ଗେ ଏଚେଲାଝା ଦୁକୁ କିହାଲି ଆଏ ।’

୮ ଇଦାଣିତାକି ର ଦିନା ବିତ୍ରା ତଣ୍ଡ ପାଣ୍ଡନେ,
ଇଚିହିଁ ହାକି, ଡ଼ୀକି, ଅଡ଼େ କାର୍‌ଝୁ ଆଢ଼ନେ,
ଅଡ଼େ ଏଦି ହିଚୁତା ଝେହାହାନେ,
ଇଚିହିଁ ଏଦାନି ନୀହାଁୟି କିନାସି ପ୍ରୁ ମାହାପୁରୁ ବାରେ ବାଡ଼ୁରୁ
ଗାଟାସି ।”

୯ ଦାର୍‌ତିତି ବାରେ ରାଜାୟାଁ ତାନିତଲେ ଦାରିକାମା କିହାନା
ରାହାଁଟି ନୀତାମାନେରି, ଏଝାରି ଏଦାନି ହୁଡ଼ିମାନି ହିଚୁ ବୟିଁ
ମେହନେରି, ଇଞ୍ଜା ଏଦାନି ତାକି ଦୁକୁ ଆହାଁ ଡ଼ୀନେରି; ୧୦ ଏଝାରି
ଏଦାନି କାକୁଲିଟି ଆଜିତାକି ହେକ ନିଚାନା ଏଲେଇନେରି, “ଆୟଡ଼ା,
ଆୟଡ଼ା, କାଜା ଗାଡ଼ା, ବାଡ଼ୁରୁ ଗାଟି ଗାଡ଼ା ବାବିଲନ ନୀନୁ ବାକା
ପଣ୍ଡାତି, ଇଚିହିଁ ରଣ୍ଡିଏ ଗଂଟା ବିତ୍ରା ନୀ ତଣ୍ଡ ଝାଡ଼େ !”

୧୧ ଅଡ଼େ ଦାର୍‌ତିତି ବେବାରା ଗାଟାରି ଏଦାନି ତାକି ଦୁକୁ ଆହାଁ
ଡ଼ୀନେରି, ଏନାଆଁତାକି ଇଚିହିଁ ଆମ୍‌ଆରି ଏଝାରି ପାରନି ଦିଶ୍‌ସୁ
କଡ଼ଅରି, ୧୨ ଇଚିହିଁ ବାଂଗାରା, ଝେଣ୍ଡି, ଦାରା ଗାଟି ମଣି ଅଡ଼େ
ମୁନ୍ତାୟାଁ, ସିଲ୍‌କୁ ହିମ୍‌ରିକା, ହେୟାଁ ଝାଣାଗାଟି ହିମ୍‌ରିକା, ପାଟୁ

ହିମ୍ବରୀକା, ଏଟକା ଏଟକାତି ଅଜିତି ହିମ୍ବରୀକା, ଚନ୍ଦନ ଇଞ୍ଜା ଏଦାନି
ଲେହେଁତି ଗାନ୍ଧା ଗାଟି ମାରକା, ହାତି ପାଲକା, ଦାରା ଗାଟି ଝେସକା,
ପିତାଡ଼ା, ଲହ, ଅଜିତି ତୁସୁପା ଖାଲକାତଲେ କେପିତି ବାରେ ଆସ୍ତି ।
୧୩ ଡାକ୍ନି ସାଲି, ଗାନ୍ଧାଗାଟି ଆସ୍ତି, ଦୁପ୍ପଣି, ଗାନ୍ଧାଗାଟି ରୁବିନି ନିୟୁଁ,
ଗାନ୍ଧାଗାଟି ଦୁପ୍ପଣି, କାଡ଼ୁ ନିୟୁଁ, ଗୁଣ୍ଡା, ଗହଁ, କଡ଼ିୟାଁ, ମେଣ୍ଡାୟାଁ,
ଗଡ଼ାୟାଁ, ରାତାୟାଁ, କଡ଼ାମାନି ହଲିୟାଙ୍ଗା, ଅଡ଼େ ମାଣସିୟାଁତି ଜୀଝୁ
। ୧୪ “ନୀ ଜୀଝୁତି ଜୁପକା ଗାଟି ଅଶ୍ପୁତି ପାଡ଼େୟିକା ନୀ ତାଣାଟି
ମେଣ୍ଡାଙ୍ଗା ହାରୁ, ଅଡ଼େ ବାରେ ଡାକ୍ନାୟି, ରାହାଁତି ବାରେ ନୀ ତାଣାଟି
ଏଟକା କିଝି ଆହାଁ ନାସା ଆହାମାନେ, ଅଡ଼େ ଏରେଲାଝା ଏ ବାରେ
ମେଡ଼ା ଆୟେଏ !” ୧୫ ଈ ବାରେ ଦିଶସୁତି ବେବାରା କିନାରି ଏ
କାଜା ଗାଡ଼ା ତଲେ ବାଡ଼କୁ ଗାଟାରି ଆହାମାଚେରି, ଏଝାରି ଏଦାନି
କସ୍ତୁତି ଆଜିତାକି ହେକ ନିଚାନା ଦୁକୁ ତଲେ ଡ଼ାହଁ ଏଲେଇନେରି
। ୧୬ “ଆୟଡ଼ା ! କାଜା ଗାଡ଼ାତି ! ନିଙ୍ଗେତାକି ଏରେକା ଆଜିହପେତି
କସ୍ତୁ ଝାଡ଼େ, ନୀନୁ ଅଜିତି ହିମ୍ବରୀକା, ହେୟାଁ ଝାଣାଗାଟି ହିମ୍ବରୀକା,
ପାରୁ ହିମ୍ବରୀକା ହୁଚାମାଟି, ଅଡ଼େ ବାଂଗାରା, ଦାରାଗାଟି ମଣି ଇଞ୍ଜା
ମୁନ୍ଧାୟାଁ ତଲେ ମିଶସି ମାଟି ସାଜୁୟାଁ ତୁରହାମାଟି ! ୧୭ ଇତିହଁ
ରଣିଏ ଗଂଟା ବିତ୍ତା ଏ ବାରେ ଦନ ମେଣ୍ଡାଙ୍ଗାହାଚେ ।

ଏୟୁ ଜାଜାୟାଁ ସାଲୁଝି କିନାରି ଏମ୍ପାଆଁ କୁଗାମାନାରି ଡଂଗାୟାଁ
ସାଲୁଝି କିନାରି ଇଞ୍ଜା ସାମ୍ପୁରିତା ଇତାଲା ଆତାଲା ରେଜିହଁ
ବେବାରା କିନାରି ହେକ ନିଚାନା, ୧୮ ଏ ଗାଡ଼ାତି ହୁତିମାନି ହିରୁ ବୟଁ
ମେସାନା କାଜା ଗିୟାଁତଲେ ଏଲେଇନେରି, ଈ କାଜା ଗାଡ଼ା ଲେହେଁ
ଆମିନି ଗାଡ଼ାମାନେ । ୧୯ ଏଝାରି ତାମି ତାକାଁ ଲାକ ଦୁଡ଼ି ଡ଼ାଞ୍ଜା
କଡ଼ାନା ଦୁକୁ ତଲେ ଡ଼ାହି ଡ଼ାହଁ ଏଲେଇଚେରି, ଆୟଡ଼ା ଏ କାଜା
ଗାଡ଼ାତି, ନିଙ୍ଗେ ଏରେକା ଆଜିହପେତି ଡ଼ଣୁ ଆଡ଼େ, ନୀ ବାଡ଼କୁ ତଲେ
ସାମ୍ପୁରିତି ଜାଜାଣା ରେଜିହଁ ବାଡ଼କା ମାଚେରି, ନୀଏଁ ରଣିଏ ଗଂଟା
ବିତ୍ତା ଏ ବାରେ ମେଣ୍ଡାଙ୍ଗାହାଚେ !”

୨୦ ଲାକପୁରୁ, ମାହାପୁରୁ ଲକୁ, ପାଣୁଝି ଆହାମାନାଚେରି, ମାହାପୁରୁ
ଅଶ୍ପୁତି ବଲ୍ଲୁ ଝେହ୍ନାଚେରି ! ମୀରୁ ଏଦାନି ନାସା ଆନାଣି ତାକି
ରାହାଁ ଆଦୁ, ଏନାଆଁତାକି ଇତିହଁ ମାହାପୁରୁ ମିଙ୍ଗେ କିହା ମାଞ୍ଜାନାଣି
ତାକି ବାଦୁଲି ଅହାମାନେସି ।

୨୧ ଏଚେଟିଏ ତାୟୁ ର କାଜା ଦୁତୁ, ର ଜେତାଝାଲି ଲେହେଁତି ର ଝାଲି ସାମଦୁରି ଲାକ ମେଡ଼ହାନା ଏଲେଇଚେ, “ଇଲେକ୍ କାଜା ଗାଡ଼ା ବାବିଲନ ମେଡ଼ପି ଆନେ, ଅଡ଼େ ଏଡ଼ି ଏଚେଲାଝା ତଞ୍ଜା ଆଏ । ୨୨ ସେରଞ୍ଜିୟା ଅଡ଼େ ପାଡ଼ିନାରି ହାଡ଼ା, ପାରୁଡ଼ି ଉକିନାରି, ତୀଡ଼ି ଉକିନାରି ହାଡ଼ା ଏଚେଲାଝା ଏଦାନି ତାଣା ଝେଲେଏ, ନେହ୍ ନେହ୍ ସାଜୁ ଇଞ୍ଜା ଏଚକାତି ଆସ୍ତି କେପିନାରି ନୀ ତାଣା ତଞ୍ଜା ଆଅରି, ଅଡ଼େ ଜେତାଝାଲକା ତଲେ ନୁୟ୍ ନାୟି ଏଚେଲାଝା ହାଡ଼ା ଝେଲେଏ । ୨୩ ଦୀଝିୟାତି ଉଜେଡ଼ି ନୀ ତାଣା ଏଚେଲାଝା ତୁଞ୍ଜେଏ, ବାହା ଆନି ମାସ୍କା ଅଡ଼େ ବାହା ଆନି କକାରି ହାଡ଼ା ନୀ ତାଣା ଏଚେଲାଝା ଝେଲେଏ, ଏନାଆଁତାକି ଇଚିହ୍ ନୀ ତାଣା ବେବାରା କିନାରି ଦାରତିତା କାଜାରି ମାଚେରି, ଅଡ଼େ ନୀ ମାୟାମନ୍ତରତା ବାରେ କୁଡ଼ାତି ଲକୁ ମୁଞ୍ଜା ହାଜାମାଚେରି !”

୨୪ ଗାଡ଼ାତା ମାହାପୁରୁ ଅଶ୍‌ପୁତି ବଲ୍ଲୁ ଝେହ୍‌ନାରି, ମାହାପୁରୁ ଲକୁ ଇଞ୍ଜା ଦାରତିତା ପାୟିଝିଆହାମାନି ଲକୁତି ନେତେରି ଏଦାନି ତାଣା ତଞ୍ଜାଆହାମାଚେ ।

୧୯

୧ ଏଚେଟିଏ ଲାକପୁରୁ ର କାଜା ମାୟା ଲକୁତି ହାଡ଼ାଲେହେଁତି ର କାଜା ହାଡ଼ା ଏଲେଇଞ୍ଜିମାଚାଣି ଝେଚେଏ, “ହାଲେଲୁୟା ! ଗେଲ୍‌ପିନି, ଗାଝୁରମି ଅଡ଼େ କାଜାପାଣା ମା ମାହାପୁରୁଝାୟି । ୨ ଇଚିହ୍ ଏଝାଣି ନୀହାୟି ସାତା ଅଡ଼େ ନେହାୟି, ଆମିନି କାଜା ଦାଚେରି ତାନି ଦାରିକାମା ତଲେ ଦାରତିତି ଲକୁଣି ପଲ୍‌ଆ କିହାମାଚେ, ମାହାପୁରୁ ଏଦାନି ତଣ୍ଡ ହାହାନା ତାନି ହଲିୟାଞାଣି ପାୟିତି ନେତେରିତି ବାଦୁଲି ଅଡ଼େସି ।” ୩ ଅଡ଼େ ଏଝାରି ରୀ ପାଲି ଏଲେଇଚେରି “ହାଲେଲୁୟା ! ଏ ଗାଡ଼ା ଝେହିମାନି ବୟ୍ କାଲାକାଲାତାକି ହଡ଼େମାନେ ।” ୪ ଏଚେଟିଏ କଡ଼େ ସାରି ଜାଣା ପ୍ରାଚିନାଞା ଅଡ଼େ ସାରିଗଟା ଜନ୍ତୟା ମୁନୁ କୁତାନା ସିଂଗାସାଣିତା କୁଗାମାନି ମାହାପୁରୁଞ୍ଜି ଜହରା କିହାନା ଏଲେଇଚୁ, “ଆମେନ୍ ହାଲେଲୁୟା !”

ମେଣ୍ଡା ତାଲୁତି ବାହା ବଜି

୫ ଏଚିବେଲା ସିଂଗାସାଣିଟି ର ହାଡ଼ା ହଚାନା ଝେକ୍‌ଫେତେ, “ଏ ମାହାପୁରୁତି ହଲ୍ଲିୟାଙ୍ଗାତେରି, ଏଞ୍ଜାଣାକ୍ ଆଜିନି କାଜାରି ଇଚାରି ବାରେଜାଣା ତେରି ମାରୁ ମାହାପୁରୁକ୍ ଜହରା କିଦୁ ।”^୬ ଅଡ଼େ ନାନୁ କାଜା ମାନ୍ଦା ଲକୁ ଲେହେତି ହାଡ଼ା, ଲଦ ଲଦ ରିହିମାନି ଏୟ ଲେହେତି ହାଡ଼ା, ଅଡ଼େ ହାଗୁ ଗୁଣ୍‌ହିମାନି କାଜା ହାଡ଼ାଲେହେ ଏଲେଇଞ୍ଜି ଝେସିମାନାଣି ଝେଚେଏ, “ହାଲେଲୁୟା ! ଇଚିହି ପ୍ରବୁ ମା ଚାଡ଼ୟୁଗାଟି ମାହାପୁରୁ ରାଜା ଆହାନା ପାଣା ବେଟା ଆହାମାନେସି ।^୭ ଝାଦୁ ମାର ରାହା ଆନ, ଇଞ୍ଜା ଏଞ୍ଜାଣି ଗାଞ୍ଜୁରମି ତାକି ଏଞ୍ଜାଣାକ୍ ଜହରା କିନ, ଏନାଆଁତାକି ଇଚିହି ମେଣ୍ଡା ତାଲୁତି ବାହା ଆନି ଦିନା ଏଦାତେୟିଏ, ଇଞ୍ଜା ଏଞ୍ଜାସି ବାହା ଆନି ମାଙ୍ଗା ତିୟାରା ଆହାମାନେ ।^୮ ଏଦାନାକି ମୁହ୍‌ନି ଅଡ଼େ ଅପ୍‌ନି ହିମ୍‌ବି ହୁଚାଲି ହାପକି ଆଡୁ;” ଏ ଦବ୍‌ଲା ହିମ୍‌ବି ଇଚିହି ମାହାପୁରୁ ଲକୁତି ଦାମ୍‌ କାମାୟା ।

୯ ✧ଏଚିବେଲା ଦୂତୁ ନାଙ୍ଗେ ଏଲେଇଞ୍ଜାତେ, “ରାଡ଼ାମ୍, ଆମିନି ଗାଟାରି ମେଣ୍ଡା ତାଲୁତି ବାହା ବଜିତା ହାଟ୍‌କି ଆହାମାନେରି, ଏଞ୍ଜାରାକି ନେହେ ।” ଅଡ଼େ ଏଦି ନାଙ୍ଗେ ଏଲେଇଞ୍ଜାତେ, “ଇ ବାରେ ମାହାପୁରୁତି ସାତା ବଲ୍ଲୁ ।”^{୧୦} ଏଚେଟିଏ ନାନୁ ଏଦାନି ଜହରା କିହାଲି ତାନି କତାୟା ତୁଇ ରାତେଏ, ଏଚେଟିଏ ଏଦି ନାଙ୍ଗେ ଏଲେଇଞ୍ଜାତେ, ଜାଗ୍ରାତା, ଇଲେ କିଆନି, ନାନୁ ଜୀସୁ ଅଡ଼େ ମୀ ସାକି ଇଞ୍ଜା ମୀ ତାୟିୟା ତଲେ ର ହଲେଏଣା ଲେହେ; ନାନୁ ମାହାପୁରୁକ୍ ଜହରା କିମ୍, ଜୀସୁତି ସାକି ଏଦି ସାତା, ମାହାପୁରୁ ବଲ୍ଲୁ ଝେହ୍‌ନାରି ଜୀସୁ ।

ଦବ୍‌ଲା ଗଡ଼ା ମୁହେଁ କୁଗାମାନାସି

୧୧ ଏଚେଟିଏ ନାନୁ ଲାକପୁରୁତି ଦେପିଆହାମାନାଣି ମେସ୍‌ସେଏ, ଏମ୍‌ଆଁ ର ଦବ୍‌ଲା ଝାଣାଗାଟି ଗଡ଼ା ମାଚେ, ଏମ୍‌ଆଁ ହଚାମାନାଣି ଦରୁ ନାମାତାୟି ଅଡ଼େ ସାତାତାୟି; ଏଞ୍ଜାସି ନେହିଁକି ନାହାୟି କିନେସି, ଅଡ଼େ ଜୁଜୁ କିନେସି ।^{୧୨} ଏଞ୍ଜାଣି କାଣ୍‌କା ହିତୁ ଗୁଦ୍‌ଞ୍ଜା ଲେହେତାଇ, ତାନି ତାୟି ତୁ ହାରେକା ଚପେରିକା, ଅଡ଼େ ଏଞ୍ଜାଣି ର ଦରୁ ରାସ୍‌କି ଆହାମାନେ, ଏ ଦରୁ ଏଞ୍ଜାଣି ପିସ୍‌ପେ ଆମ୍‌ଆରି ପୁନଅରି ।^{୧୩} ଏଞ୍ଜାସି ନେତେରିତା ଉଡ଼ହା ମାନି ର ହିମ୍‌ବି ହୁଚାମାନେସି, ଇଞ୍ଜା ଏଞ୍ଜାଣି ଦରୁ

✧ ୧୯:୯ ୧୯:୯ ମାତି ୨୨:୨,୩

“ମାହାପୁରୁତି ବଲ୍ଲୁ ।” ୧୪ ଲାକପୁରୁତି ଦୁଇ କିନାରି ଅପ୍ତନି ଦବ୍‌ଲା ହିମ୍ବରକା ହୁତାନା ଦବ୍‌ଲା ଖାଣା ଗଡ଼ାୟାଁ ଲାକ କୁଗାନା ତାନି ଜେତ ହାରେ । ୧୫ ☆ଏଝାଣି ଗୁଡ଼ିତି ଖାସ୍ତି କାଣ୍ଡା ହନେ, ଏ କାଣ୍ଡାତଲେ ବାରେ ଦେସାତି ଲକୁଇଁ ଟୁଣନେସି; ଏଝାସି ଏଝାରାଇଁ ଲହ ବାଡ଼ଗା ତଲେ ସାଲୁଝି କିନେସି, ଅଡ଼େ ଏଝାସି ତାନୁଏ ବାରେ ବାଡ଼ମୁଗାଟି ମାହାପୁରୁ କାଜା କପା ଲେହେତି ଅଜ୍ଞୁରି ପାଡ଼େୟିକା ପୀତିନି ଗାଡ଼ମୁତା ମାନି ପାଡ଼େୟିକା ଝିହନେସି । ୧୬ ଏଝାଣି ହିମ୍ବରତା ଅଡ଼େ ଏଝାଣି କୁଦ୍‌ଗୁତା ଇ ଦରୁ ରାସ୍‌କି ଆହାମାନେ, “ରାଜା କିହାଁ ରାଜା ଅଡ଼େ ପ୍ରବୁ କିହାଁ ପ୍ରବୁ ।”

୧୭ ଏଚେଟିଏ ନାନୁ ର ଦୁଡୁଇଁ ଝେଡ଼ା ଲାକ ନିତାମାନାଣି ମେସେସ୍‌; ଏଡ଼ି ହାଗୁଡ଼ି ମାଦି ଉମ୍‌ମାନି ବାରେ ପଟାୟାଁଣି କାଜା ହାଡ଼ାତଲେ ହାଟାନା ଏଲେଇଚେ, “ଝାଦୁ ମାହାପୁରୁତି କାଜା ବଜିତା କୁଡ଼ା ଆଦୁ ! ୧୮ ଏନିକ୍ ମୀରୁ ରାଜାୟାଁ, ଦୁଇ ତାକି କାଜାରି, ବାଡ଼ମୁ ଗାଟାରି, ଗଡ଼ାୟାଁ ଅଡ଼େ ଗଡ଼ା ଲାକ କୁଗାମାନାରି, କତାମାନି ହଲିୟାଙ୍ଗା, ହଲିୟାଙ୍ଗା ଆଥାତାରି, କାଜାରି ଅଡ଼େ ଇଚାରି ବାରେତି ଉଙ୍ଗା ତିଝେରି !”

୧୯ ତାୟୁ ନାନୁ ଜନ୍ତତି ଅଡ଼େ ଦାରତିତି ରାଜାୟାଁଣି ଅଡ଼େ ଏଝାରି ଦୁଇ କିନାରାଇଁ, ଏଝାରି ଗଡ଼ାୟାଁ ଲାକ କୁଗାମାନାରି ଇଞ୍ଜାଁ ଏଝାରି ଦୁଇ କିନାରି କପାଟି ଦୁଇ କିହାଲି କୁଡ଼ା ଆହାମାନାଣି ମେସେସ୍ । ୨୦ ଏ ଦୁଇତା ଜନ୍ତ ଅଡ଼େ ଏଦାନି ନକିତା କାବାଆନି କାମା କିହିମାନି ଏ ନାଡ଼ିକିନି କ୍ରୀସ୍ତଇଁ ଆସାନା ଦସ୍‌ପିଆଡ଼େ । ଆମିନି ଲକୁତାଣା ଏ ଜନ୍ତତି ସିନା ମାଚେ ଇଞ୍ଜାଁ ଆମ୍ବାଆରି ଏଦାନି ବମାତି ପୂଜା କିହିମାଚେରି, ଜନ୍ତ ତାନି କାବାଆନି କାମା ତଲେ ଏଝାରାଇଁ ନାଡ଼ି କିହିମାଚେ । ଜନ୍ତ ଇଞ୍ଜାଁ ନାଡ଼ିକିନି କ୍ରୀସ୍ତଇଁ ଡ଼ାଞ୍ଜିମାନି ହିରୁତା ଜୀଝୁତଲେ ମେଡ଼ପିଆଡ଼େ । ୨୧ ଅଡ଼େ ଏଚେକା ଡ଼ୟିତି ଲକୁ ଗଡ଼ା ଲାକ କୁଗାମାନାଣି ଗୁଡ଼ିତି ହିଡ଼ମାନି କାଣ୍ଡାତଲେ ପାୟୁଝିଆଡ଼େରି; ଏଚେଟିଏ ବାରେ ପଟାୟାଁ ଏଝାରି ଉଙ୍ଗା ତିଞ୍ଜାନା ବାଣ୍ଡି ପାଞ୍ଜିତୁ ।

୨୦

ର ମାଣ୍ଡା ବାର୍ଯ୍ୟାତି ରାଜି କିନାୟି

୧ ଏଚେଟିଏ ନାନୁ ର ଦୁତୁଇଁ ଲାକପୁରୁଟି ରେଟା ଝାହିମାଟାଣି ମେସ୍‌ସେଏ, ଏଦାନି କେୟୁତା ତାଡ଼େପୁରୁ ଗାଡ଼ୟୁତି କୁଟିକାଡ଼ି ଅଡ଼େ ର କାଜା ହିକ୍‌ଣି ମାରୁ । ୨ ଏଡ଼ି କାଜା ରାଚୁତି, ଏ ପ୍ଲାଃଇ ନାଟା, ଇଟିହିଁ ଦିୟାବଲ ଅଡ଼େ ସୟତାନତି ଆସାନା ର ମାଣ୍ଡା ବାର୍ଯ୍ୟା ପାତେକା ଦସ୍‌ପା ଇଟିତେ । ୩ ଅଡ଼େ ଏଦାନି ତାଡ଼େପୁରୁ ଗାଡ଼ୟୁତା ମେଡ଼ହାନା ଗାଡ଼ୟୁତି ଦୁଖେରି ସୁଣ୍ଡାନା ଏଦାନି ଲାକ ହାକିତି ସୀଲି ଝେଡେ, ଇଞ୍ଜା ଏନିକ୍‌ହିଁ ଏଡ଼ି ର ମାଣ୍ଡା ବାର୍ଯ୍ୟା ରାଆ ପାତେକା ଦେସାତି ଲକୁଣି ନାଡ଼ି କିହାଲି ଆଡେଏ; ଅଡ଼େ ତାୟୁ ଗାଡ଼େକା ତାକି ପିସ୍‌ପି କିୟାଲି ଆନେ ।

୪ ଏଚେଟିଏ ନାନୁ ଏଚରଗଟା ସିଂଗାସାଣିୟାଁ ମେସ୍‌ସେଏ, ଏ ବାରେ ଲାକ ଏଚରଜାଣା କୁଗିତେରି, ଏଝାରାକି ନୀହାଁୟି କିହାଲି ଅଦିକାରା ହୀପକିଆଡେ, ଅଡ଼େ ଜୀସୁତି କାତା ଇଞ୍ଜା ମାହାପୁରୁତି ବଲ୍ଲୁ ତାକି ଆମ୍ବାଆରି ତାର୍କା ଦାପି ଆହାମାରୁ, ଇଞ୍ଜା ଆମ୍ବାଆରି ଏ ଜନ୍ତୁ ଅଡ଼େ ତାନି ବମାତି ଜହରା କିହାଁ ହିଲାଆତେରି ଅଡ଼େ ତାନି ସିନାତି ମୁଞ୍ଜୁତା କି କେୟୁତା ବେଟାଆହା ହିଲାଆତେରି, ଏଝାରି ଜୀଝୁୟାଁ ମେସ୍‌ସେଏ; ଏଝାରି ଝେଶ୍‌ଶେ ନୀତାନା କ୍ରୀସ୍ତ ତଲେ ର ମାଣ୍ଡା ବାର୍ଯ୍ୟା ପାତେକା ସାଲ୍‌ଝି କିତେରି । ୫ ଅଡ଼େ ଏଚେକା ହାଡ଼ି ଲକୁ ଏ ର ମାଣ୍ଡା ବାର୍ଯ୍ୟା ରାଆ ପାତେକା ନୀତାଆତେରି, ଇଦିଏ ତଲିତି ହାକିଟି ନିଜିନାୟି । ୬ ଆମ୍ବାଆରି ମୂଲୁ ଝେଶ୍‌ଶେ ନିଜିନି ତାଣା ଆଣ୍ଡିନେରି ଏଝାରି ନେହେଁ, ଅଡ଼େ ଏଝାରି ସୁଦୁଗାଟାରି; ଅଡ଼େ ଏଝାରି ମୁହେଁ ତାୟୁତି ହାକିତି ଏନି ଅଦିକାରା ହିଲେଏ, ସାମା ଏଝାରି ମାହାପୁରୁ ଅଡ଼େ କ୍ରୀସ୍ତ ପୂଜେରାଜା ଆହାନା ଏଝାଣିତଲେ ର ମାଣ୍ଡା ବାର୍ଯ୍ୟା ପାତେକା ସାଲ୍‌ଝି କିନେରି ।

ସୟତାନତି ହାର୍‌ଝି ଆନାୟି

୭ ଏ ର ମାଣ୍ଡା ବାର୍ଯ୍ୟା ରାଡ଼ିସାରେ ସୟତାନ ଦସ୍‌ପି ଆହାମାତି ଇଲୁଟି ପିସ୍‌ପି ଆନେ । ୮ ଏଚେଟିଏ ସୟତାନ ଦାର୍‌ତିତି ସାରିସୁଟୁ ମାନି ଦେସାତାରାଇଁ ଇଟିହିଁ ସାମ୍‌ଦୁରିତି ବାଃଲି ସମାନା ହାଡ଼େକା ଗର୍ ଅଡ଼େ ମେଗର୍ ଏଝାରାଇଁ ନାଡ଼ିକିହାନା ଜୁଜୁ ତାକି କୁଡ଼ିକିହାଲି

ହରାହାନେ । ୯ ଏଞ୍ଜରୀ ଦାର୍ତ୍ତିତି ସାରିସୁରୁ ହାଜାନା ମାହାପୁରୁ ଲକୁ ବାସାଆନ୍ତି ତାଣା ଅଡ଼େ ମାହାପୁରୁ ଜୀଝୁ ନହାଁମାନି କାଜା ଗାଡ଼ାତା ମୁଚିତେରି, ଏଚିବେଲା ଲାକପୁରୁଟି ହିରୁ ରିହାନା ଏଞ୍ଜରାଇଁ ନାସା କିତେ । ୧୦ ଆମିନି ସୟତାନ ଏଞ୍ଜରାଇଁ ନାଡ଼ି କିହାମାତେ, ଏଦାନି ହିରୁ ଅଡ଼େ ଗାନ୍ଦାରୁଣ୍ଡା ତଲେ ଡ଼ୀଞ୍ଜିମାନି ଗାଡ଼ୁୟୁତା ମେଡ଼ପିଆଡ଼େ, ଏମ୍ବାଆଁ ଏ ଜନ୍ତ ଇଞ୍ଜା ମାହାପୁରୁ ବଲ୍ଲୁ ମିଚି ଝେହ୍‌ନାସି ଜିକେଏ ମାନେସି; ଅଡ଼େ ଏଞ୍ଜରୀ ଏମ୍ବାଆଁ ଲାଆଁ ମାଦେନା କାଲାକାଲା ତାକି ଡ଼ଣ୍ଡ ବେଗାଆନେରି ।

ରାନି କାଲାତି ନୀହାଁୟି

୧୧ ଏଚେଟିଏ ନାନୁ ର କାଜା ଦବ୍‌ଲା ସିଂଗାସାଣି ଇଞ୍ଜା ଏମ୍ବାଆଁ ରଅସି କୁଗାମାନାଣି ମେସ୍‌ସେସ୍; ଏଞ୍ଜାଣି ନକିଟି ଦାର୍ତ୍ତି ଅଡ଼େ ହାଗୁପାକା ହଟାଡୁସ୍ତୁ ଏଞ୍ଜାସିକାକି ଅଡ଼େ ଚାୟୁ ମେଡ଼ା ଆଆଡେ । ୧୨ ଅଡ଼େ ନାନୁ ଇଚାରି କାଜାରି ବାରେ ହାଡ଼ାରାଇଁ ସିଂଗାସାଣି ନକିତା ନିଚାମାନାଣି ମେସ୍‌ସେସ୍, ଅଡ଼େ ପତିୟାଁ ବାରେ ଦେପିଆଡୁ; ତାୟୁ ଜୀଝୁପତି ଇଞ୍ଜା ଅଡ଼େ ର ପତି ଦେପିଆଡେ; ଏ ପତିଣାଁ ରାସ୍‌କି ଆହାମାନି ଲେହେଁ ହାଡ଼ାରି ତାମି କିତି କାମା ଲେହେଁ ନୀହାଁୟି କିଝି ଆଡେରି । ୧୩ ସାମ୍‌ଦୁରି ତାନିତାଣାଟି ହାଡ଼ାରାଇଁ ହେରପିତେ, ଇଞ୍ଜା ହାକି ଅଡ଼େ ତାଡ଼େପୁରୁ ତାନି ତାଣା ହାଡ଼ାରାଇଁ ହେରପିତୁ; ଇଞ୍ଜା ଏଞ୍ଜରୀ ବାରେ ତାମି କିତି କାମା ଲେହେଁ ନୀହାଁୟି କିଝି ଆଡେରି । ୧୪ ଏଚେଟିଏ ହାକି ଅଡ଼େ ତାଡ଼େପୁରୁଟି* ହିରୁତଲେ ଡ଼ୀଞ୍ଜିମାନି ଗାଡ଼ୁୟୁତା ମେଡ଼ପିଆଡେ, ଇ ତାୟୁତି ହାକି ଇଚିହ୍ ହିରୁ ଗାଡ଼ୁୟୁ । ୧୫ ଆମ୍ବାଆରି ଦରୁ ଜୀଝୁତି ପତିତା ରାସ୍‌କି ଆହା ହିଲାଆଡେ ଏଞ୍ଜରାଇଁ ଡ଼ୀଞ୍ଜିମାନି ହିରୁ ଗାଡ଼ୁୟୁତା ମେଡ଼ପିଆଡେ ।

୨୧

ପୁଃନି ହାଗୁପାକା ଅଡ଼େ ପୁଃନି ଦାର୍ତ୍ତି

୧ *ଏମ୍ବାଟିଏ ନାନୁ ର ପୁଃନି ହାଗୁପାକା ଅଡ଼େ ପୁଃନି ଦାର୍ତ୍ତି ମେସ୍‌ସେସ୍, ଇଚିହ୍ ତଲିତି ହାଗୁପାକା ଅଡ଼େ ତଲିତି ଦାର୍ତ୍ତି

* ୨୦:୧୪ ୨୦:୧୪ ହାଡ଼ାରି ମାନି ଦେସାତି ☆ ୨୧:୧ ୨୧:୧ ୨ପିତ ୩:୧୩

ମେଣ୍ଟା ହାଜାମାରେ, ଇଞ୍ଜା ସାମ୍‌ଦୁରି ଅଡ଼େ ହିଲାଆଡେ ।^୨ *ଅଡ଼େ ନାନୁ ସୁଦୁ ଗାଡ଼ା ଇଚିହିଁ ପୁଝନି ଜିରୁସାଲମତା ତାନି ବାହା ଆନି ତକ୍ରାଇ ବେଟାଆୟାଲି ତିୟାରା ଆହାମାନି ତାଆ ମାକ୍‌ମାଲେହେଁ ଲାକପୁରୁତି ମାହାପୁରୁ ତାଣାଟି ରେତାଝାହି ମାଚାଣି ମେସ୍‌ସେଏଁ ।^୩ ଅଡ଼େ ନାନୁ ସିଂଗାସାଣିଟି ର କାଜା ହାଡ଼ା ଏଲେ ଇଞ୍ଜିମାଚାଣି ଝେରେଏଁ, “ମେହ୍‌ଦୁ ମାଣ୍‌ସିୟାଁ ତାଣା ମାହାପୁରୁତି ବାସାଟାୟା ମାନେ, ଏଝାସି ଏଝାରିତଲେ ବାସା ଆନେସି, ଇଞ୍ଜା ଏଝାରି ଏଝାଣି ଲକୁ ଆନେରି,^୪ ଅଡ଼େ ମାହାପୁରୁ ତାନୁଏ ଏଝାରିତଲେ ଡୟିନେସି, ଇଞ୍ଜା ଏଝାରି କାନୁତି ବାରେ କାଣ୍ଡୁ ଜେଜାତୁହନେସି; ଏମ୍‌ଆଁ ହାକି ଅଡ଼େ ଝାଏ; ଦୁକୁ, ତାକି, ଇଞ୍ଜା ବାସା ଅଡ଼େ ଡୟେଏ; ଇଚିହିଁ ପୁଝଆୟି ବାରେ ମେଣ୍ଟା ହାଜାମାନେ ।”

* ଏଚେଟିଏ ସିଂଗାସାଣିତା କୁଗାମାନାସି ଏଲେଇଚେସି, “ମେହ୍‌ମୁ ନାନୁ ବାରେ ପୁଝନି କିହିମାଲ୍ !” ଅଡ଼େ ଏଝାସି ଏଲେଇଞ୍ଜାଡେସି, “ରାଡ଼ାମ୍, ଏନାଆଁତାକି ଇଚିହିଁ ଇ ବାରେ କାତା ସାତାତାୟି ଅଡ଼େ ନାମୁଗାଟାୟି ।”^୬ ଏଝାସି ନାଜେ ଅଡ଼େ ଏଲେଇଞ୍ଜାଡେସି, “ବାରେ ରାଡେୟିଏ, ନାନୁ ଆଲ୍‌ପା ଅଡ଼େ ଅମେଗା, ମାଟ୍‌ନାଡେଏଁ ଅଡ଼େ ରାପ୍‌ନାଡେଏଁ, ଆମ୍‌ଆସି ଏସ୍‌କି ଗାଟାସି ଏଝାଣାକି ଜାଝୁହାନି ଜାର୍‌ଣାଟି ତାବୁୟାଁ ହାଆନା ଏୟା ଗସାଲି ହାଲ୍ ।^୭ ଆମ୍‌ଆସି ଜାଣା ଆନେସି, ଏଝାସି ଇ ବାରେତି ଅଦିକାରା ଆନେସି; ନାନୁ ଏଝାଣି ମାହାପୁରୁ ଆଲ୍, ଇଞ୍ଜା ଏଝାସି ନା ମାର୍‌ଏସି ଆନେସି ।^୮ ସାମା ଆମ୍‌ଆରି ଆଜିନାରି, ନାମୁ ହିଲାଆ ଗାଟାରି, ଅପାଆଗାଟି କାମାକିନାରି, ଲକୁଣି ପାୟିନାରି, ଦାରି କିନାରି, ଗୁଣି ଗାରଡ଼ି କିନାରି, ପେଣ୍‌କା ବମାୟାଁ ପୂଜା କିନାରି, ଏଝାରି ଅଡ଼େ ବାରେ ମିଟି କାତା ଝେହ୍‌ନାରି, ହିତୁ ଅଡ଼େ ଗାନ୍‌ଗୁଣ୍ଡା ତଲେ ଡାଞ୍ଜିମାନି ଗାଡ଼ୁୟାତା ଟାୟା ବେଟାଆନେରି, ଏଡ଼ି ତାୟାତି ହାକି ।”

ପୁଝନି ଜିରୁସାଲମ

^୯ ଏଚେଟିଏ ସାତାଗଟା ଦୁତୁୟାଁ ତାୟାତି ସାତାଗଟା ତଣ୍ଡୁୟାଁଲ୍ ଆସାମାନି ସାତାଗଟା ଗିନାୟାଣା ସାତାଗଟା ଦୁତୁୟାଁ ବିତ୍ରାଟି ର

ଦୂତ ନା ତାଣା ଖାହାନା ଏଲେଇଞ୍ଜାତେ, “ଇମ୍ପାଆଁ ଖାମ୍, ବାହା ଆହିମାନି ତାଆମାଙ୍ଗା ଇଚିହିଁ ମେଣ୍ଡା ତାଲୁତି ଡକ୍ରିନି ନିଙ୍ଗ ତସ୍ତାଇଁ ।”^{୧୦} ଏଚେଟିଏ ଏ ଦୂତ ନାଙ୍ଗେ ସୁଦୁଜୀଝୁ ବାଡ଼ମୁଟି ର କାଜାୟି ଅଡ଼େ ପାତାଆଡ଼ି ହରୁତା ଅହାନା ଏ ସୁଦୁ ଗାଡ଼ା ଜିରୁସାଲମତି ତସ୍ତାତେ, ଏଦି ଲାକପୁରୁଟି ଇଚିହିଁ ମାହାପୁରୁ ତାଣାଟି ରେଚା ଖାହିମାଚେ,^{୧୧} ଅଡ଼େ ଏଦି ମାହାପୁରୁଟି ଗାଝୁରମି ତଲେ ମୁସିମାଚେ, ଏଦାନି ଉଜେଡ଼ି ହାଚେକା ଦାରାଗାଟି ମଣି ଅଡ଼େ ଝେଡ଼ାତି ଅପ୍ନି ଦାପେଣିଲେହେଁ ।^{୧୨} ଏଦାନି ସାରିସୁଟୁ ର କାଜାୟି ଅଡ଼େ ପାତାଆଡ଼ି କଟା ମାନେ, ଏମ୍ପାଆଁ ବାରଗଟା ଦୁଝେରିକା, ଏ ଦୁଝେରିକାଣା ବାରଜାଣା ଦୁତୁୟାଁ ଇଞ୍ଜା ଦୁଝେରିକା ଲାକ ଇସାୟେଲ ମୀରକାତି ବାର କୂଡ଼ାତି ଦରକା ରାସ୍ତକି ଆହାମାନେ ।^{୧୩} ଝେଡ଼ା ହପୁଝାକି ତାନିଗଟା ଦୁଝେରିକା, ଚିଃନିଝାକି ତାନିଗଟା ଦୁଝେରିକା, ଚେବୁଝାକି ତାନିଗଟା ଦୁଝେରିକା, ଅଡ଼େ ଝେଡ଼ା କୂଡ଼ନି ଝାକି ତାନିଗଟା ଦୁଝେରିକା ।^{୧୪} ଏ ଗାଡ଼ାତି କଟା ବାରଗଟା ପୁନାଦିକା ଇଚିକି ଆହାମାନୁ, ଏ ଝାଲକା ଲାକ ମେଣ୍ଡା ତାଲୁ ତାଣାଟି ବାରଜାଣା ପାଣ୍ଡୁଝି ଆହାମାନାରି ବାରଗଟା ଦରକା ରାସ୍ତକି ଆହାମାନୁ^{୧୫} ନା ତଲେ କାତା ଆହିମାଟି ଦୂତୁତି କେୟୁତା ଗାଡ଼ାତି, ଇଞ୍ଜା ଏମ୍ପାତି ଦୁଝେରିକା ଅଡ଼େ ସାରିସୁଟୁଟି କଟା ଲାଟାଲି ର ବାଂଗାରା ବାଡ଼ଗା ମାଚେ ।^{୧୬} ଏ ଗାଡ଼ା ସାରି କନ, ତାନି ଲାମ୍ପା ଅଡ଼େ ଅସାରା ରଣ୍ଡିଏ ସମାନା; ଏଝାସି ଏ ଗାଡ଼ାତି ଏ ବାଡ଼ଗା ତଲେ ଲାଟାଲିଏ ବାର ମାଣା ବାଡ଼ଗା ଆଡେ; ଏମ୍ପାତି ଲାମ୍ପା ଅସାରା ଅଡ଼େ ପାଡ଼ଣି ଜିକେଏ ସମାନା ଆଡେ ।^{୧୭} ଅଡ଼େ ଡାୟୁ ଏଦି ଗାଡ଼ାତି ସାରିସୁଟୁ କଟା ଲାଟାଲିଏ ଏଦି ମାଣ୍ଡିସିତି ଲେକାତଲେ ସାଡ଼ାକଡ଼ି ସାରି ହାଡ଼ା ଆଡେ, ଦୂତୁ ଏ ଲେକାତଲେ ଲାଟି ମାଚେ ।^{୧୮} ଏ ସାରିସୁଟୁଟି କଟା ଝେଡ଼ାତି ଅପ୍ନି ଦାପେଣି ଲେହେଁତି ମଣି ତଲେ କେପି ଆହାମାନେ, ଅଡ଼େ ଗାଡ଼ା ଅପ୍ନି ଦାପେଣି ଲେହେଁତି ସୁଦୁ ବାଂଗାରା ତଲେ କେପି ଆହାମାନେ ।^{୧୯} ଗାଡ଼ାତି ସାରିସୁଟୁ କଟାଟି ପୁନାଦି ଏଚକା ଏଚକାତି ହାଚେ ଦାରାଗାଟି ମଣି ଝାଲକାତଲେ ଅଜିକିଝି ଆହାମାନେ, ତଲିତି ପୁନାଦି ଜାସପର, ରୀ ଲମ୍ବର ପୁନାଦି ନିଲକାନ୍ତମଣି, ତାନି ଲମ୍ବର ପୁନାଦି ବଦୁଜ୍ୟମଣି, ସାରି ଲମ୍ବର ପୁନାଦି ମରକତମଣି,^{୨୦} ପାସା ଲମ୍ବର ପୁନାଦି ପଲକମଣି, ସ ଲମ୍ବର ପୁନାଦି ମାଣିକ୍ୟ

ମଣି, ସାତା ଲମ୍ବର ପୁନାଦି ପୁସ୍‌ପରାଗମଣି, ଆଟା ଲମ୍ବର ପୁନାଦି ପିରଜମଣି, ନ ଲମ୍ବର ପୁନାଦି ଗମେସଦକ ମଣି, ଦସ ଲମ୍ବର ପୁନାଦି ଇସ୍‌ନିୟମଣି, ଏଗାର ଲମ୍ବର ପୁନାଦି ଦାର୍‌ଶକି ଖାଣାଗାଟି ମଣି, ବାର ଲମ୍ବର ପୁନାଦି ନେହଁ ଗାନ୍ଧାଗାଟି ମଣି ମାତେ । ୨୧ ବାର ଗଟା ଦୁଝେରିକାଣା ବାରଗଟା ମୁକ୍ତାୟା, ର ଦୁଝେରିତି ର ମୁକ୍ତା ତଲେ କେପି ଆହାମାନୁ; ଅଡ଼େ ଗାଡ଼ାତି ଆଂଗେଣିକା ନେହଁ ଦାପେଣି ଲେହେଁତି ସୁଦୁ ବାଂଗାରା ତଲେ ଆହାମାନୁ ।

୨୨ ନାନୁ ଏ ଗାଡ଼ାତା ଏନ୍ତି ଦେଝୁଡ଼ି ଜିକେଏ ମେହୁଆଡେଏ, ଇତିହଁ ପ୍ରବୁ ବାରେ ବାଡ଼ୁୟୁ ଗାଟି ମାହାପୁରୁ ଅଡ଼େ ମେଣ୍ଡା ଡାଲୁଏ ଏମ୍ବାତି ଦେଝୁଡ଼ି ସମାନା । ୨୩ ଉଜେଡ଼ି ତାକି ଏମ୍ବାଆଁ ଝେଡ଼ା କି ଲେଞ୍ଜୁତି ଲଡ଼ା ଆଏ, ଇତିହଁ ମାହାପୁରୁତି ଗାଝୁରମିଏ ଏମ୍ବାଆଁ ଉଜେଡ଼ି କିନେ, ଅଡ଼େ ମେଣ୍ଡା ଡାଲୁ ଏମ୍ବାତି ଦୀଝଁ ସମାନା । ୨୪ ଏମ୍ବାତି ଉଜେଡ଼ି ତଲେ ବାରେ ଦାର୍‌ତିତି ଲକୁ ତାକିନେରି, ଅଡ଼େ ଦାର୍‌ତିତି ରାଜାୟା ତାମି ହାରେକା ଦନ ଏ ଗାଡ଼ା ବିତ୍ରା ତାନେରି । ୨୫ ଏମ୍ବାତି ଦୁଝେରିକା ମାଦେନା ବେଲା ଦେପି ଆହାଁ ଡ଼ୟିନୁ; ଏଝି ଏତେଲା ଜିକେଏ ସୁଖୁକି ଆଉ, ଇତିହଁ ଏ ଗାୟୁତା ଲାଆଁୟାଁ ଇନାୟି ହିଲେଏ । ୨୬ ବାରେ କୃଡ଼ାତି ଲକୁ ତାମି ଗାଝୁରମି ଅଡ଼େ ହାରେକା ଦନ ଏ ଗାଡ଼ାତା ତାନେରି । ୨୭ ଏନ୍ତି ପଲୁଆ ଗାଟାରି କି ଅପାଆଗାଟି କାମାକିନାରି, ମିଟି ଜଲିନାରି ଆମ୍ବାଆରି ଏମ୍ବାଆଁ ହଡ଼ାଲି ଆଡ଼ଅରି; ସାମା ଆମ୍ବାଆରି ଦରୁ ମେଣ୍ଡା ଡାଲୁତି ଜୀଝୁତି ପତିତା ରାସ୍‌କି ଆହାମାନେ, ଏଝାରି ହଡ଼ାଲି ଆଡ଼ିନେରି ।

୨୨

୧ ଡାୟୁ ଦୂଡୁ ନାଙ୍ଗେ ଜୀଝୁହାନି ଏୟୁତି ର କାଡ଼ା ତସ୍ତାଡେସି, ଏଡ଼ି ଅପୁନି ଦାପେଣିଲେହେଁ ଉଜେଡ଼ି, ଅଡ଼େ ମାହାପୁରୁ ଇଞ୍ଜା ମେଣ୍ଡା ଡାଲୁତି ସିଂଗାସାଣିଟି ହଚାନା ଗାଡ଼ାତି ଜିରୁ ମାଦିଟି ହାଜିମାନେ । ୨ ଏ କାଡ଼ାତି ରିକଝାକି ବାର ଦେବା ପାଡ଼େୟି ଆୟିନି ଜୀଝୁତି ମାରୁନୁ ମାନେ, ଏମ୍ବାଆଁ ଲେଞ୍ଜୁ ତାକି ଲେଞ୍ଜୁ ପାଡ଼େୟି ଆୟିନେ, ଇଞ୍ଜା ଏ ମାରୁନୁତି ଆକା ବାରେ କୃଡ଼ାତାରାଇ ରଗଟି ନେହଁ କିନାଇ ।

୩ ଏମ୍ବାଆଁ ଏନ୍‌ି ବାକା ଡ଼ୟେଏ, ମାହାପୁରୁ ଅଡ଼େ ମେଣ୍ଡା ଡାଲୁତି ସିଂଗାସାଣି ଗାଡ଼ା ମାଦିଏ ଡ଼ୟିନେ, ଇଞ୍ଜା ଏଞ୍ଜାଣି ହଲିୟାଙ୍ଗା ଏଞ୍ଜାଣି ସେବା କିନେରି । ୪ ଏଞ୍ଜାରି ତାନି ମୁମ୍ବୁ ମେହ୍‌ନେରି, ଇଞ୍ଜା ତାନି ଦରୁ ଏଞ୍ଜାରି ମୁଞ୍ଜୁତା ରାଡ଼ିନେସି । ୫ ଏମ୍ବାଆଁ ଲାଆଁୟାଁ ଆଏ, ଏଞ୍ଜାରାକି ଦୀଞ୍ଜି କି ଝେଡ଼ାତି ଉଜେଡ଼ି ଲଡ଼ା ଆଏ, ଇଚିହିଁ ପ୍ରବୁ ମାହାପୁରୁ ଏଞ୍ଜାରି ମୁହେଁ ଉଜେଡ଼ି ଲେହେଁ ଆନେସି, ଇଞ୍ଜା ଏଞ୍ଜାରି କାଲ୍‌କାଲ୍‌ ତାକି ରାଜି କିନେରି ।

ଜୀସୁ ଝେଣ୍ଡା ଖାନାୟି

୬ ଏଚେଟିଏ ଦୂତୁ ନାଙ୍ଗେ ଏଲେଇଚେସି, “ଇ ବଲୁ ସାତା ଇଞ୍ଜା ନାମୁଗାଟାୟି; ଏନାୟି ଗାଡ଼େକେଏ ଗଟଞ୍ଜି ଆନେ, ଏ ବାରେ ତାନି ସେବା କିନାରାଇଁ ତସାଲି ତାକି, ପ୍ରବୁ, ମାହାପୁରୁ ଅଣ୍‌ପୁତି ବଲୁ ଝେହନାରି ଜୀଞ୍ଜୁୟାଁତି ମାହାପୁରୁ, ତାନି ଦୂତୁଇଁ ପାଣ୍ଡାମାଞ୍ଜାନେସି ।”

୭ “ମେହ୍‌ମୁ ନାନୁ ତବେ ଖାହିମାଇଁ; ଆମ୍ବାଆସି ଇ ପତିତି ବଲୁତି ମାନଞ୍ଜି ଆନେସି ଏଞ୍ଜାସି ନେହେଁ ।”

୮ ନାନୁ ଜହନତେଏଁ, ଇ ବାରେ ଝେଟି ଅଡ଼େ ମେସି ଡାୟୁ ଆମିନି ଦୂତୁ ନାଙ୍ଗେ ଏ ବାରେ ତସାତେ, ନାନୁ ଏଦାନି ଜହରା କିହାଲି ତାନି ପାଞ୍ଚଆନା କଡାଣା ରାତେଏଁ । ୯ ସାମା ଏଡ଼ି ନାଙ୍ଗେ ଏଲେଇଞ୍ଜାତେ, “ଜାଗ୍ରାତା ଏଲେକିଆନି, ନାନୁ ଜିକେଏ ନୀ ତଲେ ମାହାପୁରୁ ଅଣ୍‌ପୁତି ବଲୁ ଝେହ୍‌ନି ନୀ ତାୟିୟାଁ ତଲେ, ଅଡ଼େ ଇ ପତିତା ରାସ୍‌କି ଆହାମାନି ବଲୁତି ବାରେ ମାନଞ୍ଜି ଆନାରି ତଲେ ର ହଲେଏଣା ଲେହେଁ; ମାହାପୁରୁଇଁ ଜହରା କିମୁ ।” ୧୦ ଅଡ଼େ ଏଡ଼ି ନାଙ୍ଗେ ଏଲେଇଞ୍ଜାତେ, “ନାନୁ ଇ ପତିତି ଡାୟୁ ଗଟଞ୍ଜି ଆନି ବଲୁତି ସୀଲି କିଆନି, ଏନାଆଁତାକି ଇଚିହିଁ କାଲ୍‌ମି ଏଦାତେୟିଏ । ୧୧ ଆମ୍ବାଆସି ଦାମ୍‌ ହିଲ୍‌ଆଗାଟାସି, ଏଞ୍ଜାସି ଅଡ଼େ ଦାମ୍‌ ହିଲ୍‌ଆ କାମା କିପାସି, ଆମ୍ବାଆସି ଲାଗେଏ କାମା କିନେସି, ଏଞ୍ଜାସି ଅଡ଼େ ଲାଗେଏ କାମା କିପାସି, ଆମ୍ବାଆସି ଦାମ୍‌ଗାଟାସି, ଏଞ୍ଜାସି ଅଡ଼େ ଦାମ୍‌ଗାଟାସି ଆପେସି, ଆମ୍ବାଆସି ସୁଦୁଗାଟାସି, ଏଞ୍ଜାସି ଅଡ଼େ ସୁଦୁ ଆପେସି ।”

୧୨ “ମେହ୍‌ମୁ, ନାନୁ ତବେ ଖାହିମାଇଁ, ବାରେଜାଣା ତାକି ତାନି କାମାତି ଲେକାତଲେ ପାଡ଼େୟି ହୀହାଲି ନା ଦାନା ନା ଡାଣା ମାନେ

। ୧୩ ☆ନାନୁ ଆଲ୍‌ପା ଅଡ଼େ ଅମେଗାତେଏଁ, ନକିତାତେଏଁ ଇଞ୍ଜା ଡାୟୁତାତେଏଁ, ମୂଲୁତାତେଏଁ ଅଡ଼େ ରାପ୍‌ନାତେଏଁ ।”

୧୪ ଜୀଝୁତି ମାର୍‌ନୁତି ଅଦିକାରା ଆୟାଲି ଅଡ଼େ ଦୁଝେରିତି ଗାଡ଼ାତା ହଡ଼ାଲି ତାକି ଆମ୍ବାଆରି ତାମି ହିମ୍‌ବିକା ରାଟାମାନେରି ଏଝାରି ନେହେଁ । ୧୫ ସାମା ରେଜିମାନି ନେସକା ଲେହେଁତାରି, ଗୁଣି ଗାର୍‌ଡ଼ି କିନାରି, ଦାରିକାମା କିନାରି, ଲକୁଣି ପାୟିନାରି, ପେଶକା ବମାୟାଣି ପୂଜା କିନାରି, ମିଚିକାତାତି ଜୀଝୁ ନନାରି, ମିଚି କାମାତି କିହାଲି ରାହାଁ ଆନାରି ବାରେ ପାଙ୍ଗାତା ତ୍‌ୟିନେରି ।

୧୬ “ନାନୁ ଜୀସୁତେଏଁ, ମାହାପୁରୁ କୁଲମିକା ତାକି ମିଙ୍ଗେ ଇ କାତା ଝେସାଲି ନା, ଦୁଡୁଇଁ ପାଣ୍ଡାମାଞ୍ଜାଇଁ, ନାନୁଏ ଦାଝୁଦତି ମୂଲୁ ଅଡ଼େ କୂଡ଼ାତାତେଏଁ; ଏ ଉଜେଡ଼ିତି ଝେୟାଜାରା ହୁକାତେଏଁ ।”

୧୭ ସୁଦୁଜୀଝୁ ଅଡ଼େ ବୀହା ଆନି ଡ଼ାଆ ମାଙ୍ଗା ଏଲେଇନେ, “ଝାମ୍ବୁ !”

ଆମ୍ବାଆସି ଝେନେସି ଏଝାସି ଏଲେଇଶ୍‌ମ୍ବାସି, “ଝାମ୍ବୁ !”

ଏସକି ଗାଟାସି, ଝାପାସି, ଆମ୍ବାଆସି ମନ କିନେସି; ଏଝାସି ଜୀଝୁହାନି ଏୟୁ ଉଜେଏ ଗସ୍‌ପେସି ।

ରାନି କାତା

୧୮ ଆମ୍ବାଆରି ଇ ପତିତା ମାନି ଡାୟୁ ଗଟଝିଆନି କାତାତି ଝେନେରି, ନାନୁ ଏଝାରାଇଁ ଜାଗ୍ରାତା କିହଁ ଝେସିମାଇଁ, ଆମ୍ବାଆସି ଇ ପତିତା ଏନାଆଁ ଆଟ୍‌ନେସି, ଆତିହଁ ମାହାପୁରୁ ଇ ପତିତା ରାସକି ଆହାମାନି ତଣ୍ଡୟାଁ ଏଝାଶାକି ହାନେସି; ୧୯ ଅଡ଼େ ଆମ୍ବାଆସି ଇ ପତିତି ବଲ୍ଲୁତି ମେକ୍‌ନେସି, ଆତିହଁ ମାହାପୁରୁ ଇ ପତିତା ରାସକି ଆହାମାନି ଜୀଝୁତି ମାର୍‌ନୁ, ଅଡ଼େ ସୁଦୁ ଗାଡ଼ାତି ତାନି ବାଟା ମେକ୍‌ନେସି ।

୨୦ ଆମ୍ବାଆସି ଇ ବାରେତାକି ସାକି ହାହିମାନେସି, ଏଝାସି ଏଲେଇଞ୍ଜି ମାନେସି, ସାତା, “ନାନୁ ତବେ ଝାହିମାଇଁ ।” ଆମେନ୍ । ପ୍ରବୁ ଜୀସୁ ଝାମ୍ବୁ !

୨୧ ପ୍ରବୁ ଜୀସୁତି କାର୍‌ନାମେହ୍‌ନାୟି ବାରେତାୟି ମାଙ୍ଗେ ଆୟାପେ । ଆମେନ୍ ।

ପୁସ୍ତକ ଫେରା

The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33